



佛學大綱

國立北平圖書館
NATIONAL LIBRARY OF PEIPING
PEIPING

登錄號 07957 分類號 220
Acc. No. Class No. 616

中學教務研究

- | | | |
|----------|------|--------|
| 一個教育的書目 | 莊澤宣編 | 定價三角五分 |
| 鄉村教育新論 | 古 楫著 | 定價一元二角 |
| 中學作文題目研究 | 阮 真編 | 定價七角五分 |
| 教育學小辭典 | 莊澤宣編 | 定價七角 |
| 基本字彙 | 莊澤宣編 | 定價五角五分 |

二

- | | | |
|-----------|-------|--------|
| 小學分級字彙研究 | 王文新編 | 定價一元二角 |
| 兒童閱讀興趣的研究 | 徐錫齡編 | 定價五角 |
| 普通教學法 | 陳禮江譯 | 定價一元 |
| 增訂教育論文索引 | 邵爽秋等編 | 定價三元 |
| 歐洲的中學教育 | 彭仁山增訂 | 定價三元 |
| | 唐惜分譯 | 定價五角五分 |
| | 方惇頤譯 | 定價五角五分 |



之弗整。繇於教。愒之弗昌。思欲躋之於儒釋。互用之。涂揭。殫其義。以號天下。十年以來。手梵文。口大乘者。蜂起。彬彬雅雅。不懈益奮。蓋學術風氣之。又將一轉矣。予於佛學。未之窺。顧觀夫謝君佛學大綱之成書。默察古今。運會之微。而歎其足以應事勢之需也。爰樂而爲之序。民國五年十月杭縣張相譔。

佛學大綱

卷上

目錄

序論

第一章 釋迦本行記

第一節 佛教之淵源及釋迦之種姓

第二節 釋迦誕生爲白淨王太子

第三節 釋迦出家

第四節 釋迦成道

第五節 釋迦初說法及感化記

第六節 釋迦還鄉

第七節 釋迦中年以後說法

目錄

第八節 釋迦滅度

第九節 釋迦十大弟子

第二章 釋迦滅度後佛教之傳播及其教義之分判

第一節 印度佛教畧述

第二節 佛教東漸畧述

第三節 四教之分判

第四節 五教之分判

第三章 東土佛教流傳之十宗

第一節 俱舍宗

第二節 成實宗

第三節 律宗

第四節 禪宗

第五節 法相宗

第六節 三論宗

第七節 天台宗

第八節 賢首宗

第九節 密宗

第十節 淨土宗

上卷終

佛學大綱 卷上

佛學大綱

卷上

序論

第一章 釋迦本行記

第一節 佛教之淵源及釋迦之種姓

今所謂佛者。是佛陀 Buddha 之省稱。翻譯名義曰。大論云。秦言知者。知過去未來現在。衆生非衆生數。有常無常等。一切諸法。菩提樹下。了了覺知。故名佛陀。後漢郊祀志曰。佛者。漢言覺也。覺具三義。一者自覺。悟性眞常。了惑虛妄。二者覺他。運無緣慈。度有情界。三者覺性圓滿。窮源極底。行滿果圓。故華嚴云。一切諸法性。無生亦無滅。奇哉大導師。自覺能覺他。肇師云。生死長寢。莫能自覺。自覺覺彼。其唯佛也。又曰。佛者何也。蓋窮理盡性。大覺之稱也。其道虛玄。固已妙絕常境。心不可以智知。形不可以像測。同萬

物之爲而居不爲之域。處言數之內。而止無言之鄉。非有而不可爲。非無而不可爲。有寂寞虛曠。物莫能測。不知所以名。故強謂之覺。其爲至也。亦已極矣。天台智者大師嘗謂六卽佛。攝義尤廣。無機子敍其意爲之頌。

一、理卽佛頌 動靜理全是。行藏事盡非。冥冥隨物去。杳杳不知歸。

二、名字卽佛頌 方聽無生曲。始聞不死歌。今知當體是。翻恨自蹉跎。

三、觀行卽佛頌 念念照常理。心心息幻塵。徧觀諸法性。無假亦無真。

四、相似卽佛頌 四住雖先脫。六塵未盡空。眼中猶有翳。空裏見花紅。

五、分證卽佛頌 豁爾心開悟。湛然一切通。窮源猶未盡。尙見月朦朧。

六、究竟卽佛頌 從來真是妄。今日妄皆真。但復本時性。更無一法新。

據已上所述。則佛之爲名。本大覺之稱。有自覺覺他之用。無機子頌六卽佛。翻譯名義載在佛陀解下。頌詞玄深。兼括修證之法。卽所以成覺之道。志於佛教者。不可不玩索之也。至於其詳。要待後論。惟佛是總名。自來覺

者。同被斯號。及釋迦牟尼出。而後集過去一切諸佛之成。爲未來一切諸佛之宗。故言佛教者。專主釋迦牟尼。

釋迦牟尼。爲印度之刹帝利種。先是印度古來有四種姓。一曰婆羅門。Brahmana。卽僧侶。二曰刹帝利。Kshatriya。卽王族。三曰毘舍。Vaishya。卽農商。四曰首陀。Sudra。卽賤族。當時婆羅門族最尊。掌國之教。及釋迦起。獨明正覺。始以婆羅門爲外道。佛教由此立焉。長阿含經述刹帝利種姓相承之始。及於天地始生。言頗恢怪。然凡立教者。無不推宇宙創造之原。且關於釋迦族系。固不得而略也。長阿含經曰。刼初天地欲成。大水彌滿。風吹結構。以成世界。此世欲成。光音天福行命盡。來生爲人。皆悉化生。歡喜爲食。身光自在。神足飛行。無有男女尊卑。衆共生故。名曰衆生。有自然地味。猶如醍醐。色如生酥。味甜如蜜。其後衆生以手試嘗。遂生味著。漸成搏食。光明轉滅。無復神通。食地味多者。顏色麤悴。其食少者。顏色光澤。因有勝負。便相

是非地味消歇。咸皆懊惱。咄哉爲禍。無復地味。又生地皮。狀如薄麩。色味香美。後復食之。轉相輕慢。地皮又滅。又生地膚。因食多少。生諸惡法。地膚復滅。後有自然粳米。無有糠糲。不加調和。備衆美味。衆生食之。生男女形。互相瞻視。遂生欲想。共在屏處。爲不淨行。餘衆生見。咄哉非法。云何衆生。有如是事。男子見他呵責。卽自悔過。自身投地。其彼女人。卽送食與之。扶之令起。因此世局。便有不善。夫主之名。以送飯與夫。名之爲妻。其後衆生。遂爲淫佚。爲自障蔽。遂造屋舍。以此因緣。世中立家。其後衆生。淫佚轉增。遂夫妻共住。其餘衆生。壽福行盡。從光音天來生此間。在母胎中。因此世間。有處胎生。爾時先造瞻波城。乃至一切城郭。自然粳米。朝刈暮熟。刈後隨生。未有莖榦。時有衆生。併取日糧。如是相效。乃至併取五日。粳米漸生。糠糲刈已不生。有枯株現。爾時衆生。懊惱悲泣。各封田宅。以分疆畔。其後衆生。自藏已米。盜他田穀。無能決者。議立一平等主。善護人民。賞善罰惡。

各共減割。以供給之。時彼衆中有一人。形質長大。容貌端正。甚有威德。請以爲主。於是始有民主之名。按樓炭經等所記。與此略同。刹帝利是王族。故遠託天地初成。以至民主所起也。

長阿含經又記初民主有子名珍寶。珍寶以下。又三十一王。各記其名。以至善思。善思以來。有十族轉輪聖王。相續不絕。第一伽菟。至第十懿摩。由此本緣。名刹利種。各族或是兄弟支肩。繼世迭興。每王轉輪壽算。自十萬歲至百歲。總其世數。凡八萬四千二百一十聖王。仰尋白淨所承。出自懿摩。世世相纂。遂啟釋迦。雖年曆遐邈。莫可審詳。而溯厥由來。見於經論。粗述其略。俾可觀焉。

右記刹帝利種相承之始。然釋迦雖出刹帝利種。初姓瞿曇。後乃姓釋迦。十二游經。記瞿曇得姓之原。謂昔阿僧祇劫時。有菩薩爲國王。其父母早喪。讓國與弟。捨行求道。遙見一婆羅門。姓曰瞿曇。因從學道。婆羅門言。當

解王衣。如吾所服。受瞿曇姓。於是菩薩體瞿曇姓。入於深山。坐禪念道。旋還國界。吏民不識。謂爲小瞿曇。於城外甘蔗園中。以爲精舍。會賊劫官物。路由廬邊。明日捕賊。見舍下有迹。遂收菩薩。以木貫身。立爲大標。血注於地。復射殺之。大瞿曇天眼遙見。自遠至爲棺斂。以泥團土中餘血。著置左右器中。却後十月。血化爲人。左卽成男。右卽成女。便姓瞿曇氏。仁賢劫來。始爲當寶如來釋迦越。自下二十五王。至於白淨。此敘瞿曇受姓相承。惟所記轉輪諸王。不同長阿含經。茲亦略焉。

長阿含經。又記釋迦六世祖始姓釋迦氏。曰。乃往過去有王名懿摩。王有四子。一名面光。二名象食。三名路指。四名莊嚴。其王四子。少有所犯。王擯出國。到雪山邊。住直樹林中。其四子母。及諸家屬。皆追念之。卽共集議。詣懿摩王所。白言。大王。當知我與四子別久。欲往看視。王卽告曰。欲往隨意。時母眷屬。聞王聽已。卽詣雪山。至直樹林。到四子所。時諸母等。各爲其婚。

後懿摩王。聞其四子生子端正。王卽歡喜而發此言。此真釋子。能自存立。因此名釋。在直樹林。故名爲釋。懿摩王卽釋種先也。按釋義言能。瑞應本起亦云。釋迦爲能。此四子因能命氏也。惟別傳云。此國有釋迦樹。甚茂盛。相師云。此處必出國王。因移四子立國。故號釋種。雖非經說。聊附異聞。已上旣明佛之爲義。及釋迦姓族所原。然當釋迦弘教之時。印度已頗有諸教。婆羅門最盛。而經論所斥。共有外道九十五種。華嚴經隨疏演義鈔。合九十五種外道爲十一宗。謂外道教文。傳習西域。不出十一宗。而九十五種外道。無不盡攝也。

一、數論師計冥諦生。從數起論。名爲數論。又論能生數。名爲數論。其造數論及學數論者。皆名數論師。計冥諦生者。百論云。從冥生覺。乃至神我。共成二十五諦。以前二十四諦。從神我而生。依神我爲主。謂神我常覺明了。常住不壞。攝受諸法。是故執神我是常是一。是萬物

因。是涅槃因也。（二十五諦者，冥初自性諦，卽冥諦也；智大諦，卽覺也；我心諦，五唯諦，卽色聲香味觸也；五大諦，卽地水火風空也；五知根諦，卽眼耳鼻色身也；五作業根諦，卽口手足大便小便也；心平等根諦，神我諦，神我卽識神也。）

二、衛世師計六句生。梵語衛世華言無勝。其人在佛前八百年出世時人以其盡避聲色。匿跡山藪。夜絕視聽。方行乞食。有似鵝鷓鳥。故名鵝鷓仙人。及獲五通。遂說論十萬偈。謂證菩提。便欣入滅。六句生者。一者實。謂諸法體實爲德業所依。二者德。卽道德也。三者業。卽作用也。四者大有。謂實德業同一有也。五者同異。謂如地望地是同。望水卽異。水火風等亦然。六者和合。謂諸法和合。如鳥飛空。忽至樹枝。住而不去。法亦如是。由和合故。令有住也。（五通者。足不履地。知人心命。回眼千里。呼名卽至。石壁無礙也。）

三、塗灰計自在天生萬物。塗灰卽外道名。謂此外道計欲界第六自在天能生萬物。

四、園陀論師計那羅延天生四姓。梵語園陀。華言智論。梵語那羅延。華言鉤鎖力士。謂其骨節鉤鎖而有力也。那羅延天能生四姓。謂口生婆羅門。兩臂生刹帝利。兩膝生毘舍。兩腳生首陀。（四姓已具前釋。又婆羅門本義爲淨行。刹帝利本義爲田主。毘舍亦云商賈。首陀亦云農人。）

五、安茶論師計本際生。梵語安茶。翻無本際者。卽過去世之初際也。謂此外道計世間最初有大水時。有大安茶出生。形如雞卵。後爲兩段。上爲天。下爲地。中生一梵天。復能出生一切有命無命之物。故計梵天是生萬物之主也。

六、時散外道計物從時生。謂此外道自見草木等物。有時生華。有時

生果。有時作用。或舒或卷。合彼枝條。隨時榮枯。時雖微細不可見。以此華實等。則知有時也。

七、方論師計方生人。人生天地。方卽四方。謂此外道。計四方能生人。人能生天地。滅後還入於方也。

八、路伽耶計色心法皆極微作。梵語路伽耶。華言順世。謂此外道。計色心等法。皆從四大極微。能生麤色。雖是極微。其體實有。以世間麤物無常。極微之因不壞也。（四大者地大水大火大風大也）

九、口力論師計虛空爲萬物因。謂此外道。計從空生風。從風生火。從火生煖。煖生水。水生凍。堅作地。地生五穀。五穀生命。命沒還歸虛空也。

十、宿作論師計苦樂隨業。謂此外道。計一切衆生。受苦樂報。皆隨宿世本業所作。若有持戒精進。受身心苦。能壞本業。本業既盡。衆苦亦

滅。衆苦滅故。卽得涅槃。是故計宿世所作爲一切因也。

十一、無因論師計自然生。謂此外道。計一切萬物無因無緣。皆自然生。皆自然滅也。

陀羅尼集經。又有外道六師。以爲邪心見理。發於邪智。不稟正教。故名外道。輔行云。六師元祖。是迦毘羅。支派分異。遂爲六宗。（迦毘羅華言黃色）

一、富蘭那迦葉。梵語富蘭那字也。翻無迦葉因母之姓而爲姓也。其人起邪見。謂一切法斷滅。無君臣父子忠孝之道。名爲色空。外道以色破欲界有。以空破色界有。謂空爲至極故也。

二、末伽黎拘賒黎。梵語末伽黎。華言不見道字也。梵語拘賒黎。翻無因母之名而爲名也。其人起邪見。謂衆生苦樂。不由自行而得。皆是自然。而有此計自然者。卽是無因。亦邪見也。（按此卽前第十一種）

三、刪闍夜毘羅胝。梵語刪闍夜。華言正勝字也。梵語毘羅胝。華言不

作。因母之名而爲名也。其人起邪見。謂道不須求。經生死劫數。苦盡自然得。又去八萬劫滿。自然得道也。

四、阿耆多翅舍欽婆羅。梵語阿耆多翅舍。字也。欽婆羅。麤衣名。因以爲名也。其人起邪見。非因計因。著麤弊衣。自拔其髮。以煙熏鼻。及五

熱炙身。修諸苦行爲道。自謂今身併受諸苦。則後身常得樂也。（大

涅槃經有六苦行外道。一自餓外道。二投淵外道。三赴火外道。四自

坐外道。五寂默外道。六牛狗外道。持牛狗戒。皆修苦行者也。不復具詳。

五、迦羅鳩馱迦旃延。梵語迦羅鳩馱。華言牛領。字也。梵語迦旃延。華

言剪髮。姓也。其人謂諸法亦有相。亦無相。卽邪見也。

六、尼犍陀若提子。梵語尼犍陀。華言離繫。此外道出家之總名。梵語

若提。無因母之名而爲名也。其人謂罪福苦樂。本有定因。要當必受。

非行道所能斷。如此計者。卽邪見也。

諸經論多述及外道者。茲特舉其略而已。要之釋迦生於外道熾盛之時。而摧邪顯正。獨成大覺。遂使佛教不替于世。然外道亦多卓絕苦行。非盡苟然。釋迦不得外道資之於前。亦難以成就如此博大之一切種智也。

第二節 釋迦誕生爲白淨王太子

釋迦本行。其事頗違俗理。涉於荒怪。然大覺出世。不同凡人。諸教所宗。並多靈跡。故茲編所述。不敢率執恆軌。以律聖神。至於感應萬端。義著經典。悉依舊文。約而次之。宗教之史。本異餘科。常智所施。今無取爾。

釋迦生於印度之迦比羅皤窣都國。Kapilavastu 或又稱爲迦毘羅施兜。或曰迦維羅衛。或曰劫比羅伐窣堵。異名凡十餘。皆音譯殊文。實一地也。梵語迦比羅者黃義。皤窣都者城義。法顯佛國記曰。迦維羅衛國大空荒。人民希疎。道路怖畏。白象師子。不可妄行。玄奘西域記曰。劫比羅伐窣堵國。周四千餘里。空城十數。荒蕪已甚。王城頽圯。周量不詳。其內宮城。周十

四五里。疊甄而成。空荒久遠。人里曠稀。蓋至法顯玄奘往游時。勝境已頽圯如是矣。以今考之。其地當在波羅奈 Benares 之東北。普特羅 Patna 之西北。哥羅克堡 Gorakhpur 之近傍。近時浮來博士 Dr. A. Fisher 則以佛誕生處在藍毘尼 Lumbini 以其處有阿輸迦王（即阿育王）所刻石柱。久沒土中。千八百九十七年。浮來博士始發掘得之也。

諸經論中。記釋迦降生因緣。因果經曰。爾時善慧菩薩。功德行滿足。位登十地。在一生補處。近一切種智。生兜率天。名聖善白。爲諸天主。說於一生補處之行。亦於十方國土。現種種身。爲衆生隨宜說法。期運將至。當下作佛。卽觀五事。一者觀諸衆生。熟與未熟。二者觀時至與未至。三者觀諸國土。何國處中。四者觀諸種族。何族貴盛。五者觀過去因緣。誰最真正。應爲父母。觀五事已。卽自思惟。今諸衆生。皆是我初發心已來。所成熟者。堪能受於清淨妙法。於此三千大千世界。此閻浮提迦毗羅施兜國。最爲處中。

瑞應本起云。迦維衛者。三千日月。萬二千天地之處中也。佛之威神。至尊至重。不可生邊地。地爲傾邪。故處其中。周化十方。往古諸佛。出興於世。皆生於此。諸族種姓。釋迦第一。甘蔗苗裔。聖王之後。觀白淨王過去因緣。夫妻真正。堪爲父母。蓋釋迦本爲善慧菩薩。此由兜率天降生。迦毗羅國。釋種之因緣也。釋迦父白淨王。亦稱淨飯王。

普耀經云。於時菩薩問諸天子。以何形貌降神母胎。或言儒童形。或曰釋梵形。或言日月王形。或曰金翅鳥形。彼有梵天。名曰強威。從仙道來。報諸天言。象形第一。六牙白象。威神巍巍。梵典所載。所以者何。世有三獸。一兔。二馬。三白象。兔之渡水。趣白渡耳。馬雖差猛。猶故不知水之深淺。白象之渡。盡其源底。聲聞緣覺。其猶兔馬。雖渡生死。不達法本。菩薩大乘。譬如白象。解暢三界十二緣起。了知本無。救護一切。莫不蒙濟。菩薩過冬盛寒。春末夏初。樹始華茂。不寒不暑。適在時宜。菩薩從兜率天。化作白象。諸天作

諸好樂。燒衆名香。放大光明。普照十方。以四月八日。明星出時。降神母胎。於時摩耶夫人。於眠寤之際。見菩薩乘六牙白象。騰虛而來。從右脅入。身現於外。如處瑠璃。夫人體安快樂。如服甘露。顧見自身。如日月照。心大歡喜。踴躍無量。見此相已。廓然而覺。此釋迦降胎之朕也。白淨王使婆羅門占之。曰。此想必是正覺之瑞。若不出家。爲轉輪聖王。王四天下。七寶自至。千子具足。自從菩薩處胎以來。摩耶夫人。日更修行六波羅蜜。即六度解見下卷天獻飲食。自然而至。不復樂人間之味。三千大千世界。常皆大明。清涼香風。起於四方。諸抱病者。悉皆除愈。

釋迦在胎。不令母有諸苦患。行住坐臥。無所妨礙。晨朝於母胎中。爲色界諸天說種種法。至日中時。爲欲界諸天。示說諸法。於日晡時。又復爲鬼神說法。於夜三時。亦復如是。成熟利益無量衆生。夫人懷妊。日月將滿。欲出園林游觀。白淨王令淨掃灑藍毗尼園。大華嚴經云。十月滿足。於四月八

日。日。初。出。時。夫。人。見。彼。園。中。有。一。大。樹。名。曰。無。憂。華。色。香。鮮。枝。葉。分。布。極。爲。茂。盛。卽。舉。右。手。欲。牽。摘。之。菩。薩。漸。漸。從。右。脇。出。前。記。釋。迦。於。四。月。八。日。處。胎。而。華。嚴。又。云。四。月。八。日。降。誕。茲。並。記。之。

當。時。樹。下。生。七。寶。七。莖。蓮。華。大。如。車。輪。釋。迦。卽。便。墮。蓮。華。上。無。扶。侍。者。自。行。七。步。舉。其。右。脅。而。師。子。吼。我。於。一。切。天。人。之。中。最。尊。最。勝。無。量。生。死。於。今。盡。矣。當。爾。之。時。所。感。瑞。應。三。十。有。四。一。十。方。世。界。皆。悉。大。明。二。三。千。大。千。世。界。十。八。相。動。丘。墟。平。坦。三。一。切。枯。木。悉。更。敷。榮。國。界。自。然。生。奇。特。樹。四。園。苑。生。異。甘。果。五。陸。地。生。寶。蓮。華。大。如。車。輪。六。地。中。伏。藏。悉。皆。發。出。七。諸。藏。珍。寶。放。大。光。明。八。諸。天。妙。服。自。然。來。降。九。衆。川。萬。流。恬。靜。澄。清。十。風。止。雲。降。空。中。明。淨。十。一。香。風。芬。芳。從。四。方。來。細。雨。潤。澤。以。斂。飛。塵。十。二。國。中。疾。病。皆。悉。除。愈。十。三。國。內。宮。舍。無。不。明。耀。燈。燭。之。光。不。復。爲。用。十。四。日。月。星。辰。停。住。不。行。十。五。毗。舍。佉。星。漢名下。現。人。間。待。太。子。生。十。六。諸。梵。天。

王執素寶蓋。列覆宮上。十七、八方諸仙人師。奉寶來獻。十八、天百味食。自然在前。十九、無數寶瓶。盛諸甘露。二十、諸天妙車。載寶而至。二十一、無數白象子。首戴蓮華。列住殿前。二十二、天紺寶馬。自然而來。二十三、五百白師子王。從雪山出。息其惡情。心懷歡喜。二十四、諸天妓女。於虛空中。作妙音樂。二十五、諸天玉女。執孔雀拂。現宮牆上。二十六、諸天玉女。各持金瓶。盛滿香汁。列住空中。二十七、諸天歌頌。讚太子德。二十八、地獄休息。毒痛不行。二十九、毒蟲隱伏。惡鬼善心。三十、諸惡律儀。一時慈悲。三十一、國內孕婦。產者悉男。其有百疾。自然除愈。三十二、一切樹神。化作人形。悉來禮侍。三十三、諸餘國王。各齎名寶。同來臣服。三十四、一切人天。無非時語。爾時諸綵女衆。見此瑞相。極大歡喜。

白淨王聞太子生。卽嚴四兵。眷屬圍繞。入藍毗尼園。到夫人所。見太子身相好殊異。歡喜踊躍。隨從入城。卽將太子往詣天寺。太子旣入。梵天形像。

皆從座起。禮太子足而語王言。太子天人中尊。虛空天神皆悉禮敬。大王不見耶。何今來禮我。將還後宮。王請香山阿私陀仙人來相太子。仙人言太子有三十二相。一者足下安平。立如奩底。二者足下千輻輳轉。輪相具足。三者手足相指長。勝於餘人。四者手足柔軟。勝餘身分。五者足跟廣。具足滿好。六者足指合縵網。勝於餘人。七者足趺高平。好與跟相稱。八者脚腩纖好。如伊泥延鹿王。九者平住兩手摩膝。十者陰藏相如象王馬王。十一者身縱廣等。如泥俱盧樹。十二者一一孔一毛生。青色柔軟右旋。十三者毛上向靡。青色柔軟右旋。十四者金色相。其色微妙。勝閻浮檀金。十五者身光一丈。十六者皮薄細滑。不受塵垢。不停蚊虻。十七者七處滿。兩足下兩腋中兩肩上項中皆滿。字相分明。十八者兩腋下滿。如摩尼珠。十九者身如師子。二十者身廣端直。二十一者肩圓好。二十二者口四十齒。二十三者齒白齊密而根深。二十四者四牙最白而大。二十五者方頰車如

師子二十六者。味中得上味。咽中二處。津液流出。二十七者。舌大軟薄。能覆面至耳髮際。二十八者。梵音深遠。如迦陵頻伽聲。二十九者。眼色如金精三十者。眼睫如牛王。三十一者。眉間白毫相。軟白如兜羅綿。三十二者。頂髻肉成具。有如此相好之身。若在家者。年一十九爲轉輪聖王。若出家者。成一切種智。廣濟天人。然王太子。必當學道。得成阿耨多羅三藐三菩提。漢言正覺不久當轉清淨法輪。利益天人。開世間眼。仙人相已而退。

釋迦生七日。摩耶夫人命終。以懷釋迦。功德大故。上生忉利。於是姨母摩訶波闍波提。（卽大愛道）乳養太子。太子七歲。父王心念。宜令學書。有一婆羅門。名跋陀羅尼。來應王請。教授太子。爾時婆羅門以四十九書字之本。教令讀之。於時太子見此事。已問其師。此何等書。闍浮提中。一切諸書。凡有幾種。師默然不知所答。又問此阿一字。有何等義。師又不能答。內懷慚愧。卽從座起。禮太子足。而讚歎言。太子初生。行七步時。自言天人之

中。最尊最勝。此言不虛。唯願爲說。閻浮提書。凡有幾種。太子答言。閻浮提中。或有梵書。有佉樓書。或蓮華書。有如是等六十四種。婆羅門乃白王。太子是天人中第一之師。云何欲令我教耶。至是凡諸藝技。典籍議論。天文地理。算數射御。太子皆悉自然知之。

釋迦年十歲。從弟提婆達多。次名難陀。次名孫陀羅。各有大筋力。既聞太子諸藝皆通。因相共言。太子雖復善解書論。筋力詎勝我等。欲與太子校勇。父王訪國中善射者。令教太子。卽往後園。欲射鐵鼓。師以小弓授太子。太子笑言。此弓力弱。更求如是七弓來。便執七弓以射一箭。過七鐵鼓。白淨王大喜。因念我子書論算數。四遠悉知。射藝未有知者。却後七日。當出後園試武藝。令國中人民。有勇力者。可悉來此。到第七日。提婆達多先出城。有一大象。當城門。軍衆不敢前。提婆達多。以手搏象頭。象便躡地。軍衆次第得過。難陀又與眷屬。次至躡象當門。妨行者路。難陀以足指挑象。擲

著路旁。衆人聚觀無數。最後太子乃到。人並稱提婆達多及難陀勇。太子念今正是現力之時。即便以手執象。擲著城外。還以手接。不令傷損。象又還甦。無所苦痛。時諸人民。歎未曾有。及集園中。爾時彼園施列金鼓。銀鼓。鍮石之鼓。銅鐵等鼓。各有七枚。提婆達多先射。徹三鼓。難陀亦徹三鼓。衆進弓請太子射。太子言此弓力弱。更覓强者。諸臣言祖王有良弓。今在王庫。便取至。太子卽牽以放一箭。徹過諸鼓。然後入地。泉水流出。又亦穿過大鐵圍山。提婆達多。又與難陀撲戲。二人力等。亦無勝者。太子又前。手執二弟。躡之於地。以慈力故。不令傷痛。四遠人衆。見太子識慧。既勝一切力。又超健。莫不歎伏。

於是白淨王乃擇日以海水灌太子頂。集諸仙人衆。徧及諸王。頂戴四海水。轉以授王親灌之。灌頂既已。高聲唱言。今立薩婆悉達。以爲太子。（按薩婆悉達。Sarvarthasiddha 卽一切成就義。蓋釋迦本種族之名。此爲太子

實名。然又稱喬答摩悉達多。 *Gautama Siddhartha* 後通稱釋迦牟尼。牟尼

則出家後之名也。未幾太子啟王出游。諸臣導從。案行國界。到王田所。止息閭浮樹下。看諸耕人。爾時淨居天化作傷蟲。鳥隨啄之。太子見之。起慈悲心。衆生可愍。互相吞食。即便思惟。離欲界愛。如是乃至得曰禪地。日光所赫。樹爲曲枝。陰蔭太子。王方推求而至。見太子端坐思惟。樹枝曲蔭其軀。深生奇特。問何故於此坐。太子卽答。觀諸衆生。更相吞食。甚可愍傷。王聞此語。慮其出家。以爲宜急婚娉。以悅其意。便呼俱共還國。太子言願停於此。王卽流淚相喚。太子乃返。

至是太子年十七。王集諸臣。議爲太子索婚。諸臣因言有一釋種婆羅門。名摩訶那摩。其人。有女。名耶輸陀羅。端正有德。堪太子妃。王便爲納之。行住坐臥。未曾不俱。初自無有世俗之意。於靜夜中。但修禪觀。時王日問諸姝女。太子與妃接近不。姝女答言。不見太子有夫婦道。王聞此語。愁憂不

樂如是經時。猶不接近。時王深疑。恐不能男。大善權經云。何故菩薩而有室娶。菩薩無欲。所以示現妻息。防人懷疑。菩薩非男。斯黃門耳。故納瞿夷。釋氏之女。羅云於天變沒化生。不由父母合會而育。又是菩薩本願所致。按翻譯名義曰。瞿夷卽是太子第一妃也。第二妃生羅云。名耶檀亦名耶輸。第三妃名鹿野。太子以三妃故。白淨王爲立三時殿。大論曰。釋迦文菩薩有二夫人。一名瞿毗耶。二名耶輸陀羅。羅睺羅母也。瞿毗耶是室女。故不孕子。據此則太子共有三妃。羅睺羅省稱羅云也。

第三節 釋迦出家

先是釋迦息閻浮樹下。覩鳥啄傷蟲。以衆生可愍。互相吞食。當時卽有出家之意。白淨王患之。爲立妃嬪。意使娛樂。久之。太子欲暫出園林遊戲。出城東門。時淨居天化作老人。頭白背偃。拄杖羸步。太子便問從者。此爲何人。從者答言。此老人也。太子又問。何謂爲老。答曰。此人昔日曾經嬰兒。童

子少年。遷謝不住。遂至根熟。形變色衰。飲食不消。氣力衰微。坐起極苦。餘命無幾。故謂爲老。太子又問。唯此一人老。一切皆然。從者答言。一切皆悉。當如此。爾時太子聞是語已。生大苦惱。而自念言。日月流邁。時變歲移。老至如電。身安足恃。我雖富貴。豈獨免耶。云何世人而不怖畏。太子從本已來。不樂處世。又聞此事。益生厭離。卽回車還。愁思不樂。

王恐太子學道。更增妓女。以娛樂之。未幾太子復啟王出游。王勅言太子前出東門。今可勅令從南門出。時淨居天化作病人。身瘦肥大。喘息呻吟。骨消肉竭。顏貌痿黃。舉身戰掙。不能自持。兩人扶掖。在於路側。太子問從者言。此病人也。又問何謂爲病。曰。夫謂病者。皆由嗜欲。飲食無度。四大不調。轉變成病。百節苦痛。氣力虛微。飲食寡少。眠臥不安。雖有身手。不能自運。要假他力。然後坐起。爾時太子以慈悲心。看彼病人。自生憂愁。又復問言。此人獨爾。餘皆然耶。答曰。一切人民。無有貴賤。同有此病。太子聞言。深

生恐怖。身心戰動。語從者言。如此身者。是大苦聚。世人於中。橫生歡樂。不知覺悟。今者云何。尙欲游觀嬉戲。即便回車。還入王宮。坐自思惟。憂愁不樂。

王慮太子出家。更選一婆羅門子。名憂陀夷。聰明智慧。極有辨才。令給侍太子。冀回其意。復經少時。太子更啟王出游。王勅諸臣。太子今者復求出游。我不忍違。前太子出東南二門。已見老病。還輒愁憂。今者宜令從西門出。卿等修治道路。無令復有老病臭穢。在道側也。於是太子與憂陀夷。百官導從。出城西門。時淨居天心自念言。先現老病於二城門。舉衆皆見。令白淨王。瞋責從者。并及外司。我今日所現之事。惟當令太子及憂陀夷二人見耳。使餘官屬不受責也。乃下化爲死人。四人輦舉。以諸香華。布散屍上。室家大小。號哭送之。是時太子與憂陀夷二人獨見。太子卽問。此爲何人。憂陀夷隱念王勅。默然不答。如是三問。淨居天王威神之力。使憂陀夷

不覺答言。是死人也。太子又問。何謂爲死。憂陀夷言。夫謂死者。刀風解形。神識去矣。四體諸根。無復所知。此人在世。貪著五欲。愛惜錢財。辛苦經營。唯知積聚。不識無常。今者一旦捨之而死。又爲父母親戚屬眷之所愛念。命終之後。猶若草木。恩情好惡。不復相關。如是死者。誠可哀也。太子聞已。心大顛怖。又問憂陀夷言。唯此人死。餘亦當然。卽復答言。一切世人。皆應如是。無有貴賤而得免脫。太子聞語。心不自安。以世間乃復有此死苦。云何於中而行放逸。卽勅還車。御者答言。前出二門。未到園所。致令大王。深見瞋責。今者豈敢復如此也。遂至園中。太子止園樹間。除其侍衛。端坐思惟。憂陀夷到太子所言。大王見勅。與太子共爲朋友。當相曉諫。願不見責。古昔諸王。及今現在。皆悉受五欲之樂。然後出家。太子云何永絕不願。又人生世。宜順人行。無有棄國而學道者。太子答言。我不以損國故爾。亦復不言五欲無樂。以畏老病生死之苦。故於五欲不敢愛著。汝向所言古昔。

諸王先經五欲。然後出家。此諸王等。今在何許。以愛欲故。或在地獄。或在餓思。或在畜生。或在人天。汝今云何。令我受之。時憂陀夷雖竭辯才。不能令迴。太子仍勅嚴駕還宮。

白淨王益日遣人慰誘太子。因念太子前已出三城門。今更游者。當出北門。卽先令莊嚴彼外園林。倍令光麗。遂勅御者。太子復出。可令乘馬。使得四望。未幾太子果復啟請出游。出城北門。到彼園所。太子下馬。止息樹下。除去侍衛。端坐思惟。世間老病死苦。時淨居天化作比丘。法服持鉢。手執錫杖。視地而行。太子便問。汝是何人。答言比丘。又問何謂比丘。答曰。能破俗賊。不受後身。故曰比丘。世間皆悉無常危脆。我所修學。無漏聖道。不著色聲香味觸法。永得無爲。到解脫岸。作是言已。於太子前。現神通力。騰空而去。當爾之時。諸從官屬。皆悉覩見。太子旣已見此比丘。又聞廣說出家功德。會其宿懷厭欲之情。便自唱言。善哉善哉。天人之中。唯此爲勝。我當

決定修學是道。作是語已。即便索馬。還歸宮城。於時太子心生歡慶。自念我先見有老病死苦。晝夜常恐爲此所逼。今見比丘。開悟我情。示解脫路。卽自思惟。方便求覓出家因緣。

爾時太子年已十九。因念我今正是出家之時。乃詣父王白言。恩愛集會。必有別離。唯願聽我出家學道。一切衆生。愛別離苦。皆使解脫。願必垂許。不見留難。白淨王聞太子語。心大苦痛。流涕不許。時迦毗羅國諸大相師。並知太子若不出家。過七日後。得轉輪王位。王四天下。王聞是語。心生歡喜。明日卽勅五百諸釋。勇多力者。宿衛太子。並置多人。防護城門。令四城門。開閉之聲。聞四十里。復勅耶輸陀羅。并諸內宮。倍加警戒。過於七日。無使出家。時王又來太子所。太子遙見。卽往奉迎。頭面禮足。問訊起居。王語太子。我昔旣聞阿私陀說。知汝必定不樂處世。國嗣旣重。孰當相繼。唯願汝爲我生一子。然後絕俗。不復相違。太子聞言。心自思惟。父王所以苦留

我者。正爲國無紹嗣耳。卽答王言。善哉如勅。旋以左手指其妃腹。時耶輸陀羅。便覺體異。自知有娠。王聞太子如勅之言。私自喜。幸謂太子七日之內。未必有兒。若過此期。轉輪王位。自然而至。不復出家。

於是太子心自念言。我年已至十九。今又是二月。復是七日。宜應方便。思求出家。況今父王所願已滿。作此念已。身放光明。照四天王宮。乃至照於淨居天宮。不令人間見此光明。爾時諸天知太子出家時至。卽下到太子所。合掌白言。無量劫來所修行願。今者正見成熟之時。於是太子答諸天言。如汝等語。今正是時。然父王勅內外官屬。嚴見防衛。欲去無從。諸天白言。我等自當設諸方便。令太子出。使無知者。諸天即便以其神力。令諸官屬。悉皆熟臥。耶輸陀羅眠臥之中。得三大夢。一者夢月墮地。二者夢牙齒落。三者夢失右臂。昵中驚覺。心大怖懼。以所夢告太子。太子曰。月猶在天。齒又不落。臂復尙在。當知諸夢虛假不實。不應橫生怖畏。耶輸陀羅又語

太子。如我自忖。當是太子出家之瑞。太子曰。汝但安眠。勿生此慮。要不令汝有不祥事。耶輸陀羅。即便還眠。

太子即從座起。徧觀妓女及耶輸陀羅。皆如木人。譬如芭蕉。中無堅實。或有倚伏於樂器上。臂脚垂地。更相枕臥。鼻涕目淚。口中流涎。又復徧觀妻及妓女。見其形體。髮爪髓腦。骨齒髑髏。皮膚肌肉。筋脉肪血。心肺脾腎。肝膽腸胃。屎尿涕唾。外爲革囊。中盛臭穢。無一可奇。强薰以香。飾以華綵。譬如假借當還。亦不得久。百年之命。臥消其半。又多憂惱。其樂無幾。世人云。何恆見此事而不覺悟。貪著淫欲。於是諸天皆言。太子當去。恐作稽留。適來宮圍內外厭寐。當學古昔諸佛所修之行。急遠此大火之聚。

爾時太子即便自往。至車匿所。而語之言。汝可爲我鞍韉陟（白馬）來。車匿聞語身戰。心懷猶豫。良久流涕。上啟太子。大王勅嚴。今日非游觀日。又非降伏怨敵之日。何於夜半索馬。欲何所之。太子復語車匿。我今欲爲

一切衆生。降伏煩惱。結使賊故。汝不應違我意。車匿舉聲號泣。冀覺宮內眷屬。以天神力。昏臥如故。車匿即便牽馬來。太子徐語車匿及犍陟。一切恩愛。會當別離。世間之事。易可果遂。出家因緣。甚難成就。車匿默然無言。犍陟不復噴鳴。諸天捧馬四足。并接車匿。釋提桓因。執蓋隨從。北門自然無聲而開。太子從門而出。作師子吼。我若不斷生老病死憂悲苦惱。終不還宮。我若不得阿耨多羅三藐三菩提。又復不能轉於法輪。要不還與父王相見。若當不盡恩愛之情。終不還見摩訶波提。及耶輸陀羅。諸天衆從太子至於天曉。所爲事畢。忽然不現。（按太子出家時日。佛祖通載及釋迦如來成道記。以爲十二月八日。過去現在因果經及釋迦譜。以爲二月八日。又有以爲四月七日或四月八日者。）

太子次行。至跋伽仙人苦行林中。太子見此園林寂靜。心生歡喜。即便下馬。語車匿曰。我既捨國。來此林中。惟汝一人。獨能隨我。甚爲希有。今我已

至閑靜處。汝便可與犍陟俱還宮也。車匿悲泣。垂淚躊躇。太子便脫寶冠。警中明珠。付車匿上白大王。我今不爲生天樂故。亦復非不孝順父母。亦無忿恨瞋恚之心。但畏生老病死。爲除斷故。來至此耳。父王若謂我今出家未是時者。汝以我語啟大王。老病死至。豈有定時。人雖少壯。焉能免此。父王若復責我。本要有子。當聽出家。汝可爲我具啟父王。耶輸陀羅久已有娠。王自聞之。昔勅如此。非爲專輒。又脫身瓔珞。奉摩訶波闍波提。脫身上餘莊嚴具。與耶輸陀羅。車匿猶未肯去。太子便以利劍自剃鬚髮。卽發願言。今落鬚髮。願與一切斷除煩惱。及以習障。太子剃鬚髮已。自見其所著之衣。猶是七寶。時淨居天於太子前。化作獵師。身服袈裟。太子卽以此七寶衣。與易袈裟服之。車匿見太子剃除鬚髮。身著法服。定知太子忍不可迴。悶絕於地。倍增懊惱。太子語之曰。汝應捨此悲愁。便還宮城。具宣我意。太子卽徐前行。車匿歔歔作禮。遠望不見太子。乃與犍陟緣路而還。

於是太子前至跋伽仙人所住之處。跋伽仙人遙來相迎。太子察彼諸仙人之行。或有以草而爲衣者。或以樹皮樹以爲服者。或有唯食草木華果。或有一日一食。或二日一食。或三日一食。如是行於自餓之法。或事水火。或奉日月。或翹一腳。或臥塵土。或有臥於荆棘之上。或有臥於水火之側。太子便問諸仙行於苦行。皆欲求何等果報。仙人答言。爲欲生天。太子又問。諸天雖樂。福盡則窮。輪迴六道。終爲苦聚。云何修諸苦因。以求苦報。遂與仙人言語往復。日暮便停一宿。明旦辭去。諸仙人以爲失於威儀。太子曰。汝等賓主之儀。亦無所少。但所修增長苦因。我今學道。爲斷苦本。是故去耳。

王見車匿。復使王師大臣。進勸太子。太子立志不動。復辭王師大臣。北詣阿羅邏迦蘭仙人。王師大臣留憍陳如等五人。密侍太子。自還宮城。太子經王舍城。頻婆娑王。要太子分國共治。太子不聽。遂至阿羅邏仙人住處。

請說斷生老病死之法。仙人卽便說曰。衆生之始。始從於冥初。從於冥初。起於我慢。從於我慢。生於癡心。從於癡心。生於染愛。從於染愛。生五微塵氣。從五微塵氣。生於五大。從於五大。生貪欲瞋恚等諸煩惱。於是流轉生老病死。憂悲苦惱。太子曰。我今已知汝之所說。生死根本。復何方便而能斷之。仙人答言。欲斷此生死本。先當出家。修持戒行。謙卑忍辱。住空閑處。修習禪定。離欲惡不善法。有覺有觀。得初禪。除覺觀。定生入喜心。得第二禪。捨喜心。得正念。具根樂。得第三禪。除苦樂。得淨念。入捨根。得第四禪。獲無想報。別有一師。說如此處。名爲解脫。從定覺已。然後方知非解脫處。離色想入空處。滅有對想入識處。滅無量想識。唯觀一識。入無所有處。離於種種相。入非想非非想處。斯處名爲究竟解脫。太子欲斷生老病死患者。應當修學如此之行。太子聞仙人言。以所見非究竟處。卽問曰。非想非非想處。爲有我也。爲無我也。若言無我。不應言非想非非想。若言有我。我爲

有知。我爲無知。我若無知。則同木石。我若有知。則有攀緣。既有攀緣。則有染著。以染著故。則非解脫。汝以盡於麤結。而不知細結猶在。以是之故。謂爲究竟。細結滋長。復受下生。以此故。知非度彼岸。若能除我及我想。一切盡捨。是則名爲眞解脫也。仙人默然。心自思惟。太子所說。甚爲深妙。次至迦蘭所住之處。論議問答。亦復如是。

太子既調伏阿羅邏迦蘭二仙人。即便前進至伽闍山苦行林中。是憍陳如等五人所止住處。卽於尼連禪河側。靜坐思惟。觀察衆生根。宜應六年苦行。而以度之。於是便修苦行。諸天奉獻麻米。太子爲求正眞道故。淨心守戒。日食一麻一米。設有乞者。亦以施之。爾時憍陳如等五人。見太子修苦行。憍陳如等亦修苦行。供奉太子。不離其側。遣一人馳還白王。王更使車匿領千乘資糧。至太子所。太子答車匿言。我逆親捨國。遠來在此。爲求至道。云何當復受此餉也。車匿見太子不受資供。乃別覓一人。領千乘返。

王。而自留侍太子。不離晨夕。此釋迦出家苦行求道之大略也。

第四節 釋迦成道

釋迦修苦行久。心自念言。我今日食一麻一米。乃至七日食一麻米。身形消瘦。有若枯木。修於苦行。垂滿六年。不得解脫。故知非道。不如昔在閻浮樹下。所思惟法。離欲寐靜。是最真正。今我若復以此羸身而取道者。彼諸外道。當言自餓。是般涅槃。因我當受食。然後成道。卽從座起。至尼連禪河。入水洗浴。洗浴既畢。身體羸瘦。不能自出。天神來下。爲捺樹枝。得攀出池。淨居天使牧牛女。供上乳糜。釋迦食之。身體光悅。氣力充足。堪受菩提。時僑陳如五人。既見此事。驚而怪之。謂爲退轉。各還所住。釋迦獨行。趣畢波羅樹。自發歎言。坐彼樹下。我道不成。要終不起。釋迦德重。地不能勝。於時步步地爲震動。出大音聲。卽自思惟。過去諸佛。以何爲座。成無上道。卽便自知。以草爲座。釋提桓因。化爲凡人。執淨軟草。授與釋迦。乃敷以爲座。而

於草上結跏趺坐。且自誓言。不成正覺。不起此座。發此誓時。天龍鬼神。皆悉歡喜。清涼好風。從四方來。禽獸息響。風不鳴條。游雲飛塵。皆悉澄淨。知是釋迦必成道相。

釋迦坐閻浮樹下四十八日。觀樹思惟。感動天地。六反震動。演大光明。覆蔽魔宮。是時波旬魔王。懼釋迦成道。屢欲壞之。經論記釋迦降魔爭戰之事。多奇誕可喜者。蓋釋迦既已摧伏魔軍。然後成道也。今略掇錄之。

受胎經云。爾時波旬臥寐。夢中見三十二變。宮殿闇冥。宮殿汗泥。入於邪徑。池水枯竭。樂器破壞。閻父厭鬼。頭皆墮地。諸天捨去。不從其教。凡三十二夢文多不

載從夢而起。恐怖毛豎。召會大臣。及諸兵衆。說夢所見。以何方便而往伏之。并召千子。共五百子導師等。信樂菩薩。其五百子惡目等。隨魔所教。魔王憤亂。告其四女。一名欲妃。二名悅彼。三名快觀。四名見從。汝往詣彼。亂其淨行。女詣菩薩。綺語作姿。三十有二姿。上下唇口。嫵媚細視。現其胫腳。

露其手臂。作鳧鴈鴛鴦哀鸞之聲。

凡三十二態
文多不載

魔女善學女幻迷惑之業。而

自言曰。我等生在盛時。天女端正。莫踰我者。願得晨起夜寐。供事左右。菩薩答曰。汝有宿福。受得天身。形體雖好。而心不端。革囊盛臭。而來何爲。去吾不用。其魔王女。化成老母。不能自復。卽還魔所。

觀佛三昧經曰。魔王大怒。徧勅六天。并諸八部。往瞿曇所。是時諸鬼猶如雲起。或有諸鬼。首如牛頭。頭四十耳。耳生鐵箭。火燄上起。復有諸鬼。首如狐頭。有十千眼。聲如霹靂。曠野鬼神大將軍等。一頸六頭。胸有六面。膝頭兩面。體毛如箭。奮身射人。張眼爛赤。血出流下。疾走而到。魔告諸鬼。瞿曇善人。或能知呪。當興四兵。化作四兵。列狀如林。甚可怖畏。直從空下。至道樹邊。魔復更念。此衆或不能降伏。瞿曇復脫寶冠。擬地。當閻羅王宮上。告勅諸鬼。汝等獄卒及閻羅王。阿鼻地獄。刀輪劍戟。火車爐炭。一切都舉。向閻浮提。魔王震吼。勅諸兵衆。速害瞿曇。上震大雷。雨熱鐵丸。刀輪武器。交

橫空中。然其火箭。不近菩薩。是時菩薩徐舉眉間毫。擬阿鼻地獄。令罪人見。白毫流水。注如車軸。大火暫滅。自憶前世所作諸罪。心得清涼。稱南無佛。以是因緣。受罪畢訖。直生人中。魔見是相。憔悴愁惱。忽然還宮。白毫直至六天。見白毫孔。諸寶蓮華。過去七佛。在其華上。如是白毫。上至無色。徧照一切。如玻璃鏡。八萬四千天女。視波旬身。狀如焦木。但瞻菩薩白毫相。光無數。天子天女。皆發無上菩提道意。時魔王自前。與佛相難。菩薩以智慧力。伸手按地。應時地動。魔與官屬。顛倒而墮。已降魔怨。成正真覺。爾時菩薩在於樹下。發大誓言。時天龍八部。皆悉歡喜。於虛空中。踊躍讚歎。時第六天魔王宮殿。自然動搖。於是魔王心大懊惱。精神躁擾。聲味不御。而自念言。沙門瞿曇。今在樹下。捨於五欲。端坐思惟。不久當成正覺之道。其道若成。廣度一切。超越我境。及道未成。往壞亂之。爾時魔子薩陀。見父憔悴。而往白言。不審父王何故憂感。魔王答言。沙門瞿曇。今坐樹下。其道將

成。超越於我。今欲壞之。魔即便前諫。父言。菩薩清淨。超出三界。神通智慧。無不明了。天龍八部。盛共稱讚。此非父王所能摧屈。不煩造惡。自招禍咎。瑞應本起云。於是魔王手執強弓。又持五箭。男女眷屬。俱時往彼。畢波羅樹下。見於牟尼。寐然不動。欲度生死三有之海。爾時魔王左手執弓。右手調箭。語菩薩言。汝利利種。死甚可畏。何不速起。宜應修汝轉輪王業。捨出家法。習於施會。得生天樂。此道第一。先聖所行。汝是利利轉輪王種。而爲乞士。此非所應。今若不起。但好安坐。勿捨本誓。我試射汝。一放利箭。苦行仙人聞我箭聲。莫不驚怖。昏迷失性。况汝瞿曇。能堪此毒。汝若速起。可得安全。魔說此語。以怖菩薩。菩薩怡然而不動。魔王即便挽弓放箭。并進天女。菩薩爾時眼不視箭。箭停空中。其鏃下向。變成蓮華。又曰。魔王既見如是堅固。心自思惟。我昔曾於雪山之中。射摩醯首羅。即便恐懼。退其善心。而今不能動於瞿曇。既非此箭及我三女所能移轉。令生愛恚。當復

更作他餘方便。卽以軟語誘菩薩言。汝若不樂人間受樂。今者便可上昇天宮。我捨天位及五欲具。悉持與汝。菩薩答言。汝於先世修少施因。今故得爲自在天王。此福有期。還要下生。沈溺三塗。出濟甚難。此爲罪因。非我所須。魔語菩薩。我之果報。是汝所知。汝之果報。誰後知者。菩薩答言。我之果報。唯此地知。說此語已。於時大地六種震動。於是地神持七寶餅。滿中蓮華。從地踊出。而語魔言。菩薩昔以頭目髓腦。以施於人。所出之血。浸潤大地。國城妻子象馬珍寶。而用布施。不可稱計。爲求無上正真之道。以是之故。汝今不應惱亂菩薩。魔聞是已。心生怖懼。身毛皆豎。

雜寶藏經云。昔如來在菩提樹下。惡魔波旬。將八十億衆。欲來壞佛。至如來所。而作是言。瞿曇。汝獨一身。何能坐此。急可起去。若不去者。我提汝腳。擲著海水。佛言。我觀世間。無能擲我著海水者。（中略）汝今先動此澡餅。然後可能擲我海水。爾時波旬及八十億衆。不能令動。魔王軍衆顛倒。

白墮。破壞星散。爾時魔王卽自思惟。我以強弓利箭。并及三女。兼以方便。和言誘之。不能壞亂此瞿曇心。今當更設諸種方便。廣集軍衆。以力迫脅。作是念時。其諸軍衆。忽然來至。充滿虛空。形貌各異。或執戟操劍。頭戴大樹。手執金杵。種種戰具。皆悉備足。或猪魚驢馬。師子龍頭。熊羆虎兕。及諸獸頭。或一身多頭。或面各一目。或衆多目。或大腹長身。或羸瘦無腹。或長腳大膝。或大腳肥腩。或長牙利爪。或頭在胸前。或兩足多身。或大面傍面。或色如灰土。或身放煙焰。或象身擔山。或披髮裸形。或復面色半赤半白。或唇垂至地。或上褰覆面。或身著虎皮。或師子蛇皮。或蚊徧纏身。或頭上火然。或瞋目努臂。或旁行跳擲。或空中宛轉。或馳步吼嚇。有如是等諸惡類形。不可稱數。圍繞菩薩。或有欲裂菩薩身。或四方煙起。炎焰衝天。或狂音奮發。震動山谷。風火煙塵。暗無所見。四大海水。一時涌沸。護法天人。諸龍鬼等。悉忿魔衆。瞋恚增盛。毛孔血流。淨居天衆。見此惡魔。惱亂菩薩。以

慈悲心而愍傷之。於是來下。側塞虛空。見魔軍衆。無量無邊。圍繞菩薩。發大惡聲。震動天地。菩薩心定。顏無異相。猶如師子。處於鹿羣。皆悉歎言。嗚呼奇哉。未曾有也。菩薩決定當成正覺。是諸魔衆。互相摧切。各盡威力。摧破菩薩。或角目切齒。或橫飛亂擲。菩薩觀之。如童子戲。魔益忿怒。更增戰力。菩薩以慈悲力故。令抱石者不能勝舉。其勝舉者不能得下。飛刀舞劍。停於空中。雷電雨火。成五色華。惡龍吐毒。變成香風。諸惡類形。欲毀菩薩。不能得動。又曰。魔心慚愧。捨離憍慢。即便復道。還歸本宮。羣魔憂感。悉皆崩散。情意沮悴。無復威力。諸戰鬥具。縱橫林野。當於惡魔退散之時。菩薩心淨。湛然不動。天無烟霧。風不搖條。落日停光。倍更明盛。澄月映徹。衆星燦朗。幽隱暗冥。無復障礙。虛空諸天。雨妙華香。作衆妓樂。供養菩薩。已上並述釋迦降魔之事。因果經曰。菩薩以慈心力。於二月七日夜。降伏魔已。放大光明。即便入定。思惟真諦。於諸法中。禪定自在。悉知過去所造

善惡。從此生彼父母眷屬。貧富貴賤。壽命長短。及名姓字。皆悉明了。卽於衆生大起悲心。而自念言。一切衆生。無救濟者。輪迴五道。不知出津。皆悉虛僞。無有真實。而於其中。橫生苦樂。作是思惟。至中夜盡。瑞應本起云。是日初夜得一術闍。自知宿命。無數劫已來精神所更。展轉受身。不可計數。皆識知之。至二夜時。得二術闍。悉知衆生心中所念善惡殃福。生死所趣。至三夜時。得三術闍。漏盡結解。自知本昔久所習行。四神足念。精進定。欲定。意定。戒定。變化法。所欲如意。不復用思。身能飛行。能分一身。作百作千。至億萬無數。復合爲一。能徹入地。石壁皆過。從一方現。俯沒仰出。譬如水波。能中出水。履水行虛。身不陷墜。坐臥空中。如飛鳥翔。立能及天。手捫日月。涌身平立。至梵自在。眼能徹視。耳能洞聽。意預知諸天人龍鬼神。蚊行蠕動之類。身行口意言。心所欲念。悉見聞知。諸有貪媠無貪媠者。有瞋恚無瞋恚者。有愚癡無愚癡者。有愛欲無愛欲者。有大志行無大志行者。有

內外行無內外行者。有念善不念善者。有一心無一心者。有解脫意無解脫意者。一切悉知。菩薩觀天上、人中、地獄、畜生、鬼神、五道。先世父母兄弟妻子。中外姓字。一一分別。一世十世百千億萬無數世事。至於知天地一切崩壞空荒之時。一切始成人物興時。能知十劫百劫。至於千萬億無數劫中。內外姓字。衣食苦樂。壽命長短。死此生彼。展轉所趣。從上頭始諸所更身。生長老終。形色好醜。賢愚苦樂。一切三界。皆分別知。見人魂神各自隨行。生五道中。或墮地獄。或墮畜生。或作鬼神。或生天上。或入人形。有生豪貴富樂家者。有生卑鄙貧賤家者。知衆生惑。五陰自蔽。一色像。二痛癢。三思想。四行作。五魂識。皆習五欲。眼貪色。耳貪聲。鼻貪香。舌貪味。身貪細滑。爲愛欲所牽。惑於財色。思望安樂。從是生諸惡本。從惡致苦。能斷愛習。不隨嬌心。大如毛髮。受行八道。則終苦滅。譬如無薪。亦復無火。是謂無爲度世之道。菩薩自知已棄惡本。無嬌怒癡。生死已除。根種悉斷。無餘栽蘖。

所作已成。智慧已了。明星出時。霍然大悟。得無上正真之道。爲最正覺。得佛十八法。有十神力。四無所畏。

更綜諸經所說。釋迦將成道時。中夜卽得天眼。先觀世間衆生。種類無量。死此生彼。隨行善惡。受苦惡報。次觀人身不淨。自入胎出胎。著於五欲。不能斷顛倒根本。次觀諸天。福盡之時。五死相現。

一頭上花莖二眼瞬三身上光
滅四腋下汗出五自然離本座

仙道之報皆
生諸天類

或墜三惡道。不免生死之苦。至中夜盡。觀衆生性。以何而有老

死。卽知老死以生爲本。若離於生。則無老死。又復此生不從天生。不從自
生。非無緣生。從因緣生。因於欲有色。有無色。有業生。又觀三有業從何而
生。卽知三有業從四取生。又觀四取從何而生。卽知四取從愛而生。又復
觀愛從何而生。卽便知愛從受生。又復觀受從何而生。卽便知受從觸而
生。又復觀觸從何而生。卽便知觸從六入生。又觀六入從何而生。卽知六
入從名色生。又觀名色從何而生。卽知名色從識而生。又復觀識從何而

生。即便知識從行生。又復觀行從何而生。即便知行從無明生。若滅無明。則行滅。行滅則識滅。識滅則名色滅。名色滅則六入滅。六入滅則觸滅。觸滅則受滅。受滅則愛滅。愛滅則取滅。取滅則有滅。有滅則生滅。生滅則老死憂悲苦惱滅。如是逆順觀十二因緣。夜分破於無明。明星出時。得智慧光。斷於習障。成一切種智。蓋釋迦成道。在坐於樹下之第四十九日明星出時也。即二月八日。亦有云四月八日。或云七月十五日者。是時釋迦降生三十五歲矣。

第五節 釋迦初說法及感化記

釋迦既坐樹下成道。於七日中。一心思惟。我在此處。盡一切漏。所作已竟。本願成滿。我所得法。甚深難解。唯佛與佛。乃能知之。一切衆生。於五濁世。爲貪欲瞋恚愚癡邪見。憍慢諂曲之所覆障。薄福鈍根。無有智慧。云何能解我所得法。今我若爲轉法輪者。彼必迷惑。不能信受。而生誹謗。當墮惡

道。受諸苦痛。我寧默然。入般涅槃。爾時大梵天王。見釋迦聖果已成。默然而住。不轉法輪。心懷憂惱。乃往請曰。世尊往昔。爲衆生故。久住生死。捨身頭目。以用布施。備受諸苦。廣修德本。始於今者。成無上道。云何默然而不說法。衆生長夜。沒溺生死。墮無明暗。出斯甚難。然有衆生。過去世時。親近善友。植諸德本。堪任聞法者。唯願世尊。爲斯等故。以大悲力。轉妙法輪。釋提桓因。亦勸請釋迦說法。至於再三。釋迦始應之。

釋迦因念於何處而轉法輪。當在波羅奈仙人住處鹿苑之中。蓋鹿苑爲釋迦初說法之地也。釋迦宿世以來。曾於其中。建立法祠。供養億萬諸佛。以是因緣。故先就彼說法。又念當爲誰人第一說法。彼阿羅邏迦蘭二仙人。聰慧易悟。又先發願。道成度我。惟近適命終。昔父王遣五人。俱侍衛我。經歷勤苦。我今寧可爲其先說。於是從樹下起。尋時舉身。告於三千大千世界。皆使知之。至波羅奈。詣五人所。

釋迦起行。四天王卽獻石鉢受食。路逢一外道。名優波伽。見如來相好莊嚴。諸根寂靜。歎爲奇特。以爲必到解脫地。乃問其姓字。釋迦答以偈曰。

我今已超出。一切衆生表。微妙深遠法。我今已具足。

三毒五欲境。永斷無餘習。如蓮華在水。不染濁水泥。

自悟八正道。無師無等侶。如清淨智慧。降伏大力魔。

今得成正覺。堪爲天人師。身口意滿足。故號爲牟尼。

欲越波羅奈。轉甘露法輪。是天人魔梵。所可不能轉。

此事見因果經、中阿含經、方廣大莊嚴經等。釋迦自號牟尼。始見於此。釋迦牟尼 Sakyamuni 者。釋迦是姓。牟尼是字。釋迦本意爲能仁。牟尼本意爲寂默也。釋迦次行至阿闍婆羅水側。日暮止宿入定。當於爾時。七日風雨。彼水中有大龍王。名眞鄰陀。見佛入定。卽以其身繞圍七匝。滿七日已。化爲人形。作禮問曰。世尊在此七日中。不至甚患風雨也。釋迦答之以偈。復

告龍王。汝當自歸於佛。自歸於法。自歸於比丘僧。卽受三自歸。諸畜生中。是龍爲先見佛。

釋迦卽復前往波羅奈國。至憍陳如摩訶男婆沙波阿說示跋提等五人所止處。五人遙見佛來。共相謂言。沙門瞿曇棄捨苦行而還。退受飲食之樂。無復道心。今旣來此。我等不須起迎。亦勿作禮。若欲坐者。自隨其意。語竟默然。及釋迦旣至。五人不覺各從座起。禮拜奉迎。互爲執事。有爲持衣鉢者。有取水供盥漱者。有爲澡洗脚者。各違本誓。猶故稱以瞿曇。釋迦乃語憍陳如言。汝等共約見我不起。今者何故違先所誓。五人聞言。深生慚愧。釋迦又言。汝等云何於無上尊。而以高情稱喚姓也。我心如空。於諸毀譽無所分別。但汝惰慢。自招惡根。譬如有子。稱父母名。於世儀中。猶尙不可。況我今是一切父母。此時五人倍加慚愧。因白佛言。我等愚癡。無有慧識。不知今者已成正覺。往見如來日食麻米。苦行六年。而今還受飲食之

樂。是以謂爲不得道。釋迦語曰。汝等莫以小智。輕量我道。成與不成。何以故。形在苦者。心則惱亂。身在樂者。情則樂著。是以苦樂兩非道因。譬如鑽火。澆之以水。則必無有破暗之照。鑽智慧火。亦復如是。有苦樂水。慧光不生。以不生故。不能滅于生死黑障。今者若能棄捨苦樂。行於中道。心則寂定。堪能修彼八正聖道。（按八正道卽正見、正思惟、正語、正業、正命、正精進、正念、正定）離於生老病死之患。我已隨順中道之行。得成阿耨多羅三藐三菩提。時彼五人。旣聞此心大歡喜。

釋迦觀五人根。堪任爲道。而語之言。憍陳如。汝等當觀五盛陰苦。生苦老苦。病苦死苦。愛別離苦。怨憎會苦。所求不得苦。失榮樂苦。憍陳如有形無形。無足一足。二足。四足。多足。一切衆生。無不悉有如此苦者。譬如以灰覆於火上。若遇乾草。還復燒然。如是諸苦。由我爲本。若有衆生。起微我想。還復更受如此之苦。貪欲瞋恚。及以愚癡。皆悉緣我根本而生。又此三毒。是

諸苦因。猶如種子。能生於芽。衆生以是。輪迴三有。若滅我想。及貪瞋癡。諸苦亦皆從此而斷。莫不悉由彼八正道。如人以水。澆於盛火。一切衆生。不知諸苦之根本者。皆悉輪迴。在於生死。憍陳如苦應知。集當斷。滅應證。道當修。（卽四諦）憍陳如。我已知苦。已斷集。已證滅。已修道。故得阿耨多羅三藐三菩提。是故汝今應當知苦。斷集。證滅。修道。若人不知四聖諦者。當知是人不得解脫。四聖諦者。是真是實。苦實是苦。集實是集。滅實是滅。道實是道。因問憍陳如。汝等解未。答言。已解。已知。以於四諦得解。知故。故名阿若憍陳如。當三轉四諦十二行法輪時。阿若憍陳如於諸法中。遠離塵垢。得法眼淨。阿若憍陳如於弟子中。以始悟故。爲第一弟子。乃重爲四人廣說四諦。四人亦於諸法中。遠離塵垢。得法眼淨。五人已見道跡。欲依佛法出家修道。鬚髮自落。袈裟著身。卽成沙門。爾時釋迦問彼五人。汝等比丘。知色受想行識。爲是常。爲無常也。爲是苦。爲非苦也。爲是空。爲非空。

也。爲有我。爲無我也。時五比丘。聞佛說是五陰法已。漏盡意解。成阿羅漢果。卽便答言。世尊。色受想行識。實是無常苦空無我。於是世間始有六阿羅漢。佛阿羅漢。是爲佛寶。四諦法輪。是爲法寶。五阿羅漢。是爲僧寶。如是世間三寶具足。爲諸天人第一福田。

時有長者子。名曰耶舍。聰明利根。極大巨富。服天冠瓔珞。著無價寶屐。中夜與諸妓女娛樂寢息。忽從眠覺。見諸妓女。或伏臥。或仰眠。頭髮鬢亂。涎唾流出。生厭離心。曰苦哉苦哉。趣鹿野苑。詣釋迦所。見釋迦三十二相八十種好。顏容挺特。威德具足。五體投地。頂禮求救。釋迦卽隨順其根。爲說法曰。色受想行識。無常苦空無我。汝知之不。耶舍聞語。卽於諸法遠離塵垢。得法眼淨。於是又爲重說四諦。漏盡意解。心得自在。成阿羅漢果。卽答釋迦言。色受想行識。實是無常苦空無我。爾時釋迦見耶舍著嚴身具。乃說偈曰。

雖復處居家。服寶嚴身具。善攝諸情根。厭離於五欲。
若能如此者。是爲真出家。身雖在曠野。服食於麤澀。
意猶貪五欲。是爲非出家。一切造善惡。皆從心想生。
是故真出家。皆以心爲本。

耶舍聞偈。卽脫七寶服。請釋迦願聽出家。鬚髮自落。袈裟著身。耶舍之父。尋覓耶舍。至釋迦所。釋迦因爲說法。卽於佛前受三白歸。於閻浮提中。惟此長者爲優婆塞。耶舍之母及妻。亦得聞法。皈依三寶。爲優婆夷。耶舍朋類五十長者子。聞耶舍出家。並來禮佛。求爲沙門。釋迦爲說四諦法。漏盡意解。皆成阿羅漢果。於是始有五十六阿羅漢。釋迦諭其各游方教化。以慈悲心。廣諸衆生。此釋迦成道後。初在鹿苑。轉四諦法輪。與其感化之略也。

釋迦在鹿苑說法之後。卽往摩竭提國王舍城中。度諸人民。先是婆羅門

外道中。有事火者。以火爲萬物之源。常住不滅。爲涅槃因。當時此派盛行。而三迦葉尤有名。故因果經曰。爾時世尊即便思惟。我今應度何等衆生。而能廣利一切人天。唯有優樓頻螺迦葉兄弟三人。在摩竭提國。學於仙道。國王臣民。皆悉歸信。又其聰明。利根易悟。然其我慢。亦難摧伏。我今當往而度脫之。

釋迦自波羅奈趣摩竭提。日將昏暮。至優樓頻螺迦葉住處。於時迦葉忽見釋迦相好莊嚴。心大歡喜。卽問年少沙門。從何而來。釋迦答言。當詣摩竭提。求寄一宿。迦葉言。諸房舍悉弟子住。唯有石室極寂淨。我事火具皆在其中。此可相容。但見有惡龍居內。恐相害耳。釋迦言。但以見借。必無辱也。卽於其夕入石室。惡龍毒心轉盛。舉體烟出。釋迦卽入火光三昧。龍作火焰衝天。焚燒石室。迦葉弟子亟白其師。彼年少沙門。聰明端嚴。乃燔於龍火。迦葉驚起。勅弟子以水澆之。火更熾盛。石室融盡。釋迦在火中身心

不動容顏怡然。且降惡龍。使無復毒。授三歸依。置鉢中。天明迦葉師來視。釋迦曰。昨不以室相借。正慮爲彼所傷。釋迦言我內清淨。豈外灾能害。舉鉢中毒龍示迦葉。迦葉心歎。未有語弟子曰。年少沙門誠神通。然故不如我道真也。

釋迦告迦葉。仍欲留止。迦葉曰。善哉隨意。及第二夜。釋迦坐一樹下。四天王來聽法。光明照踰日月。迦葉夜見天光。語弟子彼沙門亦事於火。詰旦造問。沙門汝事火也。釋迦言不也。夜四天王來聽法。是其光耳。迦葉語弟子。年少沙門有大神法。然故不如我道真也。

至第三夜。釋提桓因來聽法。第四夜。大梵天王來聽法。並有光明。如日正中。迦葉見詣釋迦。汝定事火。佛告以故。迦葉自念。年少沙門雖復神妙。故不如我道真也。

時迦葉五百弟子。各事三火。晨朝俱然。火不肯然。迦葉念是彼年少沙

門所爲。卽與弟子至釋迦所。釋迦曰。汝還火當自然。及還火果已然。乃供養火畢。不能令滅。迦葉又詣釋迦。釋迦曰。汝還火當自滅。及還火果已滅。迦葉又自事三火。初不肯然。然復不肯滅。造問如前。迦葉自念。年少沙門。雖復神妙。故不如我道真也。

於是迦葉卽白釋迦。年少沙門。夏止住此。共修梵行。房舍衣食。我當相給。釋迦默然許之。迦葉卽勅。日日辦好飲食。至明食時。自請釋迦。釋迦言。汝先去。我後卽至。迦葉適去。釋迦以神力至閻浮洲界。取閻浮果。滿鉢持來。迦葉未至。釋迦先到。迦葉便問。年少沙門。從何道來。乃先至此。釋迦示以鉢中果。問頗識之否。答言不識。乃告以此閻浮提果也。去此數萬里。吾於一念頃取來。香美可噉。迦葉思惟。彼道去此。極爲長遠。而此沙門。俄爾卽得還往。神通變化。殊自迅疾。然故不如我道真也。自後食時。釋迦每至。四天下取果。恆先迦葉至食所。釋迦欲化迦葉。故說呪曰。

婆羅門法中。奉事火爲最。一切衆派中。大海爲其最。

於諸星宿中。月光爲其最。一切光明中。日光爲其最。

於諸福田中。佛福田爲最。若欲求大果。當供佛福田。

一日釋迦食畢。獨還樹下。心念須水。釋提桓因。知釋迦意。卽從天下。至釋迦前。以手指地成池。其水清涼。具八功德。用供澡漱。他日釋迦見糞中幣。取拾浣濯。心念須石及槽盛水。釋提桓因。卽爲化致諸物。迦葉詣釋迦所。見樹間忽有池水。方石及大石槽。怪問所至。釋迦具說其故。迦葉聞已。以未曾有。而自念言。年少沙門。雖有如是至大神威力。然故不如我道真也。

爾時迦葉心自念言。明日摩竭提王。及諸臣民婆羅門。長者居士等。當來就我作七日會。若見此沙門相好神通。必當捨我而奉事之。願此沙門。七日中不來我所。釋迦知其意。卽便詣北鬱單越。七日七夜。會畢國王旣去。

迦葉心念年少沙門果七日不來。今有集會餘饌。欲以供之。念已。釋迦忽卽至前。迦葉驚喜。問此七日游行何處。釋迦答言。我知國王在此集會。汝心不欲見我。故避汝至北鬱單越。今汝又念我。故卽來耳。迦葉聞言。心驚毛豎。謂此沙門。乃知我意。然故不如我道真也。

釋迦欲調伏迦葉。如是變化。凡十有八。迦葉復念。是大沙門。神則神矣。然不如我已得羅漢也。釋迦卽語迦葉。汝非羅漢。亦復非是阿羅漢道。汝今何故起大我慢。迦葉聞言。愧懼。白釋迦言。如是沙門。如是大仙。善知我心。唯願攝受於我。釋迦答言。汝年已老。多有弟子。國人所敬。若決入我法。宜先共弟子熟詳。乃可。迦葉歸與弟子。議曰。年少沙門住此以來。其神通變化甚奇。智慧深遠。性又安詳。我今便欲歸依其法。汝等云何。弟子答言。我等亦見有諸異。尊者如受其法。我等亦願隨從歸依。於是與五百弟子。俱詣佛所。出家聽法。釋迦爲廣說四諦。並至漸漸得阿羅漢果。爾時迦葉及

其弟子。以其事火種種之具。悉皆捐棄。尼連禪河。迦葉二弟。一名那提迦葉。二名伽闍迦葉。各有二百五十弟子。住尼連禪河側。忽見事火諸具。隨流而來。大驚有不祥事。便馳往兄所。迦葉具爲說釋迦神變妙法。皆率弟子同來皈依。釋迦又爲說四諦。亦終各得阿羅漢果。

釋迦既調伏三迦葉。心自念言。摩竭提王頻婆娑羅。往昔於我有約誓言。若道成者。願先見度。今日時至。卽應往彼。滿其本願。於是卽與迦葉兄弟。及千比丘。往王舍城。詣頻婆娑羅王所。王素禮事迦葉。今聞迦葉及其弟子。悉爲沙門。心大驚怪。釋迦漸近王舍城。迦葉乃遣常所使人白王。王卽勅嚴駕。與諸大臣婆羅門及人民衆。往迎釋迦。至杖林外。王卽下轡。除去儀飾。遙見釋迦相好莊嚴。弟子圍繞。行步踴悅。至釋迦前。禮拜就坐。迦葉遂現諸神變。具說釋迦威德。是天人師。今故棄捨火具。而來皈依。衆人審知迦葉是佛弟子。深生敬信。

釋迦見大衆心意決定。無復狐疑。又觀其根皆已成熟。卽爲頻婆娑羅王。說法曰。大王當知此五陰身。以識爲本。因於識故。而生意根。以意根故。而生於色。而此色法。生滅不住。大王若能如是觀者。則能於身善知無常。如此觀身。不取身相。卽能離我。及於我所。若能觀色。離我我所。卽知色生。便是苦生。若知色滅。便是苦滅。若人能作如是觀者。是名爲解脫。若人不能作斯觀者。是名爲傳。法本無我。及以我所。以倒想故。橫計有我。及以我所。無有實法。若能斷此倒惑想者。卽是解脫。爾時頻婆娑羅王。心自思惟。若謂衆生言有我者。而名爲傳。一切衆生。皆悉無我。旣無有我。誰受來報。爾時釋迦心知彼念。卽更說曰。一切衆生所爲善惡。及受果報。皆非我造。亦非我受。而今見有造作善惡。受果報者。但以情塵識合。於境生染。累想滋繁。以是緣故。馳流生死。備受苦報。若於境無染。息其累想。卽得解脫。以情塵識。三事因緣。共起善惡。及受果報。更無別我。譬如鑽火。因手轉燧。得有

火生。然彼火性。不從手生。及以燧出。亦復不離手。及燧鑽。彼情塵識。亦復如是。時頻婆娑羅。又自思惟。若以情塵識和合故。而有善惡受果報者。便爲常合。不應離絕。若不常合。是卽爲斷。爾時釋迦知王心念。卽便答言。此情塵識。不常不斷。何以故。合故不斷。離故不常。譬如緣於地水。因彼種子而生芽葉。種子旣謝。不得名常。生芽葉故。不得名斷。離於斷常。故名中道。三事因緣。亦復如是。頻婆娑羅王聞此法已。心開意解。於諸法中。遠離塵垢。得法眼淨。因頂禮白釋迦言。世尊能捨轉輪王位。出家學道。成一切種智。我昔愚癡。欲留世尊。臨治小國。今觀慈顏。又聞正法。方懷慚愧。追悔昔過。昔日曾請世尊。得道願先度我。今日宿願成遂。得履道跡。我從今日。供養世尊。及諸比丘。當令四事。不使有乏。唯願世尊住於竹園。令摩竭提國。長夜獲安。釋迦許之。遂住竹園。（按此竹園本是摩竭提國中長者迦陵所有。故又名曰迦陵竹園。迦陵之園在國中爲最勝。自願上佛。王又爲起

堂舍設諸莊飾。以處釋迦僧衆也。

時王舍城中。有二婆羅門。聰明利根。有大智慧。於諸書論。無不通達。辨才語議。莫能摧伏。一姓拘栗。名優婆室沙。母姓舍利。故舉世喚爲舍利弗。二姓目犍連。名目犍羅夜那。各有一百弟子。普爲國人之所宗仰。二人互相友重。咸共誓言。若先得聞妙法者。要相開悟。無得吝惜。會比丘阿捨婆耆。入村乞食。舍利弗與之邂逅途次。見其善攝諸根。威儀詳序。心大歡喜。停步瞻視。即便問言。我觀汝似新出家。而能如此攝諸情根。汝今大師。其名何等。演說何法。比丘答言。我之大師。甘蔗種姓。天人之師。我年幼學道日淺。豈能宣說妙法。然所知者。亦可相告。即說偈曰。

一切諸法本。因緣生無主。若能解此者。則得真實道。

時舍利弗聞此偈言。心身豫悅。即見道跡。因念一切衆生。悉著於我。所以輪迴生死。若除我想。即於我所。亦皆得離。譬如日光。能破於暗。無我之想。

亦復如是。悉能破於我見暗障。我從昔修學。皆爲邪見。唯今所得。是真正道。乃禮比丘。還歸所止。具以告目犍羅夜那。並述偈言。目犍羅夜那。亦有所會。乃共相謂曰。今宜同往佛處。求索出家。各召弟子而語之曰。我等今者。已於佛法得甘露味。便欲見佛出家。汝等云何。皆曰。師若出家。我等悉從。於是二人將二百弟子。往詣竹園。釋迦見二人來。卽告諸比丘。來者二人。將於我法中爲上弟子。舍利弗於智慧中最爲第一。目犍羅夜那。於神通中。復爲無上。二人便陳出家之志。鬚髮自落。袈裟著身。卽成沙門。諸弟子亦並出家。釋迦更爲廣說四諦。俱成阿羅漢果。至是釋迦乃有一千二百五比丘。皆大阿羅漢。於摩竭國。廣利衆生。諸比丘中。多有人名目犍羅夜那。釋迦故名此目犍羅夜那。爲大目犍羅夜那。

偷羅厥義國。有一婆羅門。名曰迦葉。有三十二相。聰明智慧。誦四毗陀經。一切書論。無不通達。極爲巨富。善能布施。其婦端正。舉國無雙。二人自然

無有欲想。乃至亦不同宿一室。久於往昔種善根故。不樂在家受五欲樂。日夜思惟。厭離世間。精勤求訪出家之法。如是推尋。不能得已。卽捨家事。出於山林。心念口言。諸佛如來。出家修道。我今亦當隨佛出家。卽便著壞納衣。自剃鬚髮。爾時諸天於虛空中。見迦葉自出家。而語之言。甘蔗種族。白淨王子。其名薩婆悉達。出家學道。成一切種智。舉世號爲釋迦牟尼佛。今與千二百五十阿羅漢。在王舍城竹園中住。迦葉聞天語已。歡喜踊躍。卽趣竹園。釋迦知其當來。自往逆之。迦葉遂稱弟子。釋迦爲說當知五受陰身。是大苦聚。迦葉聞說。卽便見諦。乃至得於阿羅漢果。此迦葉有大威德。智慧聰明。是故名之爲大迦葉。

釋迦在鹿苑唯說四諦。及在摩竭提說法。則兼顯示法無我之旨。普曜經云。佛未入摩竭國時。國民豐富饒美。飲食作樂。倡妓常歡。不廢夙夜游戲。佛適入國。羅閱祇城。晝夜寂寞。誦聲濟濟。齋戒讀經。捨世俗樂。如棄糞除。

唯佛是尊。聽經行法。不捨三寶。蓋自釋迦弘法竹園。王舍城風氣一變矣。

第六節 釋迦還鄉

普曜經曰。白淨王聞子得佛道。已來六年。心中悲喜。饑虛欲覩。有一梵志名優陀耶。聰明智慧。本侍菩薩。釋迦常得其意。王告優陀。往請迎佛。別澗已來。十有二年。夙夜愁感。不捨其心思。一相見。如復更生。優陀受教。往詣佛所。稽首佛足。具以王意白佛。優陀見佛。諸天釋梵歸化。一切受命。前白佛言。願得出家。以爲沙門。佛言。呼比丘來。頭髮自墮。便成沙門。得羅漢道。佛時所度。其餘前後得道所度。不可稱計。

釋迦因自念言。本與父王要。若得佛道。當還國度父母。今正應還。然還國設無所感動。於事不宜。所化尠少。乃先遣神足弟子優陀耶。往顯現神變。優陀受教。卽飛行至迦比羅城上虛空。現無數變。身上出水。身下出火。水不溼身。火無所傷。七現七變。揚聲頌佛威德。不可勝量。王及臣民。莫不欣

歎。王乃問曰。佛何日當至乎。優陀報曰。却七日到。優陀復返釋迦所。說王意旨。釋迦遂與諸弟子。還迦比羅城。王及臣民。日日供養。王得道證。瞿夷及宮人。大小咸受戒法。月六歲三。奉齋弗懈。國內清寧。民安其所。

釋迦還迦比羅城。住時久暫。及其事蹟。諸經說有參差。大抵度諸從弟出家。又度姨母及子羅云出家。又自迦比羅往王舍城附近之靈鷲山。及白淨泥洹之際。則復返云。

釋迦雖受國中供養。然仍依律持鉢乞食。父王聞之。以太子返國乞食爲恥。自扶病入市。詰之。釋迦答以此過去諸佛之舊習。釋迦并過去六佛稱七佛。過去六佛者。第一毗婆尸佛。出刹帝種。憍陳如姓。第二尸棄佛。亦出憍陳如姓。第三毗舍婆佛。亦憍陳如姓。第四拘留孫佛。出婆羅門種。迦葉姓。第五拘那含佛。亦婆羅門種。迦葉姓。第六迦葉佛。亦迦葉姓。第七卽釋迦也。

釋迦化諸釋族出家。其著者如優波離。阿菟樓陀。提婆達多等。或云阿難陀亦以此時爲弟子。但舉雜寶藏經所記孫陀羅難陀出家事。曰。佛在迦毗羅衛國。入城乞食。到難陀舍。會值難陀與婦作妝。香塗眉間。聞佛門中。欲出外看。婦共要言。出看如來。使我額上妝未乾。頃便復入來。難陀卽出。見佛作禮。取鉢向舍。盛食奉佛。佛不爲取。過與阿難。阿難亦不爲取。阿難語言。汝從誰得鉢。還與本處。於是持鉢詣佛。至尼拘樓精舍。佛卽敕剃師。與難陀剃髮。難陀不肯。怒拳而語剃髮人言。迦毗羅衛一切人民。汝今盡可剃其髮也。佛問剃髮者何以不剃。答言畏故。不敢爲剃。佛共阿難自至其邊。難陀畏故。不敢不剃。雖得剃髮。恆欲還家。佛常將行。不能得去。後於一日。次守房舍。而自歡喜。今真得便。可還家去。待佛衆僧都去之後。我當還家。佛入城後。作是念言。當爲汲水。令滿澡餅。然後還歸。尋時汲水。一餅適滿。一餅復翻。如是經時。不能滿餅。便作是言。俱不可滿。使諸比丘來還。

自汲。我今但著餅屋中。而棄之去。卽閉房門。適一扇閉。一扇復開。適閉一戶。一戶復開。更作是念。俱不可閉。就置而去。縱使失諸比丘衣物。我饒財寶。足有可償。卽出僧房而自思惟。佛必從此來。我則從彼異道而去。佛知其意。亦異道來。遙見佛來。大樹後藏。樹神舉樹在虛空中。露地而立。佛見難陀。將還精舍。而問之言。汝念婦也。答言實爾。卽將難陀向阿那波山上。又問難陀。汝婦端正不。答言端正。山中有一老瞎獼猴。又復問言。汝婦孫陀利面首端正。何如此獼猴也。難陀懊惱。便作念言。我婦端正。人中少雙。佛今何故。以我之婦。比瞎獼猴。佛復將至忉利天上。徧諸天宮。而共觀看。見諸天子與諸天女。共相娛樂。見一宮中。有五百天女。無有天子。尋來問佛。佛言。汝自往問。難陀往問。言諸宮殿中。盡有天子。此中何以獨無天子。諸女答言。閻浮提內佛弟難陀。佛逼使出家。以出家因緣。命終當生於此天宮。爲我天子。難陀答言。卽我身是。便欲卽住。天女語言。我等是天。今汝

是人。還捨人壽。更生此間。便可得住。便還佛所。以如上事。具白世尊。佛語難陀。汝婦端正。何如天女。難陀答言。比彼天女。如瞎獼猴。比於我婦。佛將難陀。還閻浮提。難陀爲欲生天。故勤加持戒。(中略)佛將難陀。復至地獄。見諸鑊湯。悉皆煮人。唯見一鑊。炊沸空停。怪其所以。而來問佛。佛告之言。汝自往問。難陀卽往問獄卒。言。諸鑊盡皆煮治罪人。此鑊何故空無所煮。答言。閻浮提內。有如來弟。名爲難陀。以出家功德。當得生天。以欲罷道。因緣之故。天壽命終。墮此地獄。是故我今炊鑊而待難陀。難陀恐怖。畏獄卒留。卽作是言。南無佛陀。南無佛陀。唯願將我擁護。還至閻浮提內。佛語難陀。汝勤持戒。修汝天福。難陀答言。不用生天。今唯願不墮此獄。佛爲說法。一七日中。成阿羅漢。

釋迦子羅云出家。有說是釋迦初返國時事者。有說是釋迦返國。又去居靈鷲。乃使人乞羅云出家者。今節錄釋迦譜引未曾有經之說於下。

世尊告目犍連。汝今往迦比羅城。問訊我父王。并我姨母。及三叔父斛飯王等。因復慰喻羅睺羅母耶輸陀羅。令割恩愛。放羅睺羅（卽羅云）令作沙彌。修習聖道。所以者何。母子恩愛。歡樂須臾。死墮地獄。母之與子。如不相知。窈窈冥冥。永相離別。受苦萬端。後悔無及。羅睺羅得道。當還度母。永絕生老病死根本。得至羅漢。如我今也。目連卽到迦比羅城。具說佛意。耶輸陀羅答目連曰。釋迦如來爲太子時。娶我爲妻。奉事太子。如事天神。曾無一失。共爲夫婦。未滿三年。捨五欲樂。騰越宮城。逃至王田。王身往迎。違戾不從。返遣車匿白馬令還。自要道成。誓願當歸。被鹿皮衣。譬如狂人。隱居山澤。勤苦六年。得佛還國。都不見親。忍忘舊恩。劇於路人。使我母子。守孤抱窮。今復遣使。欲求我子。爲其眷屬。何酷如之。太子成道。自言慈悲。慈悲之道。應安樂衆生。今反離別人之母子。苦中之苦。莫若恩愛離別之苦。以是推之。今別人母子。何慈之有。目連更以方便種種諫喻。耶輸陀羅絕

無聽意。爾時世尊卽起化人。空中告言。耶輸陀羅。汝頗憶念往古世時誓願事不。我當爾時爲菩薩道。以五百金錢。從汝買得五莖蓮花。上定光佛。時汝求我。世所生。共爲夫妻。我不欲受。卽語汝言。我爲菩薩。累劫行願。一切布施。不逆人意。汝能聽者。聽爲我妻。汝立誓言。世所生。國城妻子。及與我身。隨君施與。誓無悔心。而今何故愛惜羅睺。不令出家學聖道也。耶輸陀羅聞是語已。霍然還識宿業因緣。事事明了。如昨所見。愛子之情。自然消歇。遣喚目連。懺悔辭謝。捉羅睺手。付囑目連。與子離別。涕淚交流。爾時羅睺見母愁苦。長跪合掌。前白母言。願母莫愁。羅睺今往定省世尊。尋爾當還。與母相見。按羅睺時年九歲時淨飯王爲欲安慰耶輸陀羅。令其喜故。卽集國中豪族。使各遣一子。合五十人。隨從羅睺。往到佛所。佛使阿難剃羅睺頭。及五十諸公王子。悉令出家。命舍利弗爲其和尙。大目犍連作阿闍黎。授十戒法。便爲沙彌。佛爲說罪報因緣。羅睺等恐懼學道不成。當受

苦果。欲捨還家。羅睺白言。諸佛智慧。猶如大海。羅睺等心。猶如毫末。豈能受持如來智慧。佛告羅睺。如天雨滴。後不及前。雖不相及。能滿大器。修學智慧。亦復如是。從小微起。終成大器。如是展轉。滿無量器。是則自利利人。名爲大士。如我今也。羅睺等聞佛說已。心開意解。按彌沙塞律。淨飯王聞舍利弗已度羅睺。便大懊惱。出詣佛所。白言。佛昔出家。尙有難陀。不能令我如今懊惱。難陀已復出家。餘情所寄。唯在此子。今當出家。國家大計。永爲斷絕。子孫之愛。徹過骨髓。如何比丘。輒度他子。願佛從今。敕諸比丘。父母不聽。不得爲道。佛卽爲王說諸法。竟集諸比丘。立制。父母不聽。不得出家。

釋迦降生七日。而母摩耶夫人歿。姨母摩訶波闍波提。養育以至成人。及釋迦還國。乃白佛曰。我聞女人精進。可得沙門四道。願得受佛法律。佛言。以女人入我法律。服法衣者。當不盡壽清淨。究暢梵行。波闍波提。請求請至。

三。佛不聽許。佛於後時。更游迦比羅。波闍波提求出家如前。及佛將出境。追至河上。佛猶不許。乃徒跣悲啼。阿難屢爲言。乃許受八敬法出家。爲比丘尼。佛告阿難。我之正法。當千歲興盛。以度女人故。至五百歲而漸衰微。所以者何。女人有五處不能得作。一不得作如來。二不得作轉輪聖王。三不得作第二忉利天王。四不得作第六天魔王。五不得作第七梵天王。蓋釋迦數拒姨母所法者。以女人障厚。方爲道蠹。故切磋掊擊。以勵將來也。
(按釋迦姨母出家。有說在釋迦父白淨飯王死後者。)

未幾。釋迦父白淨飯王有疾。告諸王曰。我命雖斷。不以爲苦。但恨不見我子悉達。又恨不見次子難陀。以除貪姪世間諸欲。復恨不見斛飯王子阿難陀者。持佛法藏。一言不失。又恨不見孫子羅云。年雖幼稚。神足純備。戒行無缺。吾設得見。是諸子等。我病雖篤。未離生死。不以爲苦。諸在王邊。聞如是語。悉涕淚如雨。白淨王言。聞我子今在王舍城耆闍崛山中。(卽靈

驚。此去懸遠。設遣使者。道阻遲晚。無益。時釋迦以天眼視。以天耳聞。知父王臥病相念。卽告難陀。父王淨飯。勝世間王。是我曹父。今得病重。我曹應往。及命存在。得與相見。令王願滿。難陀受教。長跪作禮。曰唯然世尊。父王能生聖子。利益世間。今宜往詣。報育聖恩。阿難合掌白佛。伯父聽我出家。爲佛弟子。是故欲往。羅云復前白佛。世尊雖是我父。棄國求道。我蒙祖王育養成。就而得出家。是故欲往。覲省祖王。於時釋迦卽以神足。踊身虛空。忽然而現於迦比羅城。放大光明。白淨王曰。是何光耶。來觸我身。令我身中。患苦得息。脫是我子。悉達來也。先現光明。是其常瑞。卽時左右來言。世尊將諸弟子。阿難羅云等。乘空而至。王聞佛來。敬意踊躍。不覺起坐。須臾之間。佛便入宮。王遙舉兩手。接足而言。唯願卽以手觸我身。令我得安。爲病所困。如壓麻油。痛不可忍。佛言。唯願父王。莫復愁悒。道德純備。無有缺減。尋卽以手著父王額上。乃言。父王是清淨戒行之人。心垢已離。今應

歡喜。不宜憂惱。當諦思念諸經法義。物不堅固。得堅固志。以種善根。是故大王宜當歡喜。命雖欲終。自可寬意。時大稱王以恭敬心白王言。佛是王子。神力具足。無與等者。次子難陀。亦是王子。已度生死諸欲之海。四道無礙。斛飯王子阿難陀者。已服法味。佛所說法。猶若淵海。一句不忘。悉總持之。王孫羅云。道德純備。逮諸禪定。成四道果。是四子等。已壞魔網。時白淨王聞是語已。驩喜踊躍。不能自勝。卽以自手捉於佛手。著其心上。命盡氣絕。

白淨王既卒。佛共難陀。在喪頭前。肅恭而立。時阿難羅云。住在喪足。難陀白佛。父王養我。願聽難陀。擔父王棺。阿難陀白佛言。唯願聽我。擔伯父棺。羅云。復前白佛。唯願聽我。擔祖王棺。爾時釋迦念當來世。人皆兇暴。不報父母養育之恩。爲是當來不孝衆生。設化法故。如來躬欲擔於父王之棺。時四天王竊共思議。瞻望佛爲當來世諸不孝父母者故。以大慈悲。親欲

自身擔父王棺。俱共長跪。同時發聲。我等是佛弟子。從佛聞法。成須陀洹。以是之故。我曹宜擔父王之棺。佛聽。四天王擔父王棺。四天王各自變身。如人形像。以手擎棺。擔著肩上。釋迦躬自手執香爐。在前行出。詣於墓所。靈鷲山上。敕諸羅漢。取大海香薪。共積香薪。舉棺置上。以火焚之。焚後收骨。起塔供養。釋迦自父王沒後。仍返王舍城靈鷲峯矣。

第七節 釋迦中年以後說法

釋迦成道以後。卽還故鄉。廣度釋族諸人。及父王既沒。仍往來於迦比羅及王舍城之間。其弘闡佛法。摧伏外道之事。不可勝紀。茲惟記祇洹精舍一事。節錄賢愚經之文如下。

舍衛國王波斯匿。有一大臣。名曰須達。居家巨富。財寶無限。好喜布施。賑濟貧乏。及諸孤老。時人因行爲立其號。曰給孤獨。爾時長者生七男兒。年各長大。爲其納娶。次至第六。其第七兒。端正殊異。偏心愛念。當爲娶妻。欲

得極妙容姿端正有相之女。卽語諸婆羅門言。爲兒求之。諸婆羅門便爲推覓。展轉行乞。到王舍城。王舍城中有一大臣。名曰護彌。財富無量。敬信三寶。時婆羅門到家從乞。國法施人。要令童女持物布施。護彌長者止有一女。威容端正。顏色殊妙。卽持食出。施婆羅門。婆羅門見已。心大歡欣。我所覓者。今日見之。卽問女言。叵有人來求索汝未。答言未也。問言女子。汝父在不。其女言在。婆羅門言語令出外。我欲見之。與共談語。時女入內。白其父言。外有客人欲得相見。父便出外。時婆羅門問訊起居。乃言舍衛國有大臣須達。亦相識不。答言未見。但聞其名。婆羅門因稱須達在舍衛國中。第一富貴。有兒端正殊妙。卓略多奇。欲求君女爲婦。護彌允之。值有估客至舍衛。婆羅門具爲書與須達。陳其事。須達白王。卽大載珍寶。趣王舍城。親至護彌家。爲兒求妻。護彌長者歡喜迎逆。安置敷具。家內騷騷。辦具飲食。長者念言。今此長者大設供具。欲作何等。將請國王太子大臣長者。

居士婚姻親戚。設大會耶。即便相問。答曰不也。將以請佛及比丘僧耳。須達重問。何名爲佛。長者答言。汝不聞乎。淨飯王子。厥名悉達。見老病死苦。不樂在家。出家修道。六年苦行。得一切智。盡結成佛。降諸魔衆。十八億萬。號曰能仁。十力無畏。十八不共。光明照曜。三達遐鑒。故號曰佛。須達又問。云何名僧。答言。佛諸弟子。六通具足。四意七覺。八道悉練。神足自在。能爲衆生作良祐福田。故名僧也。須達聞說是事。歡喜踊躍。感念信敬。企望至曉。當往見佛。

須達詰旦詣釋迦所。遙見世尊。猶如金山。相好威容。儼然昞著。觀之心悅。不知禮法。直問世尊。不審瞿曇起居何如。世尊卽時命令就坐。時首陀會天。遙見須達。雖覩世尊。不知禮拜供養之法。化爲四人行列而來。到世尊所。接足作禮。胡跪問訊。起居輕利。右繞三匝。却住一面。是時須達見其如是。乃爲愕然。自念恭敬之法。事應如是。卽起離座。如彼禮敬。爾時世尊卽

爲說法。四諦微妙。苦空無常。聞法歡喜。便染聖法。成須陀洹。譬如淨潔白
鬘。易染爲色。長跪合掌。問世尊言。舍衛城中。如我等輩。聞法易染。更有如
我比不。佛告須達。更無有二。如卿之比。舍衛城中。人多信邪。難染聖教。須
達白佛。唯願如來垂神降屈。臨覆舍衛。使中衆生除邪就正。世尊告曰。出
家之法。與俗有別。止住處所。應當有異。彼無精舍。云何得去。須達白佛言。
弟子能起。願見聽許。世尊默然未應也。

須達既爲兒娶婦。竟辭佛還家。因白佛言。還到本國。當立精舍。不知模法。
唯願世尊。使一弟子。共往敕示。世尊思惟。舍衛城內。婆羅門衆。信邪倒見。
餘人往者。必不能辦。唯舍利弗。是婆羅門種。少小聰明。神足兼備。去必有
益。即便命之。共須達往。須達問言。世尊足行。日能幾里。舍利弗言。日半由
旬。如轉輪王足行之法。是時須達。卽於道次二十里。作一亭舍。計較功作。
出錢雇人。安止使人。飲食敷具。悉皆令足。及到舍衛國。乃共舍利弗案行。

諸地。唯王太子祇陀有園。其地平正。其樹鬱茂。不遠不近。正得處所。舍利弗因告須達。今此園中。宜起精舍。若遠住則乞食難。近處憤鬧。妨廢行道也。

須達乃到太子所言。我今欲爲如來起立精舍。太子園好。今欲買之。太子笑言。我無所乞。此園茂盛。當用遊戲逍遙散志。須達慙懃。乃至再三。太子貪惜。增倍求價。謂呼價貴。當不能買。語須達言。汝若能以黃金布地。令間無空者。便當相與。須達曰。諾。太子卽曰。我戲語耳。須陀白言。爲太子法。不應妄語。妄語欺詐。云何紹繼撫恤人民。已許價決。不宜中悔。遂斷與之。須達歡喜。便敕使人象負金出。八十頃中。須臾欲滿。殘有少地。須達思惟。當發何藏金。適可滿之。太子見須達凝思。問言。嫌貴將置之乎。答曰。非也。正念金藏。何藏不多不少。可補此數耳。太子因思佛必大德。能使斯人輕寶。乃爾。卽教勿更出金。園地屬卿。樹木屬我。自起門屋上佛。共立精舍。須達

歡欣許之。即便歸家。當施功作。

時婆羅門六師聞之。往白國王。長者須達買祇陀園。欲爲瞿曇沙門。興立精舍。聽我徒衆。與其角術。沙門得勝。便聽起立。若其不如。不得起也。瞿曇徒衆住王舍城。我等徒衆。當住於此。王具召須達語之。須達歸家。著垢膩衣。愁惱不樂。時舍利弗明日時到。著衣持鉢。至須達家。見其不樂。卽問其故。須達答言。所立精舍。但恐不成。是故愁耳。舍利弗言。何以不成。須達因言。六師見王請相角術。如得勝者。始可立精舍。彼六師輩出家來久。精誠有素。所學技術。無能及者。今不知尊人技藝。能與角不。舍利弗言。正使此輩六師之衆。滿閻浮提。不能動吾足上一毛。欲角何等。自恣聽之。須達歡欣。卽啟王聽與六師角術。六師宣告國人。却後七日。當於城外寬博之處。與沙門角。七日期滿。國人大集。於是人民悉爲國王及其六師敷施高座。須達爲舍利弗施高座。時舍利弗在一樹下。寂然入定。而作是念。此會大

衆習邪已久。憍慢自高。草芥羣生。當以何德而降伏之。我初入會。當使一切大衆。皆爲我禮。爾時六師已集。見舍利弗獨未來。乃白王言。瞿曇弟子。自知無術。僞求角能。衆會既集。怖畏不來。王告須達。汝師弟子。角時已至。宜來談論。須達遂往請。舍利弗詣會。時舍利弗從禪定起。更整衣服。徐詳而步。如師子王。往詣大衆。是時衆人見其形容法服有異。及諸六師。忽然起立。如風靡草。不覺爲禮。舍利弗便昇須達所敷座。

六師衆中。有一弟子。名勞度差。善知幻術。於大衆前。呪作一樹。自然長大。蔭覆衆會。枝葉鬱茂。華果各異。衆人咸言。此變乃是勞度差作。時舍利弗便以神力。作旋嵐風。吹拔樹根。倒著於地。碎爲微塵。衆人皆言。舍利弗勝。今勞度差便爲不如。又復呪作一池。其池四面皆以七寶。池水之中。生種種華。衆人咸言。是爲勞度差之所作也。時舍利弗化作一大六牙白象。其一牙上。有七蓮華。一一華上。有七玉女。其象徐詳。往詣池邊。并吸其水。池

卽時滅。衆人悉言舍利弗勝。勞度差不如。復作一山。七寶莊嚴。泉池樹木。華果茂盛。衆人咸言。此是勞度差所作。舍利弗卽便化作金剛力士。以金剛杵。遙用指之。山卽破壞。無有遺餘。衆人皆言舍利弗勝。勞度差不如。復作一龍。身有十頭。於虛空中。兩種種寶。雷電震地。驚動大衆。衆人咸言。此亦勞度差作。舍利弗便化作一金翅鳥王。擘裂瞰之。衆人皆言舍利弗勝。勞度差不如。復作一牛。身體高大。肥壯多力。麤脚利角。跑地大吼。奔突來前。時舍利弗化作一獅子。分裂食之。衆人皆言舍利弗勝。勞度差不如。復變其身。作夜叉鬼。形體長大。頭上火然。目赤如血。四牙長利。口目出火。驚躍奔走。舍利弗自化身作毗沙門王。夜叉恐怖。卽欲退走。四面火起。無有去處。唯舍利弗邊。涼冷無火。卽時屈伏。五體投地。求哀脫命。辱心已生。火卽還滅。衆咸喝言。舍利弗勝。勞度差不如。是時舍利弗身昇虛空。現四威儀。行住坐臥。身上出水。身下出火。或現大身滿虛空中。而復現小。或分一

身爲千百萬億身。還合爲一。於虛空中。忽然在地。履地如水。履水如地。現是變已。還攝神足。坐其本座。大衆見其神力。咸懷歡喜。舍利弗因爲說法。隨其本行宿福因緣。各得道迹。四衆便罷。各還所止。

須達乃共舍利弗往圖精舍。須達手自捉繩一頭。舍利弗自捉一頭。共經精舍。時舍利弗欣然含笑。須達問曰。尊人何笑。答言。汝始於此經地。六欲天中。宮殿已成。卽借道眼。須達悉見六欲天中。嚴淨宮殿。問舍利弗。是六欲天。何處最樂。舍利弗言。下三天中。色欲深厚。上二天中。憍逸自恣。第四天中。少欲知足。恆有一生補處菩薩。來生其中。法訓不絕。須達言曰。我正當生第四天中。出言已竟。餘宮悉滅。唯第四天宮殿湛然。更復徒繩。時舍利弗慘然憂色。須達卽問尊者。何故憂色。答言。汝今見此地中。蟻子不耶。對曰。已見。時舍利弗語須達言。汝於過去毗婆尸佛。亦於此地。爲彼世尊。起立精舍。而此蟻子。在此中生。尸棄佛時。汝爲彼佛。亦於是中造立精舍。

而此蟻子。在此中生。毗舍浮佛時。汝爲世尊。於此地中。起立精舍。而此蟻子亦此中生。拘留孫佛時。汝爲世尊。於此地中。起立精舍。而此蟻子亦此中生。迦那舍牟尼佛時。汝爲世尊。於此地中。起立精舍。而此蟻子亦在中。生迦葉佛時。汝亦爲佛。於此地中。起立精舍。而此蟻子亦在中。生。乃至今日九十一劫。受一種身。不得解脫。生死長遠。唯福爲要。不可不種。是時須達。悲心憐傷。經地已竟。起立精舍。

須達既起精舍。以妙旃檀。用爲香泥。起別房住止。千二百處。凡百二十處。施設已竟。欲往請佛。後自思惟。上有國王。應當令知。卽往啟王。遣使請佛及僧。釋迦遂與大衆。至舍衛國。所經亭舍。悉於中止。道次度人。無有限量。佛告阿難。今此園地。須達所買。林樹華果。祇陀所有。二人同心。共立精舍。應當與號太子祇樹給孤獨園。名字流布。傳示後世。此精舍卽名祇洹精舍。

釋迦在祇園說教。憍薩羅國王波斯匿。來祇園聽法。釋迦告之。當以慈心治民。深觀無常。則心清淨。來世必得善報。波斯匿王大悟。誓終身為優婆塞。以後略記釋迦歷年事蹟於左。

成道第二年。（或云第三年）釋迦由舍衛城還王舍城。居於竹園。先是摩竭提國頻婆娑羅王之子無畏。舉一庶子。名耆婆。耆婆長精醫術。歸國為宮中侍醫。釋迦有疾。王命耆婆治之。釋迦病愈。特為耆婆說法。耆婆終身奉佛。為優婆塞。

成道第三年。第四年。釋迦多住竹園精舍。

成道第五年。釋迦在吠舍離城大林。住重閣講堂。又至迦比羅城。或曰姨母波闍波提。白淨飯王卒後。實於是歲出家。時舍衛城長者鹿子。有子曰滿增。其妻毗舍佉。夙信佛法。及歸滿增。遂勸夫家父母。聽釋迦說法。於是鹿子之族。皆舍尼犍教而歸佛教。

成道第六年。釋迦在舍衛城。後至竹園精舍。頻婆娑羅王妃皈依釋迦。
成道第七年。釋迦住僧伽舍。又至舍衛國之祇洹精舍。

成道第八年。釋迦住於迦比羅城附近之矢收摩羅山。誘化那矩羅及目
犍羅耶父母。

成道第九年。釋迦住憍賞彌城瞿師羅園。時僧衆中有比丘一人持律。一
人通經。互守所學。不能相通。至於爭論。釋迦爲解化之。

成道第十年。還舍衛城。又至摩竭提國。

成道第十一年。釋迦在達櫬拏山精舍。（在王舍城附近）有婆羅門曰
迦尸婆羅墮闍者歸佛。

成道第十二年。至毗蘭若市。又至摩醯濕代羅補羅、波羅奈斯、吠舍離諸
市。後復還舍衛城。

成道第十三年。在舍衛城。

成道第十四年。在祇洹精舍。羅云年二十。受具足戒。釋迦尋至迦比羅城。
成道第十五。在祇洹精舍。

成道第十六年。釋迦有折服夜叉之事。

成道第十七年。釋迦至竹林精舍。

成道第十八年。釋迦至舍衛城。尋還王舍城。

成道第十九年。釋迦住竹林精舍。又至摩竭提各村說法。有獵師歸佛之事。尋還於舍衛城。

成道第二十年。釋迦在舍衛城。釋迦自此說法。常往來於祇洹竹園精舍。及靈鷲峯之間。感化之跡甚衆。惟其年數及居住游行之時。不可盡詳。故從略焉。

第八節 釋迦滅度

釋迦成道第四十四年。自舍衛城祇洹精舍。還耆闍崛山。（卽靈鷲）有

與阿闍世王問答之事。明年至毗舍離城附近之波梨婆村。與阿難獨留。釋迦生疾。舉體皆痛。釋迦譜曰。佛告阿難。諸有修四神足。多修習行。常念不忘。在意所欲。可得不死。一切有餘。阿難。佛四神足已多。如來可止一切有餘。爲世除冥。天人獲安。爾時阿難默然不對。如是再三。阿難爲魔之所蔽。朦朦不悟。佛告阿難。宜知是時。阿難承旨。禮佛而立。其間未久。時魔波旬來白。佛意無欲。可般涅槃。佛告波旬。且止且止。我自知時。如來今者未取涅槃。波旬復白。佛言。佛昔初成正覺。我時勸請如來。可般涅槃。爾時如來報言。須我弟子集化。今正是時。何不滅度。佛言止。波旬。佛自知時。不久住也。是後三月。於本生處拘尸那竭娑羅園雙樹間。當取滅度。時魔卽念佛不虛言。歡喜踊躍。忽然不現。

佛卽於遮波羅塔。定意三昧。捨命住壽。當此之時。地大震動。佛放大光。幽冥之處。莫不蒙明。賢者阿難。心驚毛豎。疾詣佛問。地動是何因緣。佛告阿

難。凡世地動。有八因緣。夫地在水上。水止於風。風止於空。空中大風。有時自起。則大水撓。普地皆動。是爲一。復次有時得道比丘比丘尼。及大神尊。天。觀水性多。觀地性少。欲自試力。故則普地動。是爲二。菩薩降神母胎。地爲大動。是爲三。菩薩從右脇生。則普地動。是爲四。菩薩初成正覺。則普地動。是爲五。初轉無上法輪。則普地動。是爲六。佛教將畢。欲捨性命。則普地動。是爲七。如來欲入無餘界。而般涅槃。時地大震動。是爲八也。爾時世尊告阿難。俱詣香塔。現在比丘。普敕令集。如來不久。是後三月。當般泥洹。諸比丘聞已。皆悉愕然。隕絕迷荒。自投於地。舉聲大呼。一何駛哉。佛取滅度。宛轉號咷。不能自勝。佛告比丘。汝等且止。勿懷憂悲。天地人物。無生不終。欲使有爲不變易者。無有是處。天魔婆旬。向來請我。我言是後三月。當般涅槃。爾時賢者阿難。右膝著地。叉手白佛言。惟願世尊。留住一切。勿取滅度。爾時世尊默然不對。如是三請。佛告阿難。汝親從佛聞。佛四神足已多。

習行不忘。可止不死。一切有餘。多所饒益。天人獲安。汝爾時何不勸請如來。使不滅度。今汝方言。豈不過耶。吾已捨性命。已棄已吐。欲使如來自違言者。無有是處。

大涅槃經及佛般泥洹經。記佛將涅槃時。諸天人等。及他界菩薩。各來供養。其詞甚繁。茲不具錄。大般泥洹經曰。爾時樹林。其地慳小。以佛神力。如針鋒處。皆有無量諸佛世尊。所食之物。亦無差別。是時天人阿修羅等。啼泣悲歎。如來今日。已受我等最後供養。當般涅槃。我等當復更供養誰。爾時世尊爲欲安慰一切大衆。而說偈言。如有不能如是觀了三寶常者。是旃陀羅。若有能知三法常住。實法因緣。離苦安樂。時諸人天大衆阿脩羅等。聞是法已。心生歡喜。踊躍無量。知佛常住。散種種華。鼓天妓樂。爾時世尊與文殊師利。迦葉菩薩。及與純陀。受記荊已。作如是言。諸善男子。自修其心。慎莫放逸。我今背疾。舉體皆痛。我今欲臥。如彼小兒。及常患者。文殊。

汝等當爲四部廣說大法。今以此法付囑於汝。乃至迦葉阿難等來。當復付囑。爾時如來說是語已。爲欲調伏諸衆生故。現身有疾。右脇而臥。如彼病人。

長阿含經云。爾時世尊入拘尸城。向本生處娑羅雙樹間。敷置牀座。使頭北首。面向西方。所以然者。佛法流布。當久住北方。爾時世尊偃右脇。如師子王。累足而臥。時雙樹間鬼神。以非時華。散布於地。阿難長跪叉手而白。佛言。莫於此鄙陋小城。荒毀之土。取滅度也。更有大國。迦維羅衛國。波羅奈國。人民衆多。必能恭敬供養舍利。佛言止止。(中略)我自憶念。曾於此處。云反作轉輪聖王。終厝骨於此。今我成無上正覺。復捨性命。厝身於此。自今以後。生死永終。無有方土厝吾身處。此最後邊。更不受有。爾時迦葉菩薩白佛言。世尊。如來已免一切諸病。苦患悉除。無復怖畏。世尊。一切衆生。有四毒箭。則爲病因。何等爲四。貪欲。嗔恚。愚癡。憍慢。若有病因。則有病。

生。所謂愛熱肺病。上氣吐逆。膚體瘡癩。其心悶亂。下痢噦噎。小便淋瀝。眼目疼痛。背滿腹脹。顛狂乾瘠。鬼魅所著。如是種種身心諸病。諸佛世尊。悉無復有。今日如來。何緣顧命文殊師利而作是言。我今背痛。汝等當爲大衆說法。有二因緣。則無病苦。何等爲二。一者憐愍一切衆生。二者給施病者醫藥。如來往昔。已於無量萬億劫中。修菩薩道。常行愛語。利益衆生。不令苦惱。施疾病者。種種醫藥。何緣於今。自言有病。世尊。世有病人。或坐或起。不安其所。或索飲食。戒勅家屬。修治產業。何故如來默然而臥。不教弟子。聲聞人等。尸波羅密。諸禪解脫。三摩跋提。修諸正勤。何緣不說如是甚深大乘經典。如來何故不以無量方便。教大迦葉。人中象王。諸天人等。令不退於阿耨多羅三藐三菩提。何故不治諸惡比丘。受畜一切不淨物者。世尊。實無有病。云何默然右脇而臥。一切愚人。生滅盡想。當爲外道。九十種之所輕慢。沙門瞿曇。無常所遷。如來世尊。無上仙人。已拔毒箭。得無

所畏。今者何故右脇而臥。令諸人天悲愁苦惱。爾時世尊大悲薰心。知諸衆生各各所念。將欲隨順畢竟利益。卽從臥起。結加趺坐。顏貌熙怡。如融金聚。放大光明。充徧虛空。其光大盛。過百千日。（中略）爾時佛告迦葉菩薩。是諸衆生。不知大乘方便密語。便謂如來真實有疾。如來今於娑羅樹間。示現倚臥師子之牀。欲入涅槃。令諸未得阿羅漢果。衆弟子等。及諸力士。生大憂苦。令諸天人阿脩羅等。大設供養。欲使諸人以千端氈纏裹其身。七寶爲棺。盛滿香油。積諸香木。以火焚之。唯除二端。不可得燒。一者襯身。二最在外。爲諸衆生。分散舍利。以爲八分。一切聲聞弟子。咸言如來入於涅槃。若知如來亦不畢定。入於涅槃。何以故。如來常住。不變易故。大般泥洹經云。佛語阿難。甚已願樂如來正化。當棄貪欲憍慢之心。遵承佛教。以精進受。思惟道行。是爲最後佛之遺令。必共慎之。汝諸比丘。觀佛之儀容。難可得覩。却後一億四千餘歲。乃當復有彌勒佛耳。難常遇也。天

下有優曇鉢華。不華而實。若其生華。則世有佛。爲世間日。恆除衆暝。自我爲聖師。至七十九。所應作者。亦已究暢。汝其勉之。夜已半矣。是故比丘。無爲放逸。我亦以不放逸故。自致正覺。無量衆善。亦由不放逸得。一切萬物。無常存者。此是如來末後所說。於是世尊卽入初禪。從初禪起。入第二禪。從第二禪起。入第三禪。從第三禪起。入第四禪。從第四禪起。入空處定。從空處定起。入識處定。從識處定起。入不用定。從不用定起。入有想無想定。從有想無想定起。入滅想定。是時阿難問阿那律。世尊已般涅槃耶。那律言未也。阿難。世尊今者在滅想定。我昔親從佛聞。從四禪起。乃般涅槃。於時世尊從滅想定起。入有想無想定。從有想無想定起。入不用定。從不用定起。入識處定。從識處定起。入空處定。從空處定起。入第四禪。從第四禪起。入第三禪。從第三禪起。入第二禪。從第二禪起。入第一禪。從第一禪起。入第二禪。從第二禪起。入第三禪。從第三禪起。入第四禪。從第四禪起。佛般

涅槃。

阿那律告阿難言。汝可入城。語諸末羅。佛已滅度。所欲施作。宜及時爲。是時阿難起禮佛足已。將一比丘。涕泣入城。遙見五百末羅。集在一處。諸末羅奉迎。禮足白言。今來何早。阿難答言。汝等當知。如來昨夜。已取滅度。諸末羅聞是語已。莫不悲慟。各自還家。辦諸香華。及衆妓樂。詣雙樹間。供養舍利。竟一日已。以佛舍利置於牀上。諸末羅童子等。來舉舉牀。皆不能勝。阿那律語末羅。諸天將來舉牀。諸天意欲留舍利七日之中。使國人民。皆得供養。然後出城北門。渡熙連禪河。於天冠寺中。而闍維之。是上天意。使牀不動。末羅曰。諾。隨諸天意。時諸末羅。卽共入城。平治道路。掃灑燒香已。出雙樹間。以香華妓樂。供養舍利。訖七日已。時日向暮。舉佛舍利。置於牀上。末羅童子。捧舉四角。擎持旛蓋。燒香散華。作衆妓樂。前後導從。安詳而行。入東城門。止諸街巷。設供養已。出城北門。渡熙連禪河。到天冠寺。告阿

難曰。我等復應以何供養。阿難報曰。我親從佛聞。欲葬舍利。當如轉輪聖王葬法。生獲福利。死得上天。時諸末羅卽共入城。供辦葬具已。還到天冠寺。以淨香湯洗浴佛身。以新切具。周而纏身。五百張氈。次各纏之。內身金棺。灌以香油。置於第二大鐵槨中。旃檀木槨。重衣其外。以衆名香而積其上。末羅大臣名曰路幾。親執炬火。欲然佛積。而火不然。又諸末羅。次前然積。火又不然。時阿那律語末羅言。止止諸賢。非汝所能。火滅不然。是諸天意。以大迦葉將五百弟子。波波國來。欲見佛身。天知其意。使火不然也。爾時大迦葉從波波國。遇一尼乾子。手執文陀羅華。問言。汝知我師在乎。答曰。滅度已來。已經七日。迦葉聞之。悵然不悅。五百比丘。宛轉號咷。不能自勝。迦葉詣拘尸城。渡尼連禪河。到天冠寺。至阿難所。語阿難言。我等欲一面覲舍利。及未闍維。寧可見不。阿難答言。雖未闍維。以切具五百張氈。次各纏之。藏於金棺。置鐵槨中。以爲佛身難復可觀。迦葉三請。阿難答之。

如初時大迦葉適向香積。於時佛身從重棺內雙出兩足。足有異色。迦葉見已。怪問阿難。佛身金色。是何故異。迦葉卽向香積禮佛舍利。時四部衆及上諸天同時俱禮。於是佛足忽然不現。於是佛積不燒自然。蓋待大迦葉至也。

菩薩處胎經云。佛在雙樹。欲捨身壽。入般涅槃。二月八日夜半。躬自襲僧伽黎。鬱多羅僧。安陀羅跋薩各三條。敷金棺裏。襯身臥上。脚脚相累。以鉢錫杖。手付阿難。八大國王。皆持五百張白氈。旃檀木椀。盡內金棺裏。大梵天王。將諸梵衆。在右面立。釋提桓因。將忉利諸天。在左面立。彌勒菩薩十方菩薩當前立。爾時世尊欲入金剛三昧。碎身舍利。從金棺裏出金色臂。卽問阿難。迦葉比丘。今來至不。對曰未至。卽復斂氈。入金棺裏。寂然不語。世尊將欲示現識所趣向。道諺俗識。有爲識。無爲識。世尊卽於胎中現鉤鏤骸骨。令一切衆生。知識所趣。分別決了。彌勒菩薩卽從座起。手執金剛

七寶神杖。撓鉤鑲骨。聽彼骨聲。卽白佛言。此人命終。瞋恚結多。識墮龍中。此人前身。十跡行具。得生天上。有一全身舍利。無有缺減。彌勒以杖撓之。推尋此識。了不知處。如是三撓。前向佛言。此人神識。了不可知。將非如來入涅槃耶。佛告彌勒。諸佛舍利流布。非汝等境界所能分別。何以故。此舍利者。卽是吾舍利。何能尋究如來神識。又世尊還攝神威。在金棺裏。寂然無聲。諸天燒香。散華供養。時大迦葉將五百弟子至。世尊以天耳聞。卽從金棺。雙出兩足。

摩耶經云。佛般涅槃。摩耶夫人在天上。五衰相現。一者頭上華萎。二者腋下汗出。三者項中光滅。四者兩目數瞬。五者不樂本座。又於其夜。得五大惡夢。一須彌山崩。四海水竭。二羅刹奔走。挑人眼目。三天失寶冠。身無光明。四寶珠幢倒。失如意珠。五師子嚙身。痛如刀割。得此夢已。卽便驚寤。此非吉祥。我昔在於白淨王宮。因晝寢中。得希有夢。見一天子。身黃金色。乘

白象王。從諸天子。作妙妓樂。貫日之精。入我右脇。心身安樂。便懷妊。悉達太子。爲世照明。今此五夢。甚可怖畏。必是我子。涅槃之相。爾時阿那律棺殯。如來身已。卽昇忉利天。偈告摩耶。摩耶聞已。悶絕躡地。良久乃甦。（中略）卽與諸眷屬從空來下。趣雙樹間。遙見佛棺。便卽悶絕。不能自勝。（中略）爾時世尊以神力故。令諸棺蓋。皆自開發。便從棺中。合掌而起。如師子王。初出窟已。奮迅之勢。身毛孔中。放千光明。有千化佛。悉皆合掌。向於摩耶。以梵輦音。問訊母言。遠屈來下。此閻浮提。諸行法爾。願勿啼泣。爾時阿難見佛起已。又聞說偈。垂淚嗚咽。強自抑忍。卽便白佛。後世衆生。必當問我。佛臨滅度。復何所說。云何答之。汝當答言。世尊已入涅槃。摩耶夫人來下。如來爲後不孝諸衆生故。從金棺出。合掌問訊。并說上偈。故此經名爲佛臨涅槃母子相見經。如是受持。說此語已。與母辭別。卽便闔棺。三千世界。普皆震動。八部大衆。悲號懊惱。聲動天地。摩耶夫人問阿難言。我

一切諸外道輩。七百歲已。有一比丘。名曰龍樹。善說法要。滅邪見幢。然正法炬。八百歲後。諸比丘等。樂好衣服。縱逸嬉戲。百千人中。或有一兩得道果者。九百歲已。奴爲沙門。婢爲比丘尼。一千歲已。諸比丘等。聞不淨觀。阿那波那。瞋恚不欲。無量比丘。若一若兩。思惟正受。千一百歲已。諸比丘等。如世俗人。嫁娶行媒。於大眾中。毀謗毗尼。千二百歲已。諸比丘及比丘尼。作非梵行。若有子息。男爲比丘。女爲比丘尼。千三百歲已。袈裟變白。不受染色。千四百歲已。時諸四衆。猶如獵師。好樂殺生。賣三寶物。千五百歲。俱跋彌國。有三藏比丘。善說法要。徒衆五百人。有一羅漢比丘。善持戒行。徒衆五百。於十五日布薩之時。羅漢比丘。昇於高座。說清淨法。云此所應作。此不應作。彼三藏比丘。弟子答羅漢云。汝今身口自不清淨。云何而反說是粗言。羅漢答言。我久清淨。身口意業。無諸過患。三藏弟子。聞此語已。倍更恚忿。卽於座上。殺彼羅漢。時羅漢弟子。而作此言。我師所說。會於法理。

云何汝等。害我和尚。卽以利刀殺彼三藏。天龍八部。莫不憂惱。惡魔波旬。及外道衆。踊躍歡喜。競破塔寺。殺害比丘。一切經藏。皆悉流移至鳩尸那竭國。阿耨達龍王。悉持入海。於是佛法而滅盡也。摩訶摩耶。聞此語已。號哭懊惱。語阿難言。如來遺勅。旣以正法付囑尊者。及摩訶迦葉。宜應精勤。護持誦讀。我今不忍於如來闍維之時。卽禮佛棺。涕淚號叫。還歸天上。釋迦生卒年月。頗有異說。其生年或以在周靈王十五年。卽西歷紀元前五百五十七年。而其卒年。亦有參差。有以釋迦實享壽七十九歲而滅度者。此佛般泥洹經。及方等般泥洹經之說也。有以爲八十歲者。此大般涅槃經。金光明最勝王經之說也。（西域記同）有以爲八十歲以上者。此長阿含經。雜阿含經。毗奈耶雜事之說也。

時波波國末羅民衆。聞佛於雙樹滅度。皆自念我宜徑求舍利分。起塔供養。卽嚴四兵。到拘尸城。於是遮羅頗國諸跋離民衆。及羅摩伽國拘利民

衆。毗留提國。婆羅門衆。迦比羅國。釋種民衆。毗舍離國。離車民衆。及摩竭國。阿闍世王。皆各以兵來。遣使者言。聞佛衆祐。止此滅度。彼亦我師。敬慕之心。來請骨分。當於本國。起塔供養。拘尸人答曰。世尊垂降此土。於茲滅度。國內士民。自常供養。遠勞諸君。分舍利分。定不可得。時諸國王。卽集羣臣。衆共立議。作頌告曰。吾等和議。遠來拜首。遜言求分。如不見與。四兵在此。不惜身命。義而弗獲。當以力取。拘尸國復以偈答曰。遠勞諸君。屈辱拜首。如來遺形。不敢相許。彼欲舉兵。吾斯亦有。畢命相抵。未云有畏。時香姓婆羅門。曉衆人曰。諸賢。長夜受佛教戒。口誦法言。一切衆生。常念欲安。寧可諍佛舍利。共相殘害。如來遺形。欲以廣益。舍利現在。但當分耳。衆咸稱善。尋復議言。當使誰分者。皆曰。香姓婆羅門。仁智平均。可使分也。乃分佛舍利。作八分。明星出時。分訖。諸王各持歸其國。起塔供養。當於爾時。如來舍利。起於八塔。第九餅塔。第十炭塔。第十一生時髮塔。故爲語曰。何等時

佛生。沸星出時生。沸星出出家。沸星出成道。沸星出滅度。八日如來生。八日佛出家。八日成菩提。八日取滅度。二月如來生。二月佛出家。二月成菩提。二月取涅槃。右見泥洹經也。

釋迦滅度後百年。而阿育王（卽阿輸迦王）以佛舍利起八萬四千塔。雜阿含經。謂世尊與諸比丘。循邑而行。有二童子。一名闍耶。二名毗闍耶。共在沙中嬉戲。遙見世尊。三十二相。莊嚴其體。時闍耶童子心念言。我當以麥麩上佛。仍手捧細沙。著世尊鉢中。時毗闍耶合掌隨喜。時彼童子而發願言。以惠施善根功德。令得一天下一繖蓋王。卽於此處生得供養諸佛。爾時世尊發容微笑。阿難合掌白言。世尊何緣微笑。爾時世尊告阿難。當知我滅度百年之後。此童子於巴連弗邑。統領一天下轉輪王。姓孔雀。名阿育。正法治化。又復廣布我舍利。當造八萬四千塔。阿難取此鉢中所施之沙。捨著如來經行處。此卽釋迦與阿育王之宿緣也。

巴連弗邑國阿育王。雄武善用兵。國以強盛。後以殺人過衆。嘗問一道人。我從來殺害。不必以理。今修何善。得免斯殃。答曰。唯有起塔。供養衆生。先是八國共分舍利。阿闍世王分數。得八萬四千。又別得佛口二髭。還國道中。逢難頭禾龍王。從其求舍利分。阿闍世王不與。便語言。我是龍王。力能壞汝國土。阿闍世王怖畏。卽以佛髭與之。龍王還於須彌山下。起水高八萬四千里。於下起水精塔。阿闍世還國。以紫金函盛舍利。作千歲燈火。於五恆河沙水中塔葬埋之。及阿育王欲建塔。乃將四兵衆至王舍城。取阿闍世王佛塔中舍利。還復修治此塔。與本無異。如是取七佛塔中舍利。至羅摩村中。時中諸龍王。將王入龍宮中。王從龍索舍利供養。龍卽分與之。時王作八萬四千金銀瑠璃玻璃篋。盛佛舍利。又作八萬四千四寶餅。以盛此篋。又作無量百千旛幢繖蓋。使諸鬼神各持舍利供養之具。勅諸鬼神。言於閻浮提。至於海際。城邑聚落。滿一億家者。爲世尊立塔。

一曰阿育王入摩竭提國。娶第二夫人。衆相具足。相師觀之。云當爲王生金色之子。後有身。足滿十月。王有緣事。宜出外行。王后妬嫉。募覓猪母。卽應產者。語第二夫人言。卿是年少。甫爾始產。不可露面視天。以被覆面。卽生金子。光照宮中。盜持兒去殺之。卽以猪子著其邊。便罵言。汝云當爲王生金色之子。何故生猪。便取輪頭拍囚。內後園中伏菜。王還聞之不悅。久之。後王出後園。見之憶念。迎取歸宮。第二夫人。漸得親近。具說情狀。王聞驚怪。卽殺八萬四千夫人。阿育王後於城外造立地獄。治諸罪人。佛知殺諸夫人。應墮地獄。卽遣消散比丘化王。王發信悟。問比丘言。殺八萬四千夫人。罪可得贖不。道人言。各爲人造一塔。塔下著一舍利。當得脫罪耳。王卽尋覓阿闍世王舍利。此大阿育王經。言造塔之因緣也。阿育王塔。是遣鬼神所造。一日之中。遍閻浮提。中國亦有之。今天童阿育王寺中。尙有阿育王當時造塔所遺之舍利。亦其一也。

第九節 釋迦十大弟子

釋迦弟子雖衆。而其尤著者。當時有十大弟子之稱。卽舍利弗之智慧。目犍連之神通。大迦葉之頭陀。阿那律之天眼。須菩提之解空。富樓那之說法。迦旃延之論義。優波離之持律。羅睺羅之密行。阿難陀之多聞是也。

舍利弗 *Sariputra* 者。摩竭提國那爛陀村人。出婆羅門姓。學於村中婆羅門師沙然。與目犍連共爲沙然二高弟。後同歸依釋迦。舍利弗智慧越衆。增一阿含經。嘗舉釋迦語曰。我佛法中。智慧無窮。決了諸疑者。舍利弗第一。中土譯藏。有舍利弗集異門足論二十卷。又舍利弗阿毗曇論三十卷。目犍連 *Maudgalyayana* 者。本名拘律陀。Koliya 父母憂無子。禱於拘律陀樹神而生。故以名之。增一阿含經。記釋迦語。我弟子中。神通……大目連第一。後尼犍子外道。嫉目犍連。刺殺之。藏經中有目犍連法蘊足論十二卷。

大迦葉 *Maha kasyapa* 摩竭提國人。其歸釋迦事已具前。旣爲沙門。妻居

恆河南學一外道之教。及釋迦許女人出家。大迦葉遣比丘尼招之入祇洹精舍。從釋迦姨母波闍波提出家。受具足戒。大迦葉以頭陀稱衆僧中第一。釋迦入滅後。與諸弟子在王舍城毗婆羅山之七葉窟。結集佛經。大迦葉爲上首。後入滅於摩竭國鷄足山。

阿菟樓陀（卽阿那律 Anuruddha）白淨王弟甘露飯王之子。釋迦成道後。還迦比羅城。頗爲釋種說法。及將復如王舍城。而阿菟樓陀、阿難陀、提婆達多、優波離等諸釋種。追至途中。請出家。阿菟樓陀獨以天眼爲弟子中第一。釋迦入滅之際。與阿難陀共當持護之任。

須菩提 Subhuti 者。舍衛城一長者之子。出家後得羅漢果。在佛弟子中。稱解空第一。增一阿含經第十三品。舉須菩提之語曰。法法自生。法法自滅。法法相動。法法自息……法法相亂。法法自息。法能生法……如是一切所有。皆歸於空。無我。無人。無命。無士。無夫。無形。無像。無男。無女……西域

記卷四亦舉須菩提語曰。嘗聞佛說。知諸法空。譬諸法性。是則以慧眼觀法身也。後龍樹唱諸法皆空論。遂獨傳般若一家。須菩提殆已先啟之與。富樓那 *Purna* 波羅奈人。始於鹿苑聞釋迦說法。遂請出家。長於辨才。說法第一。

迦旃延 *Katyayana* 本阿私陀仙人之甥。釋迦生時。王嘗使仙人相之。迦旃延初聞法於鹿苑。遂出家。於弟子中論義第一。

優波離 *Upali* 賤業者之子。嘗爲釋種薙髮人。嘗從阿菟樓陀、阿難陀等追釋迦。後釋迦亦許其出家。於弟子中持律堅固。稱爲第一。

羅睺羅 *Rahula* 釋迦之子。釋迦成道後。索爲沙彌。年二十從舍利弗受戒爲沙門。於衆僧中年最爲少。而密行第一。

阿難陀 *Ananda* 釋迦從弟。釋迦晚年。阿難陀常在左右。於弟子中多聞第一。王舍城結集之時。阿難陀之力爲多。其入滅時。恆河南北二國。並欲得

其遺骨。幾至相爭。終兩分其骨而供養之。亦足見其德望之隆矣。

第二章 釋迦滅度後佛教之傳播及其教義之

分判

第一節 印度佛教畧述

一、釋迦滅度後二百年間之佛教

釋迦入滅後。僧衆中選五百比丘。在王舍城之南。毗婆羅山之北麓。曰七葉窟者。結集佛說。摩竭提王阿闍世。實爲之外護。建講堂於七葉窟前。阿難陀誦經。優波離誦律。大迦葉爲上首。會誦七月而畢。是爲王舍城結集。佛滅度百年。弗栗特族比丘。在毗舍離城。流布非法十事。如午後得飲牛乳。得飲未醱酵酒。得納受金銀等是也。上座耶舍。來毗舍離城。留重閣精舍。慨其非法。特忠告之。至於相爭。分東西二派。西派右耶舍。東派右弗栗

特僧。兩派各舉四人校律。與其事者有七百比丘。衆議弗栗特僧非法。或以是會爲毗舍離結集。然東部諸僧。別開會誦。竟不相下。此佛教分派之漸也。

阿育王在位之時。以僧衆間頗有異論。乃以西曆紀元前二百三十一年。於首府華氏城之鷄園寺。集一千比丘。以目犍連子帝須爲上首。結集佛典。是爲華氏城結集。阿育王將調和東西二派。然二者之爭。終有所未融焉。

二、阿育王時佛教之傳播

方佛住世之時。及其滅度後二百年間。佛教所播。北至雪山山麓。南至頻闍山脈。西至摩頭羅。東至鴛伽國。大抵在中天竺與東天竺之際。不出恆河流域以外也。及阿育王時。佛教乃大盛。

阿育王建立第十三巖面勅文曰。

阿育王即位第九年。征羯菴伽……既克羯菴伽。乃篤護正法。歸依正法。將弘播正法之教……

王所領住於山林之蠻族。王憐愍之。願彼歸依佛法……蓋王爲一切有情安樂歡喜故。此最上之勝利。卽正法之勝利也。正法之勝利。旣行於王之領域。又及於隣邦六百由旬之遠。如耶婆那 (Yavana 卽希臘)

王恩提約科 Antiyoko 與條蘭馬亞 (Turamaya 卽 Ptoemy) 恩底開尼 (Antikine 卽 Antigonas) 馬加 (Maka 卽 magas) 亞歷斯大 (Aliskasadra 卽 Alexander) 四王所居……皆由阿育王宣說而隨順正法……

據此勅文。則佛教自行於印度以外。所舉外國諸王。如恩提約科。卽西里亞王恩提科斯二世。條蘭馬亞。卽埃及王脫來米二世。恩底開尼。卽馬其頓王恩底哥拉二世。亞歷斯大。卽埃比羅斯 (Epirus) 王亞歷山大。勅文後又載各遣宣教師於諸國。是當時佛教之宣教師。已及西里亞、埃及、馬其

頓埃比羅斯諸國。佛教已達地中海東部矣。

善見律毗尼沙卷二曰

爾時於波吒利弗國。集第三毗尼藏竟。……於是目犍連子帝須。集諸衆僧。語諸長老。汝等各持佛法。至邊地中豎立。諸比立答言善哉。卽遣大德末闍提。汝至罽賓犍陀羅陀國中。摩訶提婆。至摩醯娑慢陀羅國。勒棄多。至婆那婆私國。量無德。至阿波蘭多迦國。摩訶量無德。至摩訶勒陀國。摩訶勒棄多。至與那世界國。末示摩。至雪山邊國。須那迦鬱多羅。至金地國。摩哂陀鬱地夜。參婆樓拔陀。至師子國。各豎立佛法。宣敎所遣派之國。以今地名對照之如左。

罽賓犍陀羅陀

加西米亞、卑西亞瓦

摩醯娑慢陀羅

南印度孟索爾

婆那婆私

拉齊布達臘

阿波蘭多迦

本齊亞布西部

摩訶勒吒

賀壁及其南方

與那世界

阿富汗北部及東部

雪山邊

尼泊爾國

金地國

緬甸沿岸

師子國

錫蘭島

三、阿育王以後四世紀之佛教

阿育王以後三四百年。佛教漸盛於阿富汗中國錫蘭諸地。而印度內地反衰。西曆紀元前第二世紀。婆羅門武將富奢密多羅。篡孔雀王朝。於中天竺之地。大黜佛教。燒焚寺院。殺戮僧尼。不可勝計。而北天竺佛法猶明。未幾中天竺之僧徒。勢稍稍復。至分十八派。

錫蘭佛教。實自阿育王啟之。以後國王相承。遂重佛法。西曆紀元前二世

紀。脫達加門尼王始建佛塔。紀元前一世紀瓦達加門尼王築無畏山精舍。又書寫口傳之巴利三藏。其後婆蹉婆王又造堂塔伽藍等云。

四、迦膩色迦王時代之佛教。

第二世紀。迦膩色迦王時。佛教又大盛。迦膩色迦。本月氏之裔。後漸併西北印度。及中天竺之一部。王始聞善見比丘之說。歸依佛門。未幾自發願請世友、馬鳴、脇以下諸學者。會於迦涇彌羅城。結集經典。十二年而後成。玄奘所傳。經律論三藏。大抵卽此會之所結集也。

王又於首府布路沙城。建立迦膩色迦寺。是時大乘教之傳始盛。馬鳴大士唱真如緣起論。以宇宙本性。卽不生不滅平等之體。是名真如。創性相合一之宗。

五、西曆第二三世紀之時代。

西曆第二世之末葉。南天竺毗達婆之地。有龍樹比丘出焉。居於黑峰山。

受般若經之教義。唱諸法皆空之說。爲大乘空教之祖。故曰。因緣所生法。我說卽是空。又有提婆。錫蘭人。爲龍樹之門人。嘗著百論。與龍樹之中論。十二門論。合稱三論。

錫蘭當西曆紀元二百九年。帝須王之世。僧衆中有主張邪義者。王屈之。力護正法。及無畏王朝。無畏山之比丘僧友。又對律作臆解。以求自恣。頗生諍論。教派又以多岐矣。

六、西曆第四五世紀之時代

西曆紀元約四百年。而無著菩薩生。無著者。健陀羅國布路沙城婆羅門學者。憍尸迦之子也。少習婆羅門教。長游北天竺。始修佛法。弘大乘之旨。承解深密經及瑜珈師地論。唱賴耶緣起論。無著之弟世親。生於西曆四百二十年。繼無著之緒論。西曆五百年。歿於阿瑜陀。無著世親。立大乘有門。分析八識。以阿賴耶識爲本。是唯識宗也。

法顯以西曆四百十一年入印度。嘗至錫蘭。云無畏山有五千摩訶毗訶羅。三千僧云。

七、西曆第六七世紀時代

西曆第六世紀。而陳那生於南天竺案達羅國。著因明入正理論。而印度因明學一新。又傳無著世親之賴耶緣起論者。有護法。著成唯識論。而南天有清辨。承龍樹之諸法皆空論。與護法相抗。又有戒賢。則宗護法之學。清辨弟子智光。又與戒賢並峙。玄奘至西域。實與聞二派之餘論焉。

此時代中。至中國傳佛教者。有菩提流支。菩提達磨。真諦。闍那崛多。達磨笈多。法藏（賢首大師）等。

八、印度佛教之衰頹

西曆八世紀之中葉。印度佛教漸衰。中天竺摩竭提等地。正法益微。惟南天竺。僅有傳者。其自印度來中土弘教者。有善無畏。金剛智。不空。實義。

難陀等。而中土義淨法師。於七世紀末游印度。留滯南海諸國。返國之後。頗有譯述。

印度佛教既衰。而婆羅門教復興。及西曆千二百年。回教入印度。寺院多被殘毀。佛教徒多避地於南天竺及西藏。此後日益陵遲矣。

第二節 佛教東漸略述

佛教東漸。其道有二。並集成於中國。一爲北方之傳。由印度北部。東經土耳其。古斯坦。以入中國者也。一爲南方之傳。由印度。錫蘭。緬甸。斯馬脫。拉。爪哇。暹羅。安南。以入中國者也。而朝鮮。日本。則又概中國之餘流者焉。

一、西域之佛教

東土耳其古斯坦之中央。有沙漠焉。分南北二道。由西域通中國者。不取南道。必取北道。今合舉東方樞要諸國。如于闐。疎勒。龜茲。高昌等如左。

于闐。今稱和闐。Khotan。古時其領域頗廣。爲土耳其古斯坦文明之中心。于

闐佛教。自迦溼彌羅僧毗盧舍那。始來開教于闐國王。親受歸依。建贊摩寺。毗盧舍那之至于闐。其年世不詳。惟魏高貴卿公甘露五年。（西曆二百六十年）朱士行往于闐國。得放光般若經。梵本。則于闐有大乘教久矣。第五世紀。法顯至于闐時。稱有大乘僧數萬人。第七世紀。玄奘過于闐。亦謂有僧衆數萬。他如華嚴經。涅槃經等。皆自于闐傳於中國者也。

疎勒爲今之喀什噶爾。Kashgar 在古爲土耳其斯坦之強國。商業貿易之中焉。其國佛教亦傳自于闐。蓋于闐與疎勒交通尤繁。故于闐弘法而疏勒化之。然僅有小乘。羅什止疏勒一年。誦小乘書。玄奘取道。亦謂有小乘僧一萬餘人也。

龜茲者。今之庫車。Kucha 其佛教自北印度傳來。西曆第四世紀。羅什之母。在首都詣佛寺聞法。其後卑摩羅義及羅什等。皆以弘法爲志。方唐之時。龜茲佛教甚盛。

高昌者。今之士魯番。Futian 其國佛法。由北印度及于闐傳來。自晉以來頗盛。近時德人谷林韋戴。A. Grünwede 於此地發掘寺院古址。於佛教事實多所考見云。

二、中國之佛教

後漢明帝時。遣蔡愔秦景等至印度求佛經。卽西曆紀元六十五年也。使者至印度。得佛像經卷。與迦葉摩騰同歸。西曆紀元六十七年未幾。竺法蘭亦踵至。是爲佛教傳於中國之始。自此二百年間。印度及西域佛教家。至中國學漢文。傳教翻譯者甚衆。如羅什、覺賢、曇無讖、功德鎧、功德賢。其最著者也。是後異域名僧。代有來者。中國佛教日隆。且以之傳於外國焉。

三、朝鮮及日本之佛教

東晉時。秦苻堅遣僧道順如高麗。贈小獸林王以佛像經論。是朝鮮有佛教之始。西曆紀元三百年其後印度僧摩羅難陀。自中國往百濟傳佛法。西曆紀元三百八十年

年^五至西曆紀元四百二十五年。高麗僧墨胡子開教於新羅。於是三韓並有佛教矣。及百濟新羅爲朝鮮所併。佛法彌盛。大德輩出焉。

日本之佛教。傳自百濟。西曆紀元五百五十二年。百濟王聖明。以佛像經論幡蓋等。獻於日本。是爲日本有佛教之始。於是建向原寺。則日本最早之佛寺也。其後三韓高僧。頗有來者。平安遷都時代。有傳教弘法二大家。出。佛法彌盛。鎌倉以後。新宗派滋多矣。

四、西藏及蒙古之佛教

西曆紀元六百三十二年。西藏王弄贊。遣使於印度。求文學及經論。自是佛教頗入西藏。後與本地所行教派齟齬。經典寺院。悉遭毀滅。及北印度烏仗那國僧蓮華生。游歷耶度諸國。學密宗。西曆七百四十七年至西藏。得國人之崇敬。二年以後。建立山亞司寺。Samyas 是爲西藏喇嘛教之祖。此後西藏佛教。率爲喇嘛教矣。西曆第十三世紀之際。元世祖忽必烈。保

護喇嘛教。於是喇嘛教大行於蒙古。

五、緬甸、暹羅、安南之佛教

緬甸佛教。淵源頗古。阿育王時。（西曆紀元前三世紀）遣宣布佛教者於外國。其中已有金地國。卽緬甸是也。或曰須那迦與鬱多羅二人。實爲開教之宗。自是歷代君民。無不信佛。暹羅佛教。在西曆紀元六百三十八年。始由錫蘭傳入。皆小乘教徒。安南佛教。由中國傳入。亦多小乘教。六、爪哇、斯馬脫拉之佛教

南洋諸島之佛教。以爪哇及斯馬脫拉爲盛。先是西曆紀元四百十五年。功德鎧至爪哇布佛教。國王及王母以下。皆信奉之。自是大乘教頗行。西曆紀元七世紀之末。義淨沙門。亦嘗至南洋諸州。斯馬脫拉之佛法。則唐代自爪哇傳入。今已陵替矣。

第三節 四教之分判

佛滅度後。經典屢經結集。大抵以經律論。分爲三藏。龍樹又以呪爲一藏。共四藏。其後印度諸師。各尊所聞立論。異派漸多。莫可勝詳矣。佛說自漢魏時。已入中夏。羅什以後。傳譯始富。極盛於江左。士人往往留意義學。高僧顯德。亦間出焉。雖闡宗弘法。各有令名。至於包諸藏之菁英。明如來之權實。於釋迦所說教義。條分件析。罄無不盡。則未有詳於天台智者大師之判四教者也。蓋東流經典。悉括其中。若網在綱。粲然可覩。真佛學之門徑。三乘之總持。請畧述之。

隋時天台智者大師。承北齊慧文禪師及南嶽慧思禪師之學。以五時八

教。並化儀四教言之故爲八教判東流諸佛經。無所不盡。言五時者。一華嚴時。說華嚴經二鹿苑

時。說四阿含經三方等時。說維摩經。三昧金光明勝鬘等經四般若時。說摩訶般若光讚般若金剛

五法華涅槃時。說法華涅槃等經是爲五時。亦名五味。言四教者。藏通別圓。合以頓

漸秘密不定。是爲八教。頓等四教是化儀。如世藥方。藏等四教。乃名化法。

如辨藥味。今依智者所作四教義。掇其大要如左。

先述化儀四教。舉五時五味隸於其中。使覽者易明。其後乃敘藏通別圓四教。

化儀四教。第一頓教者。卽華嚴經也。所謂如來初成正覺。在寂滅道場。四十一位法身大士。及宿世根熟天龍八部。一時圍繞如雲籠月。爾時如來現盧舍那身。說圓滿修多羅教。故言頓教。然約機約教觀之。未免兼權。謂初發心時。便成正覺等文。爲圓機說圓教。而處說行布次第。則爲權機說別教。故約部爲頓。約教名兼。此爲第一時。經中云。譬如日光。先照高山。其味比於乳。涅槃云。譬如出牛出乳。此從佛出十二部經。法華信解品云。卽遣旁人。急追將還。窮子驚愕。稱怨大喚等。此喻聲聞在座。如聾如瘖。不能解悟也。

第二漸教。獨有三時三味。總名曰漸。蓋爲三乘根性。徒恃頓悟。難以普教。

故不動寂場。而游鹿苑。脫舍那珍御之服。著丈六弊垢之衣。示從兜率降下。託摩耶胎。住胎。出胎。納妃。生子。出家。苦行六年以後。在菩提樹下。以草爲座。成劣應身。初在鹿苑。先爲憍陳如等五人說四諦十二因緣六度等教。是爲第二時。如日照幽谷。其味如從乳出酪。從十二部經。出九部修多羅。信解品云。而以方便。密遣二人。緣覺形色憔悴。無威德者。汝可詣彼。徐語窮子。雇汝除糞。此喻於頭後說三藏教。二十年中。常令除糞。卽破見思煩惱等義是也。次明方等部。淨名等經。彈偏斥小。歎大褒圓。四教俱說。藏爲半字教。通別圓爲滿字教。對半說滿。故言對教。是爲第三時。猶如食時。味則從酪出生酥。此從九部出方等。信解品云。過是以後。心相體性。入出無難。然其所止。猶在本處。蓋三藏之後。次說方等。已得道果。心相體信。聞罵不瞋。內懷慚愧。心漸淳淑也。次說般若。轉教付財。融通淘汰。此般若中。不說藏教。帶通別二。正說圓教。是爲第四時。如日在禺中時。味如從生酥。

出熟酥。此從方等之後。出摩訶般若。信解品云。是時長者有疾。自知將死。不久。語窮子言。我今多有金銀珍寶。倉庫盈溢。其中多少。所應取與。明方等之後。次說般若。般若觀慧。卽是家業。空生身子。受敕轉教。卽是領知等也。已上三味。對華嚴頓教。總名爲漸。

第三秘密教者。如前四時中。如來三輪不思議故。或爲此人說頓。或爲彼人說漸。彼此互不相知。能令得益。故言秘密教。

第四不定教者。亦由前四味中。佛以一音演說法。衆生隨類各得解。此則如來不思議力。能令衆生。於漸說中得頓益。於頓說中得漸益。如是得益不同。故言不定教也。

已上頓漸秘密不定。是爲化儀四教。僅有四時。漸教獨備三時。而秘密不定。悉在前四時之中。惟非頓非漸非秘密非不定者。乃爲第五時所攝。卽法華涅槃經也。如來次說法華。開前頓漸。會入非頓非漸。故言開權顯實。

又言廢權立實。又言會三歸一。言權實者。名通今昔。義意不同。謂法華已前。權實不同。大小相隔。如華嚴時一權一實。別圓權實各不相卽。大不納小。故小雖在座。如聾如啞。是故所說法門。雖廣大圓滿。攝機不盡。不暢如來出世本懷。所以者何。初頓部有一麤一妙。別教爲麤一妙則與法華無二無別。若是一麤。通待法華開會廢了。方始稱妙。次鹿苑。但麤無妙。教藏次方等三麤。別通一妙。次般若。二麤。別通一妙。來至法華會上。總開會廢。前四味麤。令成一乘妙。諸味圓教。更不須開。本自圓融。不待開也。但是部內。兼對帶故。不及法華純一無雜。獨得妙名。良有以也。故文云。十方佛土中。唯有一乘法。無二亦無三。一教正直捨方便。但說無上道。一行但爲菩薩。不爲小乘。一人世間相常住。一理時人未得法華妙旨。但見部內有三車窮子化城等譬。乃謂不及餘經。蓋不知重舉前四時權。獨顯大車。但付家業。唯至寶所。故致誹謗之咎。此爲第五時。如日輪當午。罄無側影。味則如從熟酥出醍醐。此從

摩訶般若出法華。信解品云。聚會親族。卽自宣言。此實我子。我實其父。吾今所有。皆是子有。付與家業。窮子歡喜。得未曾有。蓋般若之後。次說法華。先已領知庫藏諸物。臨命終時。直付家業而已。譬前轉教。皆知法門。說法華時。開示悟入佛之知見。授記作佛而已。次說大涅槃者。有二義。一爲未熟者。更說四義。具談佛性。令具眞常。入大涅槃。故名拈捨教。二爲末代鈍根。於佛法中。起斷滅見。天傷慧命。亡失法身。設三種權。扶一圓實。故名扶律談常教。然若論時味。與法華同。法華合此經。並是第五時也。天台獨尊法華。故或云法華宗。

或問將五味對五時教。其意如何。答有二。一者但取相生次第。所謂牛譬於佛。五味譬教。乳從牛出。酪從乳生。二酥醍醐。次第不亂。故譬五時相生次第。二者取其濃淡。此則取下劣根性。所謂二乘。在華嚴座。不信不解。不變凡情。故譬其乳。次至鹿苑。聞三藏教。二乘根性。依教修行。轉凡成聖。故

譬轉乳成酪。次至方等。彈斥聲聞。慕大恥小。得通教益。如轉酪成生酥。次至般若。奉勅轉教。心漸通泰。得別教益。如轉生酥成熟酥。次至法華。開三周說法。得記作佛。如轉熟酥成醍醐。此言最鈍之根。須具經五味。其次者。或經一二三四味。其上達根性。味味得入法界實相。不必待法華開會矣。已上錄五味五時化儀四教。大綱如此。自下明化法四教。

第一、三藏教

三藏者。一修多羅藏（四阿含等經）二阿毗曇藏（俱舍婆娑等論）三毗尼藏（五部律）此之三藏。名通大小。天台所謂藏教。則惟取小乘三藏也。大智度論云。迦旃延子。自以聰明利根。於婆沙中。明三藏義。不讀衍經。非大菩薩。又法華曰。令著小乘。三藏學者。依此等文。故天台大師。稱小乘爲三藏教。

此有三乘根性。初聲聞人。依生滅四諦教。四諦者。苦、集、滅、道。四諦也。（一）

苦諦二十五有。依正二報。是言二十五有者。四洲四惡趣。六欲并梵天。四
禪四空處。無想五那含。四洲四趣成八六欲天井梵王天成十五四禪別則二十
五有。總則六道生死。一地獄道。梵語捺落迦。又語泥黎。此翻苦具。而言地
獄者。此處在地之下。故言地獄。謂八寒八熱等八獄。各有眷屬。其類無數。
其中受苦者。隨其作業。各有輕重。經劫數等。其最重處。一日之中。八萬四
千生死。經劫無量。作上品五逆十惡者。感此道身。二畜生道。亦云旁生。此
道遍在諸趣。披毛帶角。鱗甲羽毛。四足多足。有足無足。水陸空行。互相吞
啖。受苦無窮。愚癡貪欲。作中品五逆十惡者。感此道生。三餓鬼道。梵語閻
黎哆。此道亦遍諸趣。有福德者。作山林塚廟神。無福德者。居不淨處。不得
飲食。常受鞭打。填河塞海。受苦無量。諂誑心意。作下品五逆十惡。感此道
身。四阿脩羅道。此翻無酒。又無端正。又無天。或在海岸海底。宮殿嚴飾。常
好鬪戰。怕怖無極。在因之時。懷猜忌心。雖行五常。欲勝他故。作十品十善。

感此道身。五人道。四洲不同。謂東弗婆提。壽二百五十歲南閻浮提。壽一百歲西瞿耶尼。

壽百歲北鬱單越。壽一千歲命無中天。聖人苦樂相間。在因之時。行五常五戒。

不盜不邪不妄不飲酒行中品十善。感此道身。六天道。二十八天不同。界欲

六天無色界四天初欲界六天者。一四天王天。居須彌山腹二忉利天。居須彌山頂此有三

得上品十善三夜摩天。日兜率天。五化樂天。六他化自在天。品十善兼坐未到定

其得中生次色界十八天。分爲四禪。初禪三天。梵衆梵輔大梵二禪三天。少光無量三禪二

天。少淨無量四禪九天。其中無想天外道所居無煩無熱善見善現色究竟已上五天

第三果居處上之九天離欲處散未出。三無色界四天。空處識處無所有處非非無色

蘊故得名也上來所釋。從地獄至非非想天。雖然苦樂不同。未免生而復死。死

已還生。故名生死。此是藏教實有苦諦。

(二)集諦。卽見思惑。又云見脩。又云四住。又云染污無知。又云取相惑。又

云枝末無明。又云通惑。又云界內惑。雖名不同。但見思耳。所謂見惑者。有

八十八使。一身見。二邊見。三見取。四戒取。五邪見。利已上使六貪。七瞋。八癡。九慢。十疑。鈍已上使此十使歷三界四諦下。增減不同。成八十八。謂欲界苦十使具足。集滅各七使。除身見邊見戒取。道諦八使。除身見邊見。四諦下合爲三十二。上二界四諦下。餘皆如欲界。只於每諦下除瞋使。故一界如有二十八。二界合五十六。并前三十二。合爲八十八使也。所謂思惑者。有八十一品。謂三界分爲九地。欲界合爲一地。四禪定爲八。共爲九地。欲界一地中。有九品貪瞋癡慢。上八地除瞋使。各有九品。故成八十一也。以上見思惑不同。總是藏教實有集諦。

(三) 滅諦。滅前苦集。顯偏真理。因滅會真。然滅非真諦也。

(四) 道諦。略則戒定慧。廣則三十七道品。此三十七。合爲七科。一、四念處。一觀身不淨。蘊色二觀受是苦。蘊受三觀心無常。蘊識四觀法無我。蘊想行二、四正勤。一未生惡令不生。二已生惡令滅。三未生善令生。四已生善令增長。三

四如意定。進欲念四五根。定信進念五五力。根同名上六七覺支。念擇進喜七八正道。見正

正思惟正語正業正精進正定正會正命已上七科即是藏教生滅道諦。

然如前所列四諦名數。通下三教。但是隨教廣狹勝劣。生滅無生無量無作不同耳。故向下名數。更不再列。四諦之中。分世出世。前二諦為世間因果。集苦果後二諦為出世間因果。道滅因果所以世出世必前因後果者。聲聞鈍根。知苦斷集。慕果修因也。

今當畧明藏教脩行人之與位。(一)聲聞位分為二。初凡。二聖。凡又分為二。外凡內凡。外凡中自分三。初五倚心。一多貪衆生不淨觀。二多瞋衆生慈悲觀。三多散衆生數息觀。四愚癡衆生因緣觀。五多障衆生念佛觀。二別相念處。念如前四三總相念處。一觀身不淨。受心法皆不淨。乃至觀法無我。身受心亦無我。已上三科名外凡。亦名資糧位。內凡者有四。謂煥頂忍世第一。此四位為內凡。亦名加行位。又名四善根位。總此內外二凡。皆名凡

位。又名七方便位是也。至於聖位亦分三。一見道。初二脩道。三無學

道。四須陀洹位者。此翻預流。此位斷三界八十八使見惑。見真諦。故名爲

見道。又名聖位。斯陀含位者。此云一來。此位斷欲界九品思中。斷前六品

盡。後三品猶在。故更一來。阿那含位者。此云不來。此位斷欲殘思盡。進斷

上八地思。上二修道位。阿羅漢位者。此云無學。又云無生。又云殺賊。又云應供。此

位斷見思俱盡。子傳已斷。果傳猶在。多有餘涅槃。若灰身滅智。名無餘涅

槃。又名孤調解脫。是四者並聖位也。已上總釋聲聞位中凡聖。

(二)緣覺亦名獨覺。值佛出世。稟十二因緣教。所謂一無明。煩惱障。二行。業障。

業道此二支屬過去。三識。託胎一分氣直。四名色。名是心色是實。五六入。六根成此胎中。六觸。胎出。七受。領納前境好惡等事從識至受名現在五

果。八愛。愛色男女金錢等物事。九取。凡見一切境皆生取著心此二未來因皆屬煩惱如過去無明。十有。業已成就是未來因屬業道如過去行。

十一生。未來受生事。十二老死。此是所滅之境。與前四諦開合之異耳。云何開合。

謂無明行愛取有。此之五支。合爲集諦。餘七支爲苦諦也。既名異義同。何

故重說。爲機宜不同故。緣覺之人。先觀集諦。所謂無明緣行。行緣識。乃至生緣老死。此則生起。若滅觀者。無明滅則行滅。乃至生滅則老死滅。因觀十二因緣。覺眞諦理。故言緣覺。言獨覺者。出無佛世。獨宿孤峯。觀物變易。自覺無生。故名獨覺。此人斷三界見思。與聲聞同。更侵習氣。故居聲聞上。此明緣覺修行位也。

(三) 菩薩位者。從初發心。緣四諦境。發四弘願。脩六度行。一未度者令度。卽衆生無邊誓願度。此緣苦諦境。二未解者令解。卽煩惱無盡誓願斷。此緣集諦境。三未安者令安。卽法門無量誓願學。此緣道諦境。曰未得涅槃者。令得涅槃。卽佛道無上誓願成。此緣滅諦境。既已發心。須行行填願。於三阿僧祇劫。修六度行。百劫種相好。言三阿無僧祇數劫時者。且就釋迦脩菩薩道時例之。從古釋迦至尸棄佛。值七萬五千佛。名初阿僧祇。從此常離女身。及四惡趣。常脩六度。然自不知當作佛。若望聲聞位。卽五停心。

總別念處。凡外次從尸棄佛至然燈佛。值七萬六千佛。名第二阿僧祇。此時用七莖蓮華供養。布髮掩泥。得受記莚。號釋迦文。爾時自知作佛。口未能說。若望聲聞位。卽煥位。次從然燈佛至毗婆尸佛。七萬七千佛。名第三阿僧祇。滿。此時自知。亦向人說。必當作佛。自他不疑。若望聲聞位。卽頂位。經如許時。修六度。竟更住百劫。種相好因。脩百福。成一相。福義多途。難可定判。又云。大千盲人治差。爲一福等。脩行六度。各有滿時。如尸毗王代鴿檀。滿。普明王捨國尸滿。羸提仙人。爲歌利王割截。無恨忍。大施太子杼海。并七日翹足。讚弗沙佛。進滿。如是等類。望初聲聞位。是下忍位。次入補處。生兜率。託胎。出胎。出家。降魔。安心不動。爲中忍位。次一剎那。入上忍位。次一剎那。入世第一位。發眞無漏三十四心。頓斷見思習氣。坐菩提樹下。生草爲座。成劣應丈六身佛。受梵王請。三轉法輪。度三根性。經世八十年。現老比丘相。薪盡火滅。入無餘涅槃者。卽三藏佛果也。

已上所述。聲聞緣覺菩薩修行證果。雖則不同。然同斷見思。同出三界。同證編真。此是天台所判藏教之大畧也。

第二通教

通教者。通前藏教。通後別圓。故名通教。又從當教得名。謂三人同以無言說道。體色入空。故名通教。依大品經乾慧等十地。卽是此教位次也。

一、乾慧地。未有理水。故得其名。卽外凡位與藏教五停心總別等三位齊。
二、性地。相似得法性水。伏見思惑。卽內凡位。與藏教四善根齊。
三、八人地。四見地。此二位入無間三昧。斷三界八十八使見盡。發真無漏。見真諦理。與藏教初果齊。
四、薄地。斷欲界九品思。前六品與藏教二果齊。
五、離欲地。斷欲界九品思盡。與藏教三果齊。
六、已辦地。斷三界見思惑盡。但斷正使。不能侵習。如燒木成炭。與藏教四果齊。
七、聲聞位止。此八辟支佛地。更侵習氣。如燒木成灰。九菩薩地。正使斷盡。與二乘同。扶習潤生。道觀雙流。遊戲。

神通。淨佛國土。十佛地。機緣若熟。以一念相應慧。頓斷殘習。坐七寶菩提樹下。以天衣爲座。現帶劣勝。應身成佛。爲三乘根性。轉無生四諦法輪。緣盡入滅。正習俱除。如炭灰俱盡。經云。三獸度河。謂象馬兔也。喻斷惑不同。故。又經云。諸法實相。三乘皆得。亦不名佛。卽此教也。

此教三乘。因同果異。證果雖異。同斷見思。同出分段。同證偏真。然於菩薩中。有利鈍二種。鈍則但見偏空。不見不空。止成當教果。頭佛行因。雖殊。果與藏教齊。故言通前。若利根菩薩。非但見空。兼見不空。不空卽中道。分二種。謂不但。謂見但中。別教來接。若見不但中。圓教來接。故言通後。受接人三根不同。若上根。三地四地被接。中根之人。五地六地。下根之人。七地八地。所接之教。真似不同。若似位被接。別十迴向。圓十信位。若真位受接。卽別之初地。圓之初住。或曰。此藏通二教。同是三乘。同斷四住。止出三界。同證偏真。同行三百由旬。同入化城。何故分二。答曰。所證雖同。大小巧拙。

永異。此之二教。是界內教。藏是界內小拙。不通於大故小。析色入空故拙。此教三人。雖當教內有上中下異。望通三人。則一概鈍根。故須析破也。通教則是界內大巧。大謂大乘初門故。巧謂體色入空故。雖當教中之人。上中下異。若望藏教。則一概爲利。又問曰。教旣大乘。何故有二乘之人。答曰。朱雀之門。而氓庶可以出入。故人雖有小。教定是大。大乘兼小。漸引入實。豈不巧哉。般若方等部經。卽通教也。

第三別教

別教明界外獨菩薩法。教理智斷行位因果。別前二教。別後圓教。故名別也。涅槃云。四諦因緣。有無量相。非聲聞緣覺所知。諸大乘經。廣明菩薩歷劫修行。行位次弟。互不相攝。此並別教之相也。

華嚴明十住。十行。十迴向。爲賢。十地爲聖。妙覺爲佛。瓔珞明五十二位。金光明。但出十地佛果。勝天王明十地。涅槃明五行。如是諸經。增減不同者。

界外菩薩。隨機利益。豈得定說。然位次周足。莫過瓔珞經。故今依彼。略明菩薩斷證之相。

瓔珞以五十二位。束為七科。謂信住行向地等妙。又合七為二。初聖二凡。就凡又二。信為外凡。住行向為內凡。亦名為賢。約聖亦二。十地等覺為因。妙覺為果。初言十信者。一信。二念。三精進。四慧。五定。六不退。七迴向。八護法。九戒。十願。此十位。伏三界見思煩惱。故名伏忍位。凡外與藏教七賢位通。與通教乾慧性地齊。十住者。一發心住。斷三界見惑盡。與藏教初果通。教八人見地齊。二治地。三修行。四生貴。五具足方便。六正心。七不退。已上六住。斷三界思惑盡。得位不退。與藏通二佛齊。八童真。九法王子。十灌頂。已上三住。斷界內塵沙。日伏界外塵沙。前二不知名日。亦名習種性。用從假入空觀。見真諦理。開慧眼。成一切智行。三百由旬。十行者。一歡喜。二饒益。三無違逆。四無屈撓。五無癡亂。六善現。七無著。八難得。九善法。十真實。斷界外塵沙惑。亦云性種性。用從空入假觀。見俗諦。開法眼。成道種智。十迴向者。一救護衆生離

衆生相。二不壞。三等一切諸佛。四至一切處。五無盡功德藏。六入一切平等善根。七等隨順一切衆生。八真如相。九無縛無著解脫。十入法界無量。

伏無明習中觀

十地者。一歡喜。

從此用中道觀破一分無明顯一此是見道位。又無功用位。百

凡已上三十位爲三賢亦名內

界作佛。八相成道。利益衆生。行五百由旬。初入實報無障關土。初入寶所。

二離垢地。三發光地。四饒慧地。五難勝地。六現前地。七遠行地。八不動地。

九善慧地。十法雲地。已上九地各斷一品更斷一品入等覺位。亦名金剛心。

亦名一生補處。亦名有上士。更破一品無明。入妙覺位。坐蓮華藏世界。七

寶菩提樹下。大寶華王座。現圓滿報身。爲鈍根菩薩衆。轉無量四諦法輪。

卽此佛也。有經論說。七地以前。名有功用道。八地已上。名無功用道。妙覺

位。但破一品無明者。總是約教道說。有處說初地斷見。至六地斷思。與羅

漢齊者。此乃借別教位名。明通教位耳。有云三賢十聖住果報。唯佛一人。

居淨土。此借別教名。明圓教位也。如此流類甚衆。須細知當教斷證之位。至何位。斷何惑。證何理。往判諸教諸位。無不通達矣。此述別教之大畧也。

第四圓教

圓教者。圓明。圓妙。圓滿。圓足。圓頓。故名圓教。諸大乘經論。說大乘境界。不共三乘位次。總屬此教也。法華中開示悟入四字。對圓教住行向地。此四十位。華嚴云。初發心時。便成正覺。所有慧身。不由他悟。清淨妙法身。湛然應一切。此明圓四十二位。維摩經云。蘆蔔林中。不嗅餘香。入此室者。唯聞諸佛功德之香。又云。入不二法門。般若明最上乘。涅槃明一心五行。又經云。有人入大海浴。已用一切諸河之水。又安伽羅龍。澍車軸雨。唯大海能受。餘地不堪。又擣萬種香爲丸。若燒一塵。具足衆氣。如是等類。並屬圓教。今且依法華瓔珞。略明位次有八。一、五品弟子位。法外凡出二、十信位。內三三、十住位。初聖四、十行。五、十迴向。六、十地。七、等覺。位是因末八、妙覺。位是果

所謂五品位者。(一)隨喜品。經云。若聞是經而不毀訾。起隨喜心。問隨喜何法。曰妙法。妙法者。即是心也。妙心體具。如如意珠。心佛及衆生。是三無差別。此心卽空。卽假。卽中。常境無相。常智無緣。無緣而緣。無非三觀。無相而相。三諦宛然。初心知此。慶已慶人。故名隨喜。內以三觀。觀三諦境。外以五悔。勤加精進。助成理解。言五悔者。有二。一理。二事。理懺者。若欲懺悔者。端坐念實相。衆罪如霜露。慧日能消除。卽此義也。言事懺者。晝夜三時。三業清淨。自披陳過罪。凡無始以來。五逆十惡。及餘一切。隨意發露。更不覆藏。畢故不迭新。如是則外障漸除。內觀增明。修圓行者。亦復如是。正觀圓理事行相助。乃能速至妙覺彼岸。合以勸請。隨喜。廻向。發願。爲五悔。勸請者。勸請十方如來。留身久住。濟含識。隨喜者。隨喜稱讚諸善根。廻向者。所有稱讚善。盡廻向菩提。發願者。若無發心。萬事不成。故以發心導前四者。下去諸位。直至等覺。總用五悔。例此可知。(二)讀誦品。經云。何況誦讀受

持之者。謂內以圓觀。更加讀誦。如膏助火。(三)說法品。經云。若有受持讀誦。爲他人說。內解轉勝。導利前人。化功歸己。心倍勝前。(四)兼行六度。經云。況復有人。能持是經。兼行布施等。福德力故。倍增觀心。(五)正行六度。經云。若人讀誦。爲他人說。復能持戒等。謂自行化他。事理具足。觀心無關。轉勝於前。不可比喻。已上爲五品位。外凡位也。與別教十信位同。智者大師。依法華經判。故具引經說。今仍之。

五品位是圓教修行之始。次進六根清淨位。卽是十信。初信斷見惑。顯真理。與藏教初果。通教八人見地。別教初住齊。證位不退也。次從二信至七信。斷思惑。盡與藏通二佛。別教七住齊。三界苦集。斷盡無餘。從八信至十信。斷界內外塵沙惑。盡假觀現前。見俗理諦。開法眼。成道種智。行四百由旬。與別教八九十住。及行向位齊。行不退也。

次入初住。斷一品無明。證一分三德。解脫般若法身。現身百界。八相成道。

廣濟羣生。華嚴經云。初發心時。便成正覺。所有慧身。不由他悟。清淨妙法身。湛然應一切。解曰。初發心者。初住名也。便成正覺者。成八相佛也。是分證果。卽此教真因。次從二住至十住。各斷一品無明。進一分中道。與別教十地齊。

次入初行。斷一品無明。與別教等覺齊。次入二行。與別教妙覺齊。從三行已去。別教之人。尙不知名字。何況伏斷。以別教但破十二品無明故。次從三行已去。至十地。各斷一品無明。增一分中道。卽斷四十品惑也。

更破一品無明。入等覺位。此是一生補處。進破一品無明。入妙覺位。永別無明父母。究竟登涅槃山頂。諸法不生。般若不生。不生不生。名大涅槃。以虛空爲座。成清淨法身。居常寂光土。卽圓教佛相也。

然圓教位次。若不以六卽判之。則多濫上聖。故須六卽判位。所謂一切衆生。皆有佛性。有佛無佛。性相常住。又云。一色一香。無非中道等言。總是理。

卽次從善知識。及從經卷聞見此言。爲名字卽。依教修行。爲觀行卽。位五品

相似解發。爲相似卽。位十分破分見。爲分證卽。從初住至等覺智斷圓滿。爲究竟卽。

位妙覺

約修行位次。從淺至深。故名爲六。約所顯理體。位位不二。故名爲卽。

已上是明圓教位之大畧也。

然依上四教。修行時有方便。有正修。方便謂二十五方便。正修謂十乘觀

法也。若教教各明。其文稍煩。義數雖異。名數不別。故今特總明其要如下。

言二十五方便者。束爲五科。一具五緣。二訶五欲。三棄五蓋。四調五事。五

行五法。何謂具五緣。一持戒清淨。二衣食具足。三間居靜處。四息諸緣務。

五近善知識。善知識有三。一外護善知識。二同善知識。三教授善知識。何謂訶五欲。一訶色。二訶聲。三訶

香。四訶味。五訶觸。何謂棄五蓋。一棄貪欲。二棄瞋恚。三棄睡眠。四棄掉侮。

五棄疑。何謂調五事。一調心。二調身。三調息。四調眠。五調食。何謂行五法。

一欲。

欲離世間一切諸禪定智慧。一欲得一切諸禪定智慧。一二精進堅持禁戒。三念。念世間欺誑可輕可賤。禪定智慧可重可貴。

四巧慧。世間樂得失輕重五一心。此是四教二十五方便也。

正修卽十乘觀法。亦四教名同義異。今且明圓教。餘教例此。一觀不思議

境。二真正發菩提心。三善巧安心止觀。四破法徧。破以三惑五識通塞。爲塞集

滅道爲通六通品調適。七對治助開。八知位次。九能安忍。十離法愛。莫著十信相似之道須入

初住眞實之理此十乘觀法之目也。

右僅畧述天台化儀四教化法四教之大要。欲知厥詳。當考原書。又如法

華玄義。淨名玄義等。亦明教相。可以參考也。

第四節 五教之分判

隋時智者大師判四教之後。唐初賢首國師名法藏。即華嚴第三祖又重判五教。

今復畧述之。至教中諸名位。有已詳於四教者。則粗舉其目。不復備陳。

賢首大師判釋一代佛教。不出三時十儀五教六宗三觀。今分別述之。

三時有別有通。別三時者。第一日出先照時。爲圓頓大根衆生。轉無上根。

本法輪名爲直顯教。令彼同教一乘人等。轉同成別。故華嚴云。譬如日出。先照須彌山等諸大高山。如來亦復如是。成就無邊法界智輪。常放無礙智慧光明。先照菩薩諸大山王。法華方便品云。我始坐道場時。卽自思惟。若但讚佛乘。衆生沒在苦。不能信是法。破法不信故。信解品云。爾時長者。處師子座。眷屬圍繞。諸人侍衛。出內財產。注記券疏。窮子見父。馳走而去。卽勅使者追著將來。窮子驚喚。迷悶躡地。其經卽是華嚴梵網等也。

第二日昇轉照時。此轉照時。如上中下三類衆生。轉依本起末法輪。名爲方便教。令彼三等人類。轉三成一。故照有三轉。謂初轉中轉後轉時也。初轉時者。謂佛初於鹿苑。爲鈍根下類衆生。轉小法輪。名爲隱實教。令彼凡夫外道。轉凡成聖。華嚴云。次照黑山。如來智輪。次照聲聞緣覺。法華云。長者知子愚癡狹劣。卽以方便更遣餘人。眇目矜陋。無威德者。汝可語之。云當相雇。除諸糞穢。倍與汝價。窮子聞之。歡喜隨來。爲除糞穢。淨諸房舍。其

經卽是提胃阿舍等也。中轉時者。謂佛次於中時。爲中根一類衆生。轉三乘法輪。名爲引攝教。令彼二乘人等。轉小成大。華嚴云。次照高原。如來智輪。次照決定善根衆生。隨其心器。示廣大智。法華云。長者有智。漸令入出。經二十年。執作家事。其經卽是深密方廣等也。後轉時者。謂佛次於後時。爲利根上類衆生。轉大乘法輪。名爲融通教。令彼權教三乘。轉權成實。華嚴云。然後普照一切大地。如來智輪。然後普照一切衆生。乃至邪定。亦皆普及。爲作未來利益因緣。令成熟故。法華云。爾時長者。自知不久。示其金銀。眞珠玻瓈。諸物出入。皆使令知。其經卽是妙智般若等也。

第三日。沒還照時。爲上上根衆生。轉攝末歸本法輪。名爲開會教。令彼偏教五乘人等。轉偏成圓。故古德義。取出現文意說云。如日沒時。還照高山。如來智輪。最後還照菩薩諸大山王。十定品云。譬如日天子。用行照曜。晝夜不住。日出名晝。日沒名夜。菩薩亦復如是。法界品云。譬如日輪。無有晝

夜。但出時名晝。沒時名夜。菩薩智輪亦復如是。無有分別。但隨心現。教化衆生。法華方便品云。我見佛子等。志求佛道者。我卽作是念。如來所以出。爲說佛慧故。今正是其時。正直捨方便。但說無上道。教化諸菩薩。無聲聞弟子。信解品云。父知子心。漸已曠大。卽聚親族。說是我子。凡我所有。舍宅人民。悉以付之。恣其所用。子念昔貧。今於父所。大獲珍寶。甚大歡喜。其經卽是法華涅槃等也。

已上言別三時。復有通三時。通三時者。實有十時。第一唯約一念時。謂於一刹那中。卽遍法界無處之處。頓說無量諸法門海。第二盡該一化時。謂從我佛初成道時第二七日。乃至如來般涅槃夜。於此一代時化之中。普遍重重法界之處。常說種種無盡經法。第三遍周三際時。謂盡前後際各無邊劫。常恤周遍。演說諸經。初無暫息。第四攝同類劫時。謂彼三際無邊劫中。一一劫內。各攝無量同類劫海。如長劫唯攝長劫。短劫唯攝短劫。然

時與劫各有多相。華嚴明時有八。謂長、短、染、淨、廣、狹、多、少。劫有十二。謂長、短、一、無數、有量、無量、有盡、無盡。一念不可說一切非劫。於彼無量同類劫中。恆說一切權實教行。第五收異類劫時。謂彼無邊一一劫中。各攝無量異類劫海。如長劫攝短劫。短劫攝長劫等。於彼一切異類劫內。恆說諸法。第六以念攝劫時。謂於一念之中。卽攝前後無量無邊同異類劫。一念既爾。餘一切念。一一念中。皆各普攝盡前後際一切劫海。如是時劫。說無盡教。第七劫念重收時。謂一念中所攝劫內。復有諸念。而彼諸念。復攝諸劫。一念既爾。餘一切念劫內諸念。攝劫亦然。是則念念既不盡。劫劫亦無窮。如因陀羅網。重重無盡。於彼諸劫。說諸經海。第八異類界劫時。謂前之七重。且約同類。如今娑婆一類界等。今辨樹形、江河形等。無量無邊異類界刹。刹既同處。而有時劫不同。亦有時劫相同。而有長短各別分齊。然世界形相略開二十種。華藏品云。須彌山形、江河形、迴轉形、旋流形、輪輞形、壇

壇形。樓林形。樓閣形。山幢形。普方形。胎藏形。蓮華形。佉勒迦形。衆生身形。雲形。諸佛相好形。圓滿光明形。種種珠網形。一切門闥形。諸莊嚴具形。如是等有世界海微塵數。又收彼界。總成人類。謂穢世界。淨世界。小世界。大世界。麤世界。妙世界。狹世界。廣世界。並盡彼界時。常說一切法。第九彼此攝入時。卽彼異類界中所有時。亦復各別相收。或同異類界時。互相攝入。若念若劫。重重無盡。同前四五六七。悉於彼時。恆說諸門。第十以本收末時。謂以非劫爲劫。故如華藏界中。以非劫爲劫。劫卽非劫。念等亦爾。以時無長短。離分限。故以染時分。說彼劫。故以時無別體。依法上立。法旣融通。時亦隨爾。故於此無量不可說劫。常說諸教。初無休息。所謂十儀者。亦有十門。

第一本末差別門 謂本末同時。始終一類。各無異說。然有三位。一若小乘中。則初度陳如。後度須跋。中間亦唯說小益小。如四阿含五部。

律等。二若約三乘。則始終說。三通益三機。中亦說三益。三如密迹等。三若約一乘。則始終唯爲圓機。說於圓極。共中不通小乘三乘。復攝九世。該於前後。更無異說。如華嚴等。然此二類。依於此世根性定者。常開如上一類之法。故佛所演。各通始終。更無前後。

第二依本起末門 此有五類。謂初爲菩薩說。大。二爲緣覺。三爲聲聞。四爲善根衆生。五爲邪定。如出現品。日照高山。及三千初成喻中。廣辨其相。皆明先大後小。約法名從本起末。以於一佛乘。分別說三。故

第三攝末歸本門 依無量義經。初時說小。次說中乘。後時說大。法華亦云。昔於波羅柰。轉四諦法輪。今復轉最妙無上大法輪。深密妙智說。皆先小後大。然此門中。有二類人。一者一人歷修小大。如四大聲聞等。二者先稟小人。未必後時稟大。以小性定故。而聞後時說大。故異前始終俱小。後稟大人。未必要從小來。以有頓悟機故。而知先來

說小故非前始終俱大。

第四本末無礙門 謂初舉照山王之極說。明非本無以垂末。後顯歸大海之異流。明非末無以歸本。故本末交映。與奪相資。方爲攝生之善巧矣。是故通論總有五位。一根本一乘。如華嚴。二密意小乘。三密意大乘。四顯了三乘。皆深密。五破異一乘。如法華。

第五隨機不定門 謂上之四門。初門明三類機。始終常定。次門明五類機。異時常定。三門明一類機。自淺之深。四門明二類機。初機聞頓。後機從淺至深。更有一類不定之機。或從小乘。次入三乘。後入一乘。亦有從小直入一乘。或多類機。隨聞一句。異解不同。

第六顯密同時門 謂同聽異聞。若互相知者。是顯不定。若互不相知者。卽是秘密。顯密同時。亦無前後。

第七一時頓演門 謂上來諸門。一時頓演。華嚴經云。如來於一語言

中。演說無邊契經海。

第八寂寞無言門 謂從初得道。乃至涅槃。不說一句。般若云。我從成道已來。不說一字。汝亦不聞。

第九該通三際門 謂此上諸門。盡通三際。經云。一法門中無量門。無量千劫如是說。

第十重重無盡門 謂前之九門。隨時隨處。重重無盡。皆無前後。經云。毗盧遮那佛。願力周法界。一切國土中。恆轉無上輪。

今當明賢首所判五教。

- 一、小乘教。亦名愚法二乘教。異大乘故。逐機設故。隨他語故。以明法數。一向差別。所謂揀邪正。辦聖凡。分欣厭。析因果也。
- 二、大乘始教。亦名分教。但明諸法皆空。未盡大乘法理。故名爲始。但明一切法相。有成佛不成佛。故名爲分。

三、終教亦名實教。由明緣起無性。一切皆如。定性二乘。無性闡提。悉當成佛。方盡大乘至極之說。故名爲終。以稱實理。故名爲實。

上二教並依地位漸次修成。故總名漸。

四、一乘頓教。但一念不生。卽名爲佛。不依地位漸次說。故思益云。得諸法正性者。不從一地至於一地。楞伽云。初地卽爲八。無所有何次。不同於前。漸次修行。不同於後。圓融具德。故立名頓。問。此若是教。更是何理。答。頓詮此理。故名頓教。別爲一類。離全機。故亦爲對治。空有俱存。三種著相人。故卽順禪宗。

五、圓教。統該前四。圓滿具足。一位卽一切位。一切位卽一位。是故十信滿心。卽攝五位。成正覺等。依普賢法界。性相圓融。主伴無盡。身刹塵毛。交遍互入。故名圓教。華嚴云。顯現自在力。爲說圓滿經。無量諸衆生。悉受菩提記。

已上釋五教名義。今更依各教。詮其法相。

(小教法相) 初小教中。說有七十五法。唯明人空。不明法空。縱說法空。少不明顯。但依六識三毒。建立染淨根本。故阿含云。貪恚愚癡。是世間根本。未盡法源。故多諍論。茲更別舉其中諸門。一說唯六識。分爲心意識。二除佛一人有菩提性。餘諸衆生。無佛種性。三資加見修證中。忍位得不退轉。四、聲聞下根。極疾三生得果。最遲經六十劫。獨覺中根。極疾四生。遲經百劫。如來上根。定滿三祇。五、但分段身。至究竟位。六、斷煩惱障。證我空理。七、既趣寂後。皆無回心。八、佛果相好。唯是無常。九、娑婆閻浮。爲佛報土。三千百億。卽攝化境。十、此釋迦身。報非法。或立爲二。卽有生身化身佛別。(始教法相) 二始教中。廣談法相。少及法性。其所云性。亦是相數。說有百法。決擇分明。故少諍論。但說諸法一切皆空。不說不空中道妙理。其說相義有十。一、說有八識。唯是生滅。依生滅識。建立生死及涅槃因。二、法爾種

子。有無永別。是故三乘五性。決定不同。三、既所立識。唯業惑生。故所立真如。常恆不變。不許隨緣。四、依他起性。似有不無。非卽無性真空圓成。經說空義。但約所執。五、既言三五乘性不同。故說一分衆生。決不成佛。名生界不滅。六、真俗二諦。迥然不同。非斷非常。果生因滅。七、同時四相。滅表後無。八、根本後得。緣境斷惑。義說雙關。決定別照。九、以有爲智。證無爲理。義說不同。而實非一。十、既出世智。依生滅識種。故四智生品。爲相所遷。佛果報身。有爲無漏。其說空義。有五。一、說一切法。皆無自性。卽是真如。二、能了此者。卽名真智。三、所詮法義。不出二諦。法相名俗。無爲爲真。四、有謂依計。空謂圓成。五、雖說佛身。五求不得。卽虛妄。無得乃真。離一切相。名佛功德。次約當教。詳明。亦有十門。一、說賴耶識。爲諸法依。從業種生。唯是生滅。二、就有爲中立五種性。由法爾故。無始時來。一切有情。有無永別。三、資等五位。乾等十地。修至加行性地位中。得不退墮。四、成菩提道。定滿三祇。五、亦

是分段至究竟果。六、聲聞緣覺斷煩惱種。分斷所知。菩薩俱斷。但於二障。分別起者。地前伏現。見道斷種。俱生起者。於十地中。漸次斷滅。金剛定盡。七、決定性者。趣寂不回。不定性者。並回向大。八、三十二相。是化身好。八萬四千。是報身德。但此修身及佛法身。俱常無常。九、以釋迦身。隨他受用。實報淨土。在首羅天。化身充滿百億閻浮。十、如來法身。唯真境界。釋迦佛身。化非法報。或分生法二身。或開三佛四佛。

(終教法相) 三終教中。多談法性。少談法相。其所云相。亦會歸性。盡大乘說。故無諍論。由明不空真如中道。不但說空。以爲至極。總相雖爾。別亦二門。先對他教辨異。初對相亦十一。所說八識。通如來藏。隨緣成立。生滅與不生滅。和合而成。非一非異。二、一切衆生。平等一性。皆同一乘。同一解脫。三、但是真如隨緣成立。四、依他無性。卽是圓成。五、一理齊平。故說生界佛界。不增不減。六、第一義空。該通真妄。真非俗外。卽俗而真。故雖空不斷。雖

有不常。七、四相同時。體性卽滅。八、緣境斷惑。不二而二。有能所斷。二而不
二。九、說爲內證。照惑無本。卽是智體。照體無自。卽是證如。非智外如。爲智
所證。非如外智。能證於智。十、旣世出世智。依如來藏。始本不二。則有爲無
爲。非一非異。故佛化身。卽常卽法。不墮諸數。況於報體。卽體之智。非相所
遷。次對空亦五。一、但明白性常住真心。方爲實理。此真如體。唯是一心。二、
一心真實。本自能知。通於理智。徹於染淨。三、所詮法義。具足三諦。色等卽
空。是爲真諦。空卽色等。乃爲俗諦。一真心性。非色非空。能空能色。名爲中
道第一義諦。四、遍計執性。情有理無。依他起性。相有性無。圓成實性。理有
情無。性有相無。五、一切諸佛。自體皆具常樂我淨真實功德。身智通光。一
一無盡。性自本有。不待機緣。

次約當教詳明。亦有十門。一、說賴耶識。乃是真如隨緣合成。是故八識。通
如來藏。非唯生滅。二、就真如中。立種性故。遍諸衆生。皆有佛性。三、信等五

十二位之中。修至初住。卽得不退。四行成佛果。不定三祇。亦無百劫修相好業。五地前留惑。受分段身。初地斷種。受變易身。六於二障中。正使習氣。三賢伏現。見道除種。地上侵習。佛位究淨。七一切二乘。無不回心。八報身相好。八萬四千。修生法身。亦常無常。九所住依果。在三界外。數世界種。無量恆沙。爲一佛界所攝化境。十如來法身。唯以妙智。或以境智。釋迦佛身。亦法報化。或立二身三身。或建四佛五佛。

(頓教法相) 四頓教中。總不說法相。唯辨真性。一切所有。唯是妄想。一切法界。唯是絕言。五法與三自性俱空。八識及二無我盡遣。訶教勸離。毀相泯心。生心卽妄。不生卽佛。亦無佛無不佛。無生無不生。如淨名默住。顯不二等。是其意也。別之亦有十門。一說一切法。唯一真如。二離言說相。名爲種性。三一念不生。卽名爲佛。有何行位漸次差別。四旣惟一念。無時可說。五所依身分。亦不可說。六一切煩惱。本來自離。七二乘聲聞。非四不回。八

一切佛身。唯一法身。相盡離念。平等平等。不可說有功德差別。亦不可說常與無常。九依真而住。非有國土。十如來法身。非境非智。釋迦佛身。法非報化。是故唯立一實性佛。

(圓教法相)五圓教中。所說唯是無盡法界。性海圓融。緣起無礙。相即相入。如因陀羅網。重重無際。微細相容。主伴無盡。十法門。各攝法界。別之亦有十門。一、說一法界性起爲心。或開十心以顯無盡。二、菩薩種性。即因卽果。盡三世間一切諸法。甚深廣大。與法界等。三、攝前諸教所明行位。始從十信。乃至佛地。六位不同。隨得一位。得一切位。四、一切時分。悉皆不定。念切圓融。自在無礙。五、但分段身。至於十地。六、斷除惑障。一卽一切。七、一切二乘。並已回竟。悉無所回。八、佛實相好。有十蓮華藏世界海。微塵數相。彼一一相。皆遍法界。業用亦爾。然德用體。通常無常。九、靈山淨土。華藏世界。無量雜類諸國土海。皆是十佛攝化境界。十、如來法身。境智存泯。或具

或絕。釋迦佛身。非但三身。亦卽十身。故立十佛以顯無盡。以下當明五教斷證。

(小教斷證)初小教中。先聲聞位。有五。一、資糧位。修五停心。總別相念。三種觀行。二、加行位。觀四真諦。漸能伏除煩惱分別。三通達位。卽須陀洹。斷三界八十八使。分別見惑。見真諦故。又名見道。四、修習住。謂於欲界九品。俱生思煩惱中。斷前六品。名斯陀含。斷後三品。名阿那含。五、無學住。斷上八地七十二品。俱生思煩惱盡。名羅漢果。子傳已斷。果傳猶存。名有餘涅槃。若灰身泯智。名無餘涅槃。

次辟支有二。一緣覺。值佛出世。稟因緣教。觀生滅門。覺真諦理故。二獨覺。出無佛世。獨宿孤峯。觀物變易。自覺無生故。雖名不同。行位無別。然斷三界分別俱生。與聲聞同。更侵習氣。故居其上。後明佛。從本因地。初發心時。緣四諦境。發四弘願。於三僧祇。修六度行。初

祇從古釋迦至於尸棄。值七萬五千佛。若望聲聞。卽資糧位。二祇從尸棄。至於然燈。值七萬六千佛。齊煖位。三祇從然燈至毗婆尸。值七萬七千佛。齊頂位。修行六度。各各滿後。更住百劫。種相好因。是下忍位。次入補處。生兜率。托胎。出胎。出家。降魔。安坐不動。爲中忍位。次一剎那。入上忍位。後一剎那。入第一位。發真無漏。三十四心。頓斷分別俱生煩惱。習氣。在於染變化土。成劣應身佛。坐生草座。說小乘諦緣之法。令彼一類下下凡夫外道。轉凡成聖也。

(始教斷證)二始教中。信等四位。伏除二障。分別現行。與小教總相念齊。卽資糧乾慧地也。煖等四加。伏除二障。分別種現。與小教四善根齊。卽加行性地也。初地斷二障。分別種。與小乘初果齊。卽通達見地也。三五七地。斷二障。俱生現種。三五七分。與小教二三四果齊。卽薄欲離欲已辦地也。八地斷八分。與小教辟支齊。卽辟支地也。九地斷九分。與小教佛果齊。等

覺斷十一分。卽菩薩地修習位也。妙覺十二分盡。卽佛地。究竟位。在於淨變化土。成勝應身佛。坐天衣座。說大乘空相之法。令彼小乘。及下根凡夫外道。轉小成大也。

(終教斷證)三終教中。七信伏二障分別俱生現行麤分。與始十向齊。十信伏二障分別俱生現行細分。與始第一齊。初住除煩惱分別俱生現行。與始初地齊。七住除所知分別俱生現行。與始七地齊。二行伏二障分別俱生種子麤分。與始妙覺齊。十行伏二障分別俱生種子細分。初向除二障分別俱生種子麤分。十向除二障分別俱生種細分。四加伏二障習氣。初地至妙覺。斷氣十二分。在於受用土中。成受用身佛。坐金剛座。說大乘藏心之法。令彼權教菩薩。及二乘人。并一類中根凡夫外道。轉權成實也。(頓教斷證)四頓教中。初信伏二障分別俱生現行。與終十信齊。七信除煩惱分別俱生現行。與終初住齊。初住除所知分別俱生現行。與終七住

齊。七住伏二障分別俱生種子。與終十向齊。初向除習氣一分。與終初地齊。二地除習氣十二分。與終妙覺齊。妙覺除習氣二十二分盡。在於法性土中。成法性身佛。坐虛空座。說一乘真性之法。令彼漸教菩薩。及二乘人。并一類上根凡夫外道。轉漸成頓也。

（圓教斷證）五圓教中。初信除煩惱分別俱生現行。與頓七信齊。七信除所知分別俱生現行。與頓初住齊。九信伏二障分別俱生種子。與頓七住齊。十住除二障分別俱生種子。與頓十行齊。初行除習氣一分。與頓初向齊。初向除習氣十一分。與頓初地齊。二地除習氣二十二分。與頓妙覺齊。妙覺除習氣三十二分盡。在於無障礙法界土中。成無障礙法界身佛。坐普融無盡師子座。說一乘緣起法界之法。令彼偏教菩薩。及一切回心佛果。二乘。并一類上上根凡夫外道。轉偏成圓也。

賢首又判六宗如左。

一、隨相法執宗。謂一切我法中。起有無執故。卽小乘諸師。依阿緣生等經。造婆娑俱舍諸部論等。於中又六。(一)我法俱有宗。此中有二。一人天乘。二小乘。謂犢子法上。賢胄。正量。密林山部等。彼立三聚法。一、有爲聚法。二、無爲聚法。三、非二聚法。初二是法。後一是我。又立五法藏。一、過去。二、現在。三、未來。四、無爲。五、不可說藏。此卽是我。以不可說是有爲無爲故。然此一部。諸部論師。共推不受。呼爲附佛法外道。以諸外道所計雖殊。皆立我故。

(二)法有我無宗。謂薩婆多。上座。多聞等。彼說諸法。二種所攝。一名二色。或四種所攝。謂三世及無爲。或五種所攝。謂一心。二心所。三色。四不相應。五無爲。故一切法皆悉實有。於諸法中。並不立我。以無我故。異外道計。又於有爲之中。立正因緣。以破外道邪因無因。然外道見。雖有九十五種。或計二十五諦。從冥生等。或計六句和合生等。或謂自在梵天等生。或謂微塵宿作等生。或執時方虛空等。而爲世間及涅槃本。統收所計。不出四見。

謂數論計一。勝論計異。勒沙婆計亦一亦異。若提子計非一非異。若計一者。則謂因中有果。若計異者。則謂因中無果。三則因中亦有無果。四則因中非有無果。餘諸異計。皆不出此。雖多不同。就其結過。不出二種。從虛空生。卽是無因。餘皆邪因。然無因邪因。乃成大過。謂自然虛空等生。應常生。故以不知三界由乎我心。從癡有愛。流轉無極。迷正因緣。故異計紛然。安知因緣性空。眞如妙有耶。廣明異計。如瑜伽顯揚。婆娑。中。百。金。七十論等。(三)法無去來宗。謂大衆說轉。雖胤制多。西山北山。法藏。飲光部等。唯說現在諸有爲法。及無爲法耳。以過未之法。體用俱無。故(四)現通假實宗。謂說假部。就前現在有爲法中。在五蘊爲實。在界處爲假。隨應諸法。假實不定。其成實論。未經部師。卽是此類。(五)俗妄眞實宗。卽說出世部等。謂世俗法皆假。以虛妄故。出世法皆實。非虛妄故。(六)諸法但名宗。卽一說部等。謂一切我法。但有假名。無實體故。

二、唯識法相宗。謂一切諸法。皆唯識現故。卽無著天親。依方廣深密等經。造瑜伽唯識論等。

三、真空無相宗。謂一切諸法。皆空無相故。卽提婆清辨。依般若妙智等經。造中百掌珍論等。

四、藏心緣起宗。謂一切諸法。唯是真如隨緣。具恆沙性德故。卽堅慧馬鳴。依勝鬘涅槃等經。造寶性起信論等。

五、真性寂滅宗。謂相想俱絕。直顯性體故。卽馬鳴龍樹。依楞伽般若等經。造真如三昧智度論等。

六、法界圓融宗。謂無盡法界。如因陀羅網。主伴重重圓融無礙故。卽龍樹天親。依華嚴等經。造不思議十地論等。

賢首所判三觀者。先所依體事。總爲十對。(一)教義。卽小始終頓圓。爲教七十五法。五位百法。八十一科。二門三大。一百八句。二智十如。六相十玄。

爲義。(二)理事。人空。二空依言。離言。法界。眞如。爲理。亦漏無漏。有爲無漏。非漏無漏。普融無盡。身土爲事。(三)智境。四諦。二諦。三諦。第一義諦。無盡諦理。爲境。無漏淨慧。根本後得。權實無礙。內證自覺。十十無盡。爲智。(四)行位。觀四眞諦。六度萬行。四信五行。遣二無我。一攝一切。爲行。資加等五。信住等六。爲位。(五)因果。七方便等。覺已下。爲因。須陀洹等。妙覺。爲果。(六)依正。淨化劣。勝受用。法性。法界。身土。爲依。爲正。(七)體用。五分法身。丈六報身。離一切相。凝然法身。功德滿足。四智報身。體大法身。相大報身。絕對離言。一實之性。不分三異。清淨法報。眞應相融。一多無礙。圓滿十身。爲體。隨形六道。三類分身。眞如用大。爲他報化。智隨物現。法界緣起。無盡身雲。爲用。(八)人法。人天。小乘。菩薩。及佛。爲人。四諦。因緣。三空。八識。三覺。九相。四十一門。十無盡句。爲法。(九)逆順。六羣比丘。尼捷。達多。廣額。世論。無厭勝熱。爲逆。十大聲聞。彌勒。文殊。大慧。普賢。五十三賢。諸善知識。爲順。

(十) 感應。六道二乘。五性三乘。權教聖凡。漸教賢聖。偏教種類。最上利根。圓器爲感。化身佛及菩薩。眞佛悲願起報化等。如來大定智慧願力現他受用。三種無作意成身。諸善知識及十身佛爲應。

右十對法。諸佛菩薩辟支聲聞四聖法界。乃至地獄餓鬼畜生天人脩羅六凡法界。性中無有不起具也。經云。若人欲了知三世一切佛。應觀法界性。一切唯心造。

次能依觀法門有三重。第一眞空絕相觀。于中自有四句十門。第一句會色。歸空觀。又開四門。一、色非斷空門。幻色不卽是斷空故。二、色非眞空門。實色不卽是眞空故。三、色空非空門。實色斷空。非眞空故。四、色卽是空門。色空無性。卽眞空故。第二句明空。卽色觀。亦有四門。一、空非幻色門。斷空不卽是幻色故。二、空非實色門。眞空不卽是實色故。三、空非空色門。眞空非斷空實色故。四、空卽是色門。空無我理。卽空色故。第三句空色無礙觀。

謂色卽空而色不盡。空卽色而空不隱。無障無礙。爲一味法。第四句泯絕。無寄觀。謂此所觀真空。不可言卽色不卽色。卽空不卽空。迴絕無寄。言解不及。如色空旣爾。一切法亦然。經云。法性本空絕。無取亦無見。性空卽是佛。不可得思量。

第二理事無礙觀。亦有十門。一、理遍於事門。謂無分限之理。全遍有限事故。二、事遍於理門。謂有分限之事。全同無分理故。三、依理成事門。事攬理成故。四、事能顯理門。理因事顯故。五、以理奪事門。理外無事可得故。六、事能隱理門。事外無理可得故。七、真理卽事門。理非事外有故。八、事法卽理門。事非理外有故。九、真理非事門。謂卽事之理而非事故。十、事法非理門。謂全理之事而非理故。如理事旣爾。餘九對亦然。經云。如金與金色。其性無差別。法非法亦然。體性無有異。

第三周遍含容觀。亦有十門。一、理如事法門。謂全理爲事。理亦如事。無有

盡故。二、事如真理門。謂事不異理。事亦隨理而圓遍故。三、事含理事門。不唯理含事理。亦且事含理事故。四、通局無礙法。不唯全遍十方。而又不動本位故。五、廣狹無礙門。不唯廣容刹海。而能不壞一塵故。六、遍容無礙門。以一望多。則一法遍一切時。還復容彼一切。蓋由普遍卽是廣容故。七、攝入無礙門。以多望一。則一切攝一法時。還復入彼一法。蓋由攝他卽是入他故。八、交涉無礙門。一多俱爲能入攝故。而有四句。初、一攝一一入一次。一攝一切一入一切。三、一切攝一一切入一。四、一切攝一切一切入一切。一能攝入與多能攝入。交涉無礙。九、相在無礙門。多一俱爲所攝入故。亦有四句。初、攝一入一次。攝一切入一切。三、攝一入一切。四、攝一切入一切。攝多所攝入。在於一所攝入。互相無礙。十、普融無礙門。一多遍容。能所攝入。普皆同時。圓融無盡故。若望前八九門。具有兩重四句。初重四句者。一法攝一入一。一法攝一切入一切。一法攝一入一切。一法攝一切入一。二

重四句者。一切攝一入一。一切攝一切入一切。一切攝一入一切。一切攝一切入一。如是一能攝入。融於多所攝入。普無障礙。


古德準上十義。重開爲十玄門。一、同時具足相應門。以是總故。冠於九門之初。二、廣狹自在無礙門。別中先辨此者。此是別門之由。由前初二門事理相遍故。生餘八門。且約事如理遍。故廣不壞事相。故狹。故爲事事無礙之始。三、一多相容不同門。由廣狹無礙。所遍有多。以己一望彼多。故有一多相容。相容則二體俱存。但力用交徹耳。四、諸法相卽自在門。由此容彼。彼便卽此。由此遍彼。此便卽彼等。故相卽也。五、祕密隱顯俱成門。由互相攝。則互有隱顯。故有此門。謂攝他。他可見。故有相容門。攝他。他無體。故有相卽門。攝他。他雖存而不可見。故有隱顯門。此三皆由相攝而有。爲門別故。相容則如二鏡互照。相卽則如波水相收。隱顯則如片月相暎。六、微細相容安立門。由此攝他。一切齊攝。彼攝亦然。故有微細相容。七、因陀羅網

境界門。由互攝重重。猶帝網無盡故。八託事顯法生解門。由既如帝網已。隨一卽是一切無盡故。九十世隔法異成門。由上八門皆是所依。所依之生既融。次辨能依。能依之時亦爾。故有十世異成。十主伴圓明具德門。由法法皆然。故隨舉其一。則便爲主。連帶緣起。便有伴生。故有主伴門。事如理遍既爾。餘九具玄亦然。

將前能起十觀門中。各具十玄。則爲百門。而此十觀又各互具。皆含十玄。則成千門。千中取一。亦具一千。餘皆例爾。卽爲百萬。前二觀事。準此知之。一卽具多名總相。多卽非一名別相。彼此不違名同。相互不相濫名異。相共相成。辦名成相。各居自位。名壞相合。此諸法得有如是混融無礙者。唯心所現故。法無定性故。緣起相由故。法性融通故。如幻夢事故。如影像現故。因無限量故。佛果證窮故。深定大用故。神通解脫故。於此圓明顯了。則常入重重法界之境矣。


賢首時儀教觀圖

如來無邊法界智輪



序論 第二章 釋迦滅後教之傳播及其義分判 一七九

附天台四教略圖



第三章 東土佛教流傳之十宗

第一節 俱舍宗

經藏教義。天台賢首所判最詳。已如前述。然佛爲本源。後學爲流派。佛滅度後。印度諸師。持論所宗。各有不同。而流於中土。最盛者約有十宗。惟俱舍成實二宗。久已式微矣。今略述十宗大旨於下。而先列俱舍宗焉。

俱舍宗者。以俱舍論而名。此是小乘所攝。本名阿毘達磨俱舍論。梵語阿毘此云對。達磨此云法。俱舍此云藏。蓋卽對法藏論也。謂無漏慧等。名之爲對法。對有二義。一者對向涅槃故。二者對觀四諦故。法有二義。一勝義法。謂是涅槃也。二法相法。通四聖諦。謂無漏慧。對向對觀涅槃四諦故。藏有二義。一者包含。二者所依。包含義者。此論包含發智論等。諸勝義言。故名爲藏。所依義者。此論依彼發智論等而造。故爾全取本論對法藏名。有對法藏故。名對法藏。此論名之義。亦立宗之所起也。

俱舍論是如來滅度九百年時。世親菩薩所造。二十部中。是薩婆多部也。源出婆沙論。如來滅後四百年初。迦濕彌羅國。有國王名迦膩色迦。其王敬信尊重佛經。有日請僧入宮供養。王因問道。僧說不同。王甚怪焉。問脇尊者曰。佛教同源。理無異趣。諸德宣唱。奚有異乎。尊者答曰。諸說皆正。隨修得果也。佛既懸記。如折金杖。王聞此語。因爲問曰。諸部立範。孰最善乎。我欲修行。願尊者說。尊者答曰。諸部之中。莫越有宗。王欲修行。宜遵此矣。王卽歡喜。令結此部。三藏法門。有德諸僧。四方雲集。凡聖極多。不可繁亂。遂簡繁僧。唯留聖僧。聖僧尙繁。簡去有學。唯留無學。無學復多。不可總集。於無學內。定衍滿六通。智圓四辨。內閉三藏。外達五明。方堪結集。所留德聖。唯有四百九十九人。遂以世友尊者。足成五百人矣。卽以世友尊者。推爲上座。於是五百聖衆。初集十萬頌。釋素怛覽藏。次造十萬頌。釋毘奈耶藏。後造十萬頌。釋阿毘達磨藏。卽大毘婆沙論是也。五百羅漢。旣結集已。

刻石立誓。唯聽自國。不許外國。方勅夜叉神守護城門。不令散出。然世親尊者。舊習有宗。後學經部。將爲當理。於有宗義。懷取舍心。欲定是非。潛名重往。時經四歲。屢以自宗。頻破他部。悟入尊者。被詰莫通。尊者入定。知是世親。私告之曰。此部衆中。未離欲者。知長老破。必致相害。長老可速歸還本國。於時世親還本國已。講毘婆沙。若一日講。便造一偈。所講之義。刻赤銅葉。書寫此偈。如此次第。成六百頌。攝大毘婆沙。其義周盡。標頌香象。擊鼓宣令。誰能破者。吾當謝之。竟無一人。破斯偈頌。將此偈頌。使人賫往迦濕彌羅國。時彼國王及諸僧衆。聞皆歡喜。謂弘已宗。悟入知非。怪告諸人。遂請造釋。世親論主。卽應王請。爲釋本文。凡八千頌。後謂彼釋。果如悟入羅漢所言。於時悟入尊者弟子。衆賢論師。造論破俱舍。名俱舍雹論。令世親見。世親卽讚。改名卽爲順正理論。彼衆賢論師。亦造顯宗論。譯成四十卷。順正理論。譯成八十卷。故知此俱舍論。源出婆沙論也。

此俱舍論者。初陳朝真諦三藏譯成二十卷。卽自作疏。有五十卷。亡佚不傳。後唐朝玄奘三藏。永徽中於慈恩寺譯成三十卷。今卽此本也。然則此論。旣世親論主所造。故以世親菩薩爲本祖師。三藏門人普光法師。寶法師。各作疏釋之。及餘諸師。莫不皆翫。至是以後。其緒漸微。

此論正述有宗。故所立義。本薩婆多而製造之。然時明彼經部之義。故論文云。迦濕羅義理成。我多依彼。釋對法。又云。經部所說。不違理故。已上取捨二宗。顯密意趣。依此等文。其義可知。惟旣述有宗。故說一切法實有。以爲其宗。若密言之。非無經部義。今約顯義。唯是有宗。三世實有。法體恆有。總是此宗。所說義也。然說三世實有。諸說不同。卽有四說。一、法救尊者云。由類不同。三世有異。二、妙音尊者云。由相不同。三世有異。三、世友尊者云。由位不同。三世有異。四、覺天尊者云。由待不同。三世有異。今世親論主。並評此四家。世友尊者。以爲最善。若經部宗。過去無體。唯現是有。此俱舍論。

既是對法。故此屬論藏。

問曰。此論總明何等義乎。答曰。此論三十九品。總有九品。一界品。二根品。三世間品。四業品。五隨眠品。六賢聖品。七智品。八定品。九破我品。略頌云。界二根五世間五業六隨三賢聖四智二定二破我一。是名俱舍三十卷。其破我品。無別正頌。聚經中伽陀而已。此九品中。初之二品。總明有漏無漏。後之六品。別明有漏無漏。就總明中。初界品。明諸法體。次根品。明諸法用。別明六中。初之三品。別明有漏。後三品。別明無漏。明有漏中。世品。明果業。品。明因。定品。明緣。其破我品。明無我理。一部三十卷。九品始終。所明義理。分齊如此矣。

此宗所攝。有七十五法。攝諸法盡。七十五法者。一者色法。此有十一。五根。五境。及無表色。二者心法。此唯一也。云識心王。總爲一故。三者心所有法。有四十六。分爲六位。大地法十。大善地法十。大煩惱地法六。大不善地法

二。小煩惱法十。不定地法八。合有四十六。名六位心所。大地法十者。俱舍頌曰。受、想、思、觸、欲、慧、念、與、作、意、勝、解、三、摩、地、遍、於、一、切、心、大、善、地、法、十、者、又、同、頌、云、信、及、不、放、逸、輕、安、捨、慙、愧、二、根、及、不、害、勤、唯、遍、善、心、大、煩、惱、地、法、六、者、同、頌、云、癡、逸、忘、不、信、惛、掉、恆、爲、染、大、不、善、法、二、者、頌、云、唯、遍、不、善、心、無、慚、及、無、愧、小、煩、惱、地、法、十、者、頌、云、忿、覆、慳、嫉、惱、害、恨、諂、誑、憍、如、是、類、名、爲、小、煩、惱、地、法、不、定、地、法、八、者、略、頌、云、尋、伺、及、悔、眠、貪、瞋、與、慢、疑、四、者、不、相、應、行、此、有、十、四、俱、舍、頌、云、心、不、相、應、行、得、非、得、同、分、無、想、二、定、命、相、名、身、等、類、五、者、無、爲、此、有、三、種、一、擇、滅、無、爲、二、非、擇、滅、無、爲、三、虛、空、無、爲、此、名、七、十、五、法、七、十、五、中、前、七、十、二、並、是、有、爲、後、三、是、無、爲、一、切、諸、法、不、過、此、二、有、爲、法、中、有、漏、無、漏、無、爲、是、無、漏、故、此、宗、中、建、七、十、五、攝、於、諸、法、莫、不、窮、盡。

至於此宗之中。其建立三乘因果。聲聞經三生六十劫。修行得果。方便有

七階。果有四級。緣覺四生百劫。修因證果。因行積集。直登無學。無有多階。唯一向果。菩薩經云。阿僧祇劫。修諸波羅蜜。百劫之中。植相好業。最後身中。於金剛座。斷結成佛。化緣已盡。入無餘涅槃。斯迺聲聞觀四諦。緣覺觀十二因緣。菩薩修六度。

問曰。此宗明幾空乎。答。唯明生空。不談法空。言生空者。卽遺我執。五蘊之中。無有人我。唯是五蘊和合聚成。假名爲人。無有實人。如此觀故。證我空理。然其法理。三世實有。由此義故。他宗名爲我空法有宗也。

第二節 成實宗

成實宗者。以成實論爲所依故。名成實宗。言成實者。釋成如來所說三藏之中實義故也。故彼論師述懷文云。我欲正論三藏中實義是已。如來滅後九百年中。薩婆多宗學俱摩羅陀。上足弟子有訶梨跋摩。嫌師見解。是甚淺劣。簡取諸部最長之義。以爲一類。曰成實論。姚秦羅什三藏。

翻譯弘之一部十六卷。二百二品。震旦諸師多造章疏。見於高僧傳。後代式微矣。

成實論是何部所攝。其最長義是何等義。今當論之。成實論所依本部。諸解不同。或云依多聞部。或云依經部。或云談大釋小。或云依量無德部。或云取諸部長。小乘諸部長。或云依化地部。又梁三大法師。唯光宅寺法雲法師。開善寺智藏法師。莊嚴寺文旻法師。此三家並云成實論是大乘。天台嘉祥。並判小乘。南山靈芝。更云分通大乘。與四分律同計。如此諸師。異說不同。然淨影天台已後。多分共評云。成實論是小乘中長。但南山律師以爲教是小乘。義通大乘。小乘之中。多云成實多依經部。或曇無德部。其最長義者。此宗之中。具明二宗。故觀立二種。一者空觀。如瓶中無水。五蘊之中。無人我故。是人空觀也。二者無我觀。如瓶體無實。五蘊諸法。皆假名故。是法空觀也。既明二空。故其義最長也。

問曰。成實成既明二空。若爾可斷二執。顯二空故。答。不然。雖談二空。唯斷見思。不斷所智障。是智解甚深故。此論中明二十七賢聖。以攝賢聖階位。其二十七者。一隨信行。在聞思位。二隨法行。在四善根位。三無相行。卽前二人。入見道故。此之三人。名預流向。四須陀洹果。五一來向。六一來果。七不還向。不還果中。開十一人。一中般。二生般。三有行般。四無行般。五樂慧。六樂定。七轉世。八現般。九信解。十見得。十一身證。並前七人。合成十八。名有學人。自下九人。並是無學。一退法相。二守護相。三死相。四住相。五可進相。六不壞相。七慧解脫。八俱解脫。九不退相。並前十八。合成二十七賢聖也。八十四法。攝諸法盡。雖未進入大乘。於小乘中。尤爲優長。寔可異矣。故或以爲大乘也。一切諸法。唯歸一滅諦空理。寂然諸法。此上立實法。堅情如冰釋。假有萬像如林森。虛通妙通。其旨深矣。

第三節 律宗

佛家尤以戒律爲重。律有諸部。謂二部、五部、十八、五百。是如來在世五十年間。隨機談說。滅後弟子陞座結集。名爲一部。八十誦律。大毘尼藏。佛滅百年。五師瀉瓶。純是一味。未分異見。一百年後。漸分二部。五部。及二十部。乃至五百。異見競鼓。猶浩波。經論亦然。三藏等教。一類分故。其中律部。隨計異成。故一大藏。分成諸部。如此諸部。數多不出二十部內。故律部中有二十部。天竺之間。諸部並弘。然傳震旦。總有四律。及以五論。其四律者。一者十誦律。譯成六十五卷。是薩婆多部律也。二者四分律。譯成六十卷。是曇無德部律也。三者僧祇律。譯成四十卷。此根本二部中窟內上座也。大衆名通二部故。四者五分律。譯成三十卷。此五部中彌沙塞部律也。迦葉遺律。唯傳戒本。廣律未流。四律並翻。震旦悉行。然獨多後代。唯曇無德部。四分律宗而已。其五論者。一毘尼母論。二摩得勤迦論。此依薩婆多律。三善見論。此解四分律。四薩婆多羅論。此釋十誦律。五明了論。此依正量律。

自外毘奈耶律。及後譯有部諸律。並傳震旦。然四分一律。此土緣深。昔智首律師已前。諸部雜亂。未是專習。智首律師。南山律師。或製五部區分鈔。或檢震旦初興受體。唯憑曇無德而談隨行。今且就四分一律。述其興起傳弘之蹟。

律之所起。本隨佛住世日。隨機談說。相爲傳守。佛滅百年。結集流傳。一百餘年時。曇無德羅漢。隨見誦出。以爲一部。是時四分一部。始分而出。曹魏之世。法時尊者。創受戒。姚秦之世。覺明三藏。始傳明律。是震旦傳戒之由來也。此宗祖師。自迦葉尊者。至唐宋以來。其數甚多。唯佛是教主。自餘迦葉尊者。阿難尊者。末田地尊者。商那和修尊者。優波笏多尊者。曇無德尊者。曇摩迦羅尊者。法聰律師。道覆律師。慧光律師。道雲律師。道洪律師。智首律師。南山律師。周秀律師。道恆律師。省躬律師。慧正法師。法實律師。元表律師。守言律師。無外律師。法榮律師。處恆律師。擇悟律師。元堪律師。擇

其律師。元照律師。皆是律宗之祖師也。若別據當律初興。至於南山律師。爲九祖。則自曇無德尊者而始推之。南山已後。次第同前。

四分律宗。其流頗有異解。唐朝有相部法礪律師。終南山道宣律師。（卽南山律師）西太原寺東塔懷素律師。各立異義。門葉互諍。此名律三宗。然自後唯南山之傳爲盛。餘諸家並廢不行。蓋南山宗義。受隨相稱。行相備足。大小途和。解行相應故也。古今諸師。俱競歎美。諸宗賢哲。並習依學。如行事鈔。七十三家。互作記解。自界他方。俱致承奉。汎而言之。四分律藏。翻譯已來。諸師製疏。將二十家。然取要言之。不過云疏。慧光律師。略疏四卷。相部律師。中疏十卷。智首律師。廣疏二十卷。此名三要疏。又相部大疏。嵩岳律師。作記解釋。飾宗義記十卷是也。智首律師大疏。既是南山所承。故與南山一途。東塔律師四分開宗記十卷。頗盡源流。足爲指南之助。唐朝之末。東京競起。玄憚律師毗尼討要三卷。與餘家少異矣。四分大小等。

疏是也。然猶多分與南山同。

南山律師製作章疏。總五大部。一、行事鈔三卷。二、戒疏四卷。三、業疏四卷。四、釋毘尼義鈔三卷。五、比丘尼鈔三卷。戒本羯磨。並作註解。及小部律章。自餘諸文。部怡甚多。不可具舉。南山律宗。正所依學。卽此五大部等也。其本所依。卽四分律六十卷。是言其論釋。卽善見論是。

律宗皆以明戒。有二種。一、止持戒。止諸惡門。二、作持戒。修諸善門。如來所說一切諸戒。二持攝束。皆悉窮盡。故本律正宗。所詮義理。唯此止作二持而已。初二部戒本。是名止持。後二十犍度。是名作持。二部戒本者。僧尼二部也。比丘、比丘尼所持。名具足戒。戒本所說二部戒中。初明僧戒。僧有二百五十戒。分爲八段。(一)波羅夷。此有四戒。姪盜殺妄也。(二)僧殘。此有十三戒。一、故失精戒。二、觸女人戒。三、麤語戒。四、歎身索供養戒。五、媒嫁戒。六、有主房戒。七、無主房戒。八、無根謗戒。九、假根謗戒。十、破僧違諫戒。十一

助僧違諫戒。十二汙家擯謗違諫戒。十三惡性拒僧違諫戒。(三)不定。有二。一屏處不定。二露處不定。(四)尼薩耆波逸提。此有三十。長衣、離衣、長鉢、乞鉢等也。(五)波逸提。此有九十。小妄語、兩舌語、掘地、壞生、飲酒、非時食等也。(六)四提舍尼。蘭若受食、學家受食等也。(七)百衆受戒。齊整著衣、戲笑、跳行等也。(八)七滅諍。現前毘尼、憶念毘尼等。此之八段。具攝二百五十戒。攝束八段。以爲五篇。一波羅夷。二僧殘。此二攝罪。卽如前段。三波逸提。合前舍墮、單墮。爲一。總攝百二十戒。四提舍尼。如前五突吉羅。合二不定。百衆學。七滅諍。以爲一篇。總有一百九戒。此就果罪。及急要義。立爲五篇。自外諸罪。立於六聚而收攝之。一波羅夷。二僧殘。三偷蘭遮。四波逸提。五提舍尼。六突吉羅。是爲六聚。若開吉羅。卽爲七聚。五全如前。六惡作。七惡說。七聚之中。夷殘墮罪。及提舍尼攝罪。同篇門。偷蘭一聚。攝五篇外一切因果。輕重諸罪。並在此中。故離七聚。更無有罪。六聚七聚。攝罪盡。

故次明尼戒比丘尼戒本律說相。唯有三百四十一戒。束爲六段。(一)八波羅夷。(二)十七僧殘。(三)三十捨墮。(四)一百七十八波逸提。(五)八提舍尼。(六)百衆學。尼無二不定。其七滅諍。古來諍論。或可有。或不可有。今南山律師義必可有。本律文略。故加七滅可七段。總有三百四十八戒。此亦不出五篇。准比丘戒可知。此爲二部廣律。本律前半所說法門。分齊如此。皆止持戒也。

次作持門。撻度法者。本律後半。二十撻度。一受戒撻度。二說戒撻度。三安居撻度。四自恣撻度。五皮革撻度。六衣撻度。七藥撻度。八迦絺那衣撻度。九俱睺彌撻度。十膽波撻度。十一呵責撻度。十二人撻度。十三覆藏撻度。十四遮撻度。十五破僧撻度。十六滅諍撻度。十七尼撻度。十八法撻度。十九房舍撻度。二十雜撻度。此名二十撻度。此等並是作持戒也。然二段本律。非無互通。止持有作。作持有止。雖有互通。就多分判前後兩段。以配二

持。若對五大部者。事鈔及戒業兩疏。名三大部戒疏。卽止持行相。防止隨持。事詳業疏。卽作持修行。羯磨攝僧衆四人已上。自一人共二人。二行三人。義明事鈔。雙明止作二持備足。其尼鈔一部。別明尼二持。義鈔一部。多解止持。故祖師諸文。唯在二持矣。

此二持戒。有總有別。總而言之。一切諸善。皆二持攝。別而言之。唯就戒律一宗明之。今二持者。且就戒律一門言之。若就總門。非無其義。問。僧尼具戒。局於此。與答。不然。僧尼具戒。無量無邊。若定數限。且隨緣制。故僧尼戒量。各有三重。僧戒三者。廣則無量。中則三千威儀。六萬細行。略則二百五十。尼戒有三重者。廣則無量。中則八萬威儀。十二萬細行。畧則三百四十八戒。經說五百戒。是有名無相。大智律師亦云。戒則無量。且列二百五十。爲持犯綱領。尼戒亦爾。故僧尼二衆。受具戒時。並得如此無量無邊等戒。量等虛空。用遍法界。莫不圓足。故名具足戒。其五戒。八戒。十戒。六法等。皆

從具戒中攝之。漸誘機根。以爲具戒方便。漸漸進登。遂成具足。無願位故。是故總言戒有四位。五戒。八戒。十戒。具戒。若加六法。總可五類。佛法七衆。所以建立。其七衆者。一比丘。二比丘尼。此之二衆。並具足戒。三式叉摩那。此受六法。四沙彌。五沙彌尼。此並十戒。六優婆塞。七優婆夷。此並五戒。前五衆是出家衆。後二在家。式叉摩那及沙彌尼。戒相標數。雖十戒等。至於護持。並同具位。其八齋戒。爲出家衆。授出家戒。然位唯在家。優婆塞。優婆夷所攝。七衆之外。無別衆故。其五戒者。一不殺生。二不偷盜。三不邪淫。四不妄語。五不飲酒。是五戒也。八齋戒者。前五同上。但改邪淫。是爲下姪。六香油塗身戒。七歌舞觀聽戒。八高廣大牀戒。九非時食戒。薩婆多論云。八箇是戒。第九是齋。齋戒合數。故有九也。言十戒者。卽於前九中加第十捉金銀寶戒。其六法者。一殺畜生。二盜三錢。三摩觸。四小妄語。五飲酒。六非時食也。此七衆中。男衆有三。比丘沙彌及優婆塞。女衆有四。卽餘

四是。

南山律師立化制二教。以攝一代教。亦名化行二教。其化教者。經論所詮定慧法門。四阿含等是也。其制教者。律教所詮戒學法門。四分律等是也。今此宗部。卽律藏教。以戒爲宗。戒行清淨。定慧自立。故先持戒。制禁業非。然後定慧。伏斷煩惱。爲道制戒。本非世福。三乘聖道。非戒不立。故如來最初制戒。意在茲矣。

四分律應屬大乘。或屬小乘。律宗諸家。所判不同。慧光律師云。四分一律宗是大乘。法礪玄暉等師。並云唯是小乘。南山律師云。此四分宗。義當大乘。今依此義。盛爲所憑。故業疏中。立五義分通。謂沓婆回心。施生成佛。施一切衆生。皆共成佛道。識了塵境。相召佛子。捨財用輕。遙超餘部。實爲深義。束上諸戒。總有四科。一者戒法。如來所制。法通萬境。故二者戒體。受者所發。心府領納。故今四分宗。依成實論。非色非心爲體。二者戒行。受者隨

持三業運造故。四者戒相。美德外彰。持相可軌。故一切諸戒。咸具此四。問。今宗所立。及祖師意致。大小乘中。本何行果。答。此教所依。本是小乘。四分律元。被小乘故。然義當大乘。機根漸進。故當分小乘。故分通大乘。故大乘無不攝盡。此是今教所說宗旨。若據南山律師意者。如來一代所說法門。大小諸教。分爲三教。一性空教。一切小乘。卽此中攝。二相空教。一切大乘。淺教悉攝。三唯識圓教。一切大乘。深教悉攝。今四分宗。卽性空教中之一分。唯識圓教。是祖師域心圓融。三學無礙圓行。故業疏中明諸宗。所談戒體。出三宗義。有宗。空宗。並性宗教。攝圓教妙體。是唯識教也。大小二宗。各立三學。且大乘圓教。三學戒者。卽護三聚淨戒。藏識種子。以爲其體。定慧則唯識妙行。止觀並運。以爲其相。戒卽定慧。無一法而非定慧。定慧卽戒。無一法而非戒。此名圓融。三學行相。其中戒者。卽前所標三聚淨戒。謂攝律儀戒。一切諸惡。皆悉斷舍。故攝善法戒。一切諸善。皆悉修行。故攝衆生

戒。荷負衆生。遍施利益。故此之三聚。亦圓融行。故三聚互攝。諸戒融通。如不殺生。卽具三聚。乃至一切諸戒。皆爾。隨持一戒。三聚全具。雖是一行。廣攝萬行。故雖一念頓經三祇。不壞三祇。而立一念。不退一念。而經三祇。長短無礙。生佛平等。諸法互遍。相卽無盡。豈非深妙乎。攝善攝生。且略不論。其律儀戒。亦有三種。一別解脫戒。二定共戒。三道共戒。其初別解脫中有三業。卽身語意所持戒也。身語二戒。有共不共。意業之戒。唯是不共。故聲聞所受。唯此身語一分。共門之分齊也。四分律等。所說戒相。卽此分齊。但四分律。分通意戒。由此義。故有小乘戒。今大乘宗。此共門戒。入三聚中。會歸大乘。故小乘律所說戒行。皆是三聚。圓頓大戒。更無別相。純一圓極。彼七衆軌則。全同小律。律儀戒中。建立之故。此則南山大師。教觀宗旨。學者受隨解行之域心也。然受此三聚戒。有通受。有別受。三聚通受。故云通。別受律儀。故云別。今祖師所立。白四羯磨。圓意戒法。卽當彼別受矣。然後受

菩薩戒者。卽當通受矣。故今律宗學者。通別二受。遍納壇場。四分梵網。並護戒相。通別二受。名出法相之家。義在南山之林。五篇七聚。制起聲聞之衆。行互大乘之園。然則律宗固兼通大小乘者也。

第四節 禪宗

佛之心印。卽是般若波羅密。五祖令人誦金剛般若經。六祖稱爲學般若菩薩。皆以般若爲心印也。後人名爲禪宗。是出世間上上禪。言語道斷。心行處滅。始有少分相應。世尊在靈山會上。拈花示衆。是時衆皆默然。唯迦葉尊者。破顏微笑。世尊曰。吾有正法眼藏。涅槃妙心。實相無相。微妙法門。不立文字。教外別傳。付囑摩訶迦葉。故迦葉爲禪宗第一祖矣。阿難尊者。爲禪宗第二祖。以其多聞第一。持佛法藏。迦葉乃以別傳之旨授之。餘祖次第相承。載在法藏因緣傳。茲不具述。

第十二祖號馬鳴。應佛懸記。於佛滅六百年時。生於中印度。摧伏外道。興

隆正法。繼富那夜奢尊者之後。而紹祖位。宗百部大乘經。造起信論。以一心二門。總括佛教大綱。教律禪淨。莫不貫通。轉小成大。破邪顯正。爲後世學者所依。

第十四祖龍樹。唐譯楞伽經如來懸記云。未來世當有持於我法者。南天竺國中。大名德比丘。厥號爲龍樹。能破有無宗。世間中顯我無上大乘法。得初歡喜地。往生安樂國。魏譯楞伽亦同此文。華嚴經亦名不思議經。龍樹入龍宮。見有三本。上本有十三千大千世界微塵數偈。一四天下微塵數品。中本有四十九萬八千八百偈。一千二百品。此二本皆非閻浮提人。心力所能持。乃誦下本十萬偈。四十八品而出。返至人間。寫成梵筴。五天竺國。方知有華嚴經出現於世。僧俗二衆。奉爲至寶。龍樹造大不思議論十萬偈。釋華嚴經。今所傳十住毗婆沙論。卽是彼論釋十地中初之二地。又造無畏論十萬偈。中論出其中。又造釋摩訶衍論。以闡揚馬鳴菩薩之

起信論焉

廿八祖菩提達摩尊者。爲中華初祖。尊者本南天竺國香至王第三子。姓刹帝利。得法於般若多羅尊者。承師遺命。泛海達廣州。在梁普通元年。廣州刺史蕭昂館之。表聞於朝。武帝迎至金陵。問曰。朕卽位以來。造寺寫經。度僧。不可勝數。有何功德。答曰。並無功德。此但人天小果。有漏之因。如影隨形。雖有非實。帝曰。如何是真功德。答曰。淨智妙圓。體自空寂。如是功德。不於世求。帝又問。如何是聖諦第一義。答曰。廓然無聖。帝曰。對朕者誰。答曰。不識。帝不悟。尊者知機不契。遂渡江。居洛陽。止於嵩山少林寺。面壁坐九年。人莫能測。終爲東土禪宗之初祖也。先是尊者見東土有大乘氣象。應時而來。專接利根上智。令脫名言習氣。識自本心。見自本性。直下與諸佛無異。此是頓趣之法。非小機所能領會也。

中華第二祖慧可。原名神光。武牢姬氏子。少通世典。長習竺墳。出家後。善

大小乘。定中見神人指示南詢。得參初祖於少林。勤懇備至。莫聞誨勵。冬夜侍立。積雪過膝。繼而斷臂求法。祖始易其名曰慧可。問曰。我心未寧。乞師與安。祖曰。將心來。與汝安。可良久曰。覓心了不可得。祖曰。我與汝安心竟。後付袈裟。以表傳法。並爲說偈。又曰。有楞伽四卷。亦用付汝。卽是如來心地要門。令諸衆生開示悟入。

二祖在北齊時。有一居士。年踰四十。不言姓氏。來問祖曰。弟子身纏風恙。請和尚懺罪。祖曰。將罪來與汝懺。良久答曰。覓罪了不可得。祖曰。與汝懺罪竟。宜依佛法僧住。祖知是法器。卽爲剃髮受具。命名僧璨。疾亦漸愈。執侍二載。付以衣法。後住舒州皖公山。往來於太湖縣司空山。作信心銘六百言。流傳于世。是爲第三祖。

第四祖名道信。爲沙彌時。謁三祖曰。願和尚慈悲。乞與解脫法門。祖曰。誰縛汝。曰。無人縛。祖曰。何更求解脫乎。信於言下大悟。服勞九載。師試以玄

微知其緣熟。乃付衣法。信蘄州人。姓司馬氏。後住蘄春破頭山。

第五祖名宏忍。黃梅人也。前生爲破頭山栽松道者。請於四祖曰。法道可得聞乎。祖曰。汝已老。脫有聞。其能廣化耶。儻若再來。吾尙可遲汝。乃去。至水邊。乞浣衣女子寄宿。女歸而孕。父母大惡。逐之。後生一子。棄港中。明日見其泝流而上。氣體鮮明。驚異育之。童時遇四祖。祖問曰。子何姓。答曰。姓卽有。不是常姓。祖曰。是何姓。答曰。是佛性。祖曰。汝無姓耶。答曰。性空。故無祖默識其法器。卽令出家。付以衣法。後繼四祖住破頭山。後遷黃梅東山。宗風大振。

第六祖名慧能。姓盧。嶺南新州人。家貧。鬻薪供母。聞人誦金剛經。問所由來。遂往黃梅參五祖。祖驗知根性太利。令入碓坊舂米。人稱盧行者。經於八月。祖勅會下各述一偈。以表心得。上座神秀題壁曰。身是菩提樹。心如明鏡臺。時時勤拂拭。莫使惹塵埃。盧行者聞之。亦作一偈。請張別駕書於

秀偈之側。偈曰。菩提本無樹。明鏡亦非臺。本來無一物。何處惹塵埃。祖乃潛詣碓坊。示以密機。盧卽三鼓入室。祖付囑心傳。并授袈裟。盧問。法則既受。衣付何人。祖曰。昔達摩初至。人未之信。故傳衣以明得法。今信心已熟。衣乃爭端。止於汝身。不復傳也。是夜南邁。衆莫之知。六祖既至嶺南。隱於四會獵人隊中。經十五載。一日至廣州法性寺。二僧對辨。一曰旛動。一曰風動。祖曰。不是風動。不是旛動。仁者心動。一衆竦然。乃集諸名德。爲祖剃髮。授滿分戒。昇座說法。聞者傾心。別傳之道。由此大行。

六祖得法弟子。見於記載者。四十三人。其中最顯者有二大德。南嶽青原。是也。南嶽懷讓禪師。金州杜氏子。由嵩山往曹溪禮六祖。祖曰。何處來。曰。嵩山。祖曰。什麼物。恁麼來。曰。說是一物。卽不中。祖曰。還可修證否。曰。修證卽不無。汙染卽不得。祖曰。口此不汙染。諸佛之所護念。汝旣如是。吾亦如是。後往衡嶽。居般若寺。

青原行思禪師。參六祖。問曰。當何所務。卽不落階級。祖曰。汝曾作什麼來。曰。聖諦亦不爲。祖曰。落何階級。曰。聖諦尙不爲。何階級之有。祖深器之。後住吉州青原靜居寺。

南嶽傳馬祖。青原傳石頭。禪家宗派。遂相承不絕。今略述之。道州禪師。漢州什邡縣人。姓馬氏。故俗稱馬祖。習定於衡嶽。遇懷讓和尚。發明大事。先是六祖謂讓曰。西天般若多羅。識汝足下。出一馬駒。踏殺天下人。馬祖應識而出。住洪州開元寺。得法弟子八十餘人。分化十方。水潦和尚。初參馬祖。問如何是西來的的意。祖曰。禮拜著。纔禮拜。祖乃當胸踏倒。師大悟。起來拊掌呵呵大笑曰。也大奇。也大奇。百千三昧。無量妙義。祇向一毫頭上。識得根源去。南嶽石頭希遷禪師。端州陳氏子。在曹溪難染。得法於青原。衡山有石。狀如臺。乃結庵其上。時號石頭和尚。著參同契二百餘言行世。勸隱峯。辭馬祖。祖曰。甚麼處去。曰。石頭去。祖曰。石頭路滑。曰。竿木隨身。逢

場作戲。便去。纔到石頭。卽繞禪牀一市。振錫一聲。問是何宗旨。石頭曰。蒼天蒼天。隱峯無語却回。舉似祖。祖曰。汝更去問。待他有答。汝待噓兩聲。隱峯又去。依前問。石頭乃噓兩聲。隱峯又無語。回舉似祖。祖曰。向汝道。石頭路滑。馬祖石頭以下。禪家播爲五宗。臨濟。馮仰。曹洞。雲門。法眼。是也。僧問天隱修禪師。如何是臨濟宗。師曰。怒雷掩耳。如何是馮仰宗。師曰。光含秋月。如何是曹洞宗。師曰。萬派朝源。如何是雲門宗。師曰。乾坤坐斷。如何是法眼宗。師曰。千山獨露。更舉諸宗概略。可以考焉。

馬祖傳百丈。百丈傳黃檗。黃檗傳臨濟義玄禪師。住鎮州滹沱河側。是謂臨濟宗。臨濟嘗問黃檗。如何是佛法的大意。檗便打。如是三問。三度被打。後參大愚。得悟黃檗宗旨。卻回黃檗。機鋒迅捷。檗便打。師便喝。以後接人。棒喝交馳。師云。有時一喝如金剛王寶劍。有時一喝如踞地師子。有時一喝如探竿影草。有時一喝不作一喝用。世人稱爲臨濟四喝。師嘗云。大

石頭傳天皇。天皇傳龍潭。龍潭傳德山。德山傳雪峯。雪峯傳文偃。禪師住韶州雲門。是謂雲門宗。師逢僧必特顧之。曰鑒。僧擬議。則曰嚏。門人錄爲顧鑒嚏。師因學人來問。每以一字答之。時人謂之一字關。罕有知其旨趣者。

雲峯傳玄沙。玄沙傳羅漢。羅漢傳文益。禪師住金陵清涼院。是謂法眼宗。華嚴中六相義。師嘗舉示學人。謂眞如一心爲總相。出生諸緣爲別相。法皆齊爲同相。隨相不等爲異相。建立境界爲成相。不動自位爲壞相。并說三界唯心。萬法唯識。以融宗教。

今附錄佛祖心燈。七佛及禪宗諸祖傳法偈如下。

七佛偈

毗婆尸佛 身從無相中受生。猶如幻出諸形像。幻人心識本來無。罪福皆空無所住。

尸棄佛。起諸善法。本是幻。造諸惡業。亦是幻。身如聚沫。心如風。幻出無根。無實性。

毗舍浮佛。假借四大以爲身。心本無生。因境有。前境若無。心亦無。罪福如幻起亦滅。

拘留孫佛。見身無實。是佛身。了心如幻。是佛幻。了得身心本性空。斯人與佛何殊別。

拘那含牟尼佛。佛不見身。知是佛。若是有知。別無佛。智者能知罪性空。坦然不怖於生死。

迦葉佛。一切衆生。心清淨。從本無生。無可滅。卽此身心。是幻生。幻化之中。無罪福。

釋迦牟尼佛。法本法無法。無法法亦法。今付無法時。法法何曾法。

禪宗三十三祖傳法偈

摩訶迦葉 天竺第一祖

法法本來法。無法無非法。何於一法中。有法有非法。

阿難 天竺第二祖

本來付有法。付了言無法。各各須自悟。悟了無無法。

商那和修 天竺第三祖

非法亦非心。無心亦無法。說是心法時。是法非心法。

優婆鞠多 天竺第四祖

心自本來心。本心非有法。有法有本心。非心非本法。

提多迦 天竺第五祖

通達本心法。無法無非法。悟了同未悟。無心亦無法。

彌遮迦 天竺第六祖

無心無可得。說得不名法。若了心非心。始了心心法。

婆須密 天竺第七祖

心同虛空界。示等虛空法。證得虛空時。無是無非法。

佛陀難提 天竺第八祖

虛空無內外。心法亦如此。若了虛空故。是達真如理。

伏馱密多 天竺第九祖

真理本無名。因名顯真理。受得真實法。非真亦非偽。

脇尊者 天竺第十祖

真體自然真。因真說有理。領得真真法。無行亦無止。

富那夜奢 第一祖

迷悟如隱顯。明暗不相離。今付隱顯法。非一亦非二。

馬鳴大士 第二祖

隱顯即本法。明暗元不二。今付悟了法。非取亦非離。

迦毗摩羅 第三祖

非隱非顯法。說是真實際。悟此隱顯法。非愚亦非智。

龍樹尊者 第四祖

為明隱顯法。方說解脫理。於法心不證。無瞋亦無喜。

迦那提婆 第五祖

本對傳法人。為說解脫理。於法實無證。無終亦無始。

羅睺羅多 第六祖

於法實無證。不取亦不離。法非有無相。內外云何起。

僧迦難提 第七祖

心地本無生。因地從緣起。緣種不相妨。華果亦復爾。

伽耶舍多 第八祖

有種有心地。因緣能發萌。於緣不相礙。當生不生。

鳩摩羅多 第九祖

性上本無生。為對求人說。於法既無得。何懷決不決。

闍夜多 第二十祖

言下合無生。同於法界性。若能如是解。通達事理境。

婆修盤頭 第二十一祖

泡幻同無礙。如何不了悟。達法在其中。非今亦非古。

摩拏羅 第二十二祖

心隨萬境轉。轉處實能幽。隨流認得性。無喜復無憂。

鶴勒那 第二十三祖

認得心性時。可說不思議。了了無可得。得時不說知。

師子比丘 第二十四祖

正說知見時。知見俱是心。當心即知見。知見即於今。

婆舍斯多

第二十五祖

聖人說知見。當境無是非。我今悟真性。無道亦無理。

不知密多

第二十六祖

真性心地藏。無頭亦無尾。應緣而化物。方便呼為智。

般若多羅

第二十七祖

心地生諸種。因事復生理。果滿菩提圓。華開世界起。

菩提達磨

西天二十八祖 中華初祖

吾本來茲土。傳法救迷情。一華開五葉。結果自然成。

慧可大師

第二十九祖 中華二祖

本來緣有地。因地種華生。本來無有種。華亦不曾生。

僧璨大師

第三十祖 中華三祖

華種雖因地。從地種華生。若無人下種。華地盡無生。

道信大師

第三十一祖 中華四祖

華種有生性。因地華生生。大緣與信合。當生生不生。

弘忍大師

第三十二祖 中華五祖

有情來下種。因地果還生。無情既無種。無性亦無生。

慧能大師

第三十三祖 中華六祖

心地含諸種。普雨悉皆生。頓悟華情已。菩提果自成。

第五節 法相宗

法相宗者。決判諸法性相。故名法相宗也。況言此宗。總有四名。一名唯識宗。此宗大義。明唯識故。二名應理圓實宗。一切法門。皆應理故。三名普為

乘教。教攝五乘。故四名法相宗。其義如前。今是舉其一名也。

此宗所依經論。按唯識論中。引六經十一論。其六經者。華嚴。深密。如來出現功德莊嚴。阿毘達磨楞伽密嚴。十一部論者。瑜伽顯揚。莊嚴集量。攝論。十地分別。瑜伽辨中邊。二十唯識。觀所緣雜集論。是也。若總言之。五部大論。十支論等。皆彼所依。然解深密經。瑜伽論。唯識論等。特爲所學指南。法相宗以彌勒無著爲宗。而自玄奘始傳中土。先是如來滅後九百年時。彌勒菩薩從兜率天降中天竺。阿瑜遮國。於瑜遮那講堂說五部大論。補處薩埵。位居十地。是則如來在世親聞所傳。非空非有中道妙理。於諸教中實爲明鏡。如瑜伽論者。卷軸百卷。諸教悉判。故名廣釋諸經論。次有無著菩薩。位居初地。繼於慈尊。廣傳此宗。慈氏教文。咸加委解。釋尊所說。廣造論釋。無著弟世親菩薩。四善根中。明得薩埵。承於無著菩薩。廣傳此宗。依慈氏論。盛施論釋。初學小乘。造五百部論。後弘大乘。亦造五百部論。一

代教文。皆悉通達。次有護法菩薩。深解世親論。遠弘慈氏教。賢劫一佛。明告空中。外道邪執。異部小乘。卷舌如啞。故西天外道小乘。並稱云大乘。唯此人也。次有戒賢論師。咸傳法相法門。亦是一代絕倫。其爲天竺五大論師矣。唐初玄奘三藏。遠陟天竺。遂謁戒賢論師。時戒賢居蘭陀寺。座下萬衆。玄奘往依之。居上首十人之列。從學瑜伽五年。及還中土。盛弘此宗。門徒頗衆。於諸經律論。翻傳尤多。是爲唐代法相始祖。玄奘住慈恩寺。故法相宗又號慈恩宗云。

次有窺基法師。是玄奘上足。本尉遲敬德之猶子。從玄奘出家。英敏絕倫。尤善因明。相傳玄奘譯瑜伽論未畢。有僧盜聽。歸宣講。門人以告。玄奘曰。彼雖能講。未通因明。不足取也。乃以因明傳於窺基。窺基善用三支比量之法。能立能破。盜聽者無如之何矣。窺基又作成唯識論述記。蓋西竺作成唯識論者十家。基師乃啟奘公。擷十家之菁華。揉成一部。此書一出。邪

宗盡破。正義全伸。釋門之偉烈也。唐時傳法相宗者。又有淄州慧治大師。稟窺基之緒。次有撲揚智周大師。則承事淄州者也。

法相宗立三時教。攝一代教。具如解深密經說。一者有教。佛初時中。爲發趣彼聲聞乘者。破外道實我之執。明我空法有之旨。諸部小乘。皆此教攝。且此約有義。餘皆可攝。故二者空教。於第二時。爲發趣大乘者。明諸法皆空之旨。以破前實法之執。三者中道教。第三時中。說非空非有之旨。以破前偏有偏空之執。然則初時唯約依他說有。第二時唯約我執說空。未是三性三無性顯了之說。故前二時。名爲未了諍論。安足處所。第三時中。具說三性三無性。遍計所執。故非有。依他起性。故非無。是則非空非有。中道妙理。遠離二邊。直入正路。是真了義。非諸諍論。安足處所。尤爲甚深微妙。華嚴深密。金光明。法華。涅槃等。諸部大乘。皆此中攝。諸部般若。皆第二時攝。諸部小乘。並初時攝。問曰。此三時者。爲年月次第。爲義類次第。答。學者

異義不同。或云年月三時。或云義類三時。或云義類年月。兼有三時。又問曰。第三時中。所謂中道者。但約三性而立。與頗有一法中而明中道乎。答。此有二義。一云三性對望中道。二云一法中道。然多是三性對望中道而已。又問第二時中。云何說空。答。此有二義。一云約通計一執密意而說皆空。一云約三無性而說空也。

法相宗立三乘五性。其五性者。一定性聲聞。二定性緣覺。三定性菩薩。四不定種性。五無性有情。定性二乘。隨自乘果。並無餘入寂。菩薩種性。二利行滿。證大菩提。無性有情。法爾無有無漏種。唯有有漏種子。若昇進生人天之中。以之爲上。或問入寂二乘。有還生乎。答。無有。此入無餘者。灰身滅智。諸識皆滅。何有還生。不定性人。必回心向大。都無入寂回心之時。入十信初心。初住。入僧祇位。乃至成佛。衆生之機。法爾有此五性差別。故佛隨此一一機根。授彼相應之法。故必成五乘。謂無性有情。是人天乘。三乘定

性。以三乘。不定種性。隨應通三。故有五乘。若唯就出世。卽立三乘可矣。如法華唯說一乘。故定性二乘。皆可成佛。不立五性。法相宗約不定性。故廣至五乘。然非謂不定性皆可成佛。但就無始來五性差別不可改言之也。法相宗論三乘修行得果之相。亦以聲聞三生六十劫而應證果。緣覺四生百劫而證果。菩薩經三僧祇。得大覺果。菩薩位總立四十一位。謂十住。十行。十回向。十地。佛果也。若開等覺。四十二位。然法雲地攝。又開十信者。五十一位。然以十信攝於初住。故慈恩大師。唯立四十一位也。若西明法師。則具立五十二位。此四十一位。第爲五位。(一)資糧位。是地前三十心。(二)加行位。第十回向之後。開四善根。以爲見道。加行方便。(三)通達位。是初地入心見道位也。(四)修習位。從初地住心。乃至十地是也。(五)究竟位。謂佛果是。此名五位修行也。

法相宗論三乘之人所斷障。二乘之人。唯斷煩惱障。菩薩大乘。具斷二障。

二障者。一煩惱障。二所知障。二障各有二。謂分別俱生。菩薩地前伏分別。二障現行。初地斷彼二障種子。二地已上。乃至十地。地地漸斷。俱生所知障。至第十地。斷俱生煩惱障種子。二障習氣。二地已上。如應漸斷。登佛果時。一時斷盡。三祇之間。所經各位。三賢。四善根。並是初僧祇。初地至七地。是第二僧祇。八九十地。是第三僧祇。過三祇已。卽證佛果。菩薩四十一位。束爲四依。地前是初依。供五恆沙佛。初地至六地。是第二依。供養六恆沙佛。七八九地爲第三依。供養七恆沙佛。第十地是第四依。供養八恆沙佛。三祇之間。合供二十六恆沙佛。此三祇間。萬行並修。六度圓足。地前修相。唯識。地上顯性唯識。已上畧述此宗論修證大要也。

法相宗所立法數。可以百法攝之。當詳論於後編。茲述其畧。百法束爲五位。(一)心王。有八種。眼。耳。鼻。舌。身。意。末那識。阿賴耶識。是爲八識。(二)心所有法。有五十一。合爲六位。一。遍行五。作意。觸。受。想。思。二。別境五。欲。勝解。

念定。慧。三。善。十。一。信。精。進。慚。愧。無。貪。無。瞋。無。癡。輕。安。不。放。逸。行。捨。不。害。
(四) 煩惱有六。貪。瞋。癡。慢。疑。惡。見。惡。見。開。五。身。見。邊。見。邪。見。見。取。見。戒。禁。
取。見。(五) 隨煩惱二十。忿。恨。覆。惱。慳。嫉。誣。謔。害。憍。無。慚。無。愧。掉。舉。惛。沈。不。
信。懈。怠。放。逸。失。念。散。亂。不。正。知。六。不。定。有。四。悔。睡。眠。尋。伺。六。位。合。有。五。十。
一。也。(三) 色法有十一。眼。耳。鼻。舌。身。色。香。味。觸。及。法。處。所。攝。色。此。有。五。種。
極。畧。極。迴。受。所。引。定。所。生。遍。計。所。起。色。此。並。法。處。所。攝。色。也。(四) 心。不。相。
應。行。法。二。十。四。種。得。命。根。衆。同。分。異。生。性。無。想。定。滅。盡。定。無。想。事。名。身。句。
身。文。身。生。老。住。無。常。流。轉。定。異。相。應。勢。速。次。第。方。時。數。和。合。性。不。和。合。性。
也。(五) 無爲法有六。虛。空。擇。滅。非。擇。滅。不。動。想。受。滅。眞。如。也。是。百。法。者。一。
切。諸。法。不。越。乎。是。矣。

若以蘊處界三科攝色心等法者。與百法例之。則心王心所。及以色等。束
爲五蘊。色蘊是色法。受想二蘊。卽是心所。識蘊是八識心王。自餘心所等。

並行蘊攝也。蘊不攝無爲矣。其十二處。色廣心畧。唯蘊可知。其十八界。色心廣說。亦攝無爲。此宗本意。只明唯識。一切諸法。皆是唯識。都無一法而在心外故。

慈恩大師云。有心外法。輪迴生死。覺知一心。生死永棄。然諸法差別。皆唯識所變。離識無別法。一切境界。皆歸心識。總明此義。有五重唯識。一遣虛存實識。遣遍計所執是虛。存依他圓成是實故。二捨濫留純識。依他內境濫外故。捨此唯名識。三攝末歸本識。攝見相二分末。歸自體分本故。四隱劣顯勝識。隱劣心所。顯勝心王故。五遣相證性識。遣依他事相。證唯識理性故。前四相唯識。第五爲性唯識。此心之用。總有四分。一相分。二見分。三自證分。四證自證分也。分量決曰。心用分限。四種差別故。名四分。然四師異說。一安慧菩薩。唯立於一分。是自證分也。二難陀菩薩。立於二分。是相見分也。三陳那菩薩。立於三分。相分見分及自證分也。四護法菩薩。立於

四分。卽前所列。護法所以立四分者。相貌差別。爲心所緣。故云相分。能緣前境。故云見分。能緣見分。故名自證分。能緣自體分。故名證自證分也。此四之中。相分唯是所緣。無緣慮義。其後三分。通能所緣。是則八識心王心所。各有四分。八識雖體如一。論用卽有四分。是故八識各有四分也。此宗明眞妄義。總立三性。一、遍計所執性。是當情現相。此亦分三。能遍計所遍計。遍計所執。前二依他攝。遍計所執。是當情現相。於無謂有。虛妄執著。二、依他起性。四緣所生諸法。因緣和合有故。三、圓成實性。諸法理性。具於圓滿。成就眞實三義。故也。此三性中。所執是妄有。依他卽假有。圓成是眞有。遍計所執。既是妄執。依他圓成。卽妙眞三性。互別不相亂通。然依他事法。與圓成理性。非一非異。相不離體。體不離相。三性偶云。由彼彼遍計。遍計種種物。此遍計所執。自性無所有。依他起自性。分別緣所生。圓成實於彼。常遠離前性。故此與依他。非異非不異。如無常等。性非不見此彼。對

此三性。明三無性。卽翻遍計。依他圓成。如次顯相。生勝義。三無性矣。故三十頌云。卽依此三性。立彼三無性。故佛密意說。一切法無性。初卽相無性。次無自然性。後由遠離前所執法我性。如上三性。亦不離識。彼三無性。依三性立故。唯識論云。應知三性。亦不離識。又云。卽依此前所說三性立。彼後說三種無性。然則修行者皆須觀唯識。佛果所證。但證唯識而已。

此宗轉八識成四智。四智者。一大圓鏡智。二平等性智。三妙觀察智。四成所作智是也。入初地時。轉六七二識。而得妙觀平等二智。至佛果時。轉五八識。而得圓鏡成所二智。此時四智圓滿。二轉妙果朗然。其所證理。有四涅槃。一本來自性清淨涅槃。二有餘涅槃。三無餘涅槃。四無住處涅槃也。初亦凡夫亦具。中二聲聞緣覺並得。唯佛果如來。具此四種。此四總束。名清淨法界。加前四智。以爲五法。五法三身相攝。唯識論有二師解。其初師意。清淨法界。大圓鏡智。以爲法身。平等妙觀。以爲報身。成所作智。以爲化

身。第二師意。清淨法界。是自性身。四智上相。是自受用。平等性智所現之身。他受用。成所作智所現之身。是變化身。妙觀察智。是說法斷疑智也。此宗正義。是第二師指南。當知五位修行。運運窮盡。二障使習。蕩蕩斷滅。三祇曠劫。萬善成滿。攝在一念。佛果速疾。有漏八識。轉得四智。二轉妙智。三身圓滿。加之五乘普攝。化三乘各至極一乘。方便三乘。真實正體。智前真理寂。然後得智中。衆生普化。依詮談旨。三性三無性懸鏡矣。廢詮談旨。四句百非息慮矣。性相決判。無如此宗。義理極成。何教及此。法相宗大概如此。

第六節 三論宗

三論宗者。以依三部論立宗。故名三論宗。所謂三部論者。一中論四卷。龍樹菩薩造。二百論二卷。提婆菩薩造。三二十門論一卷。龍樹菩薩造。是名三論。然若加智論百卷。卽是四論。智論亦是龍樹菩薩造也。此四論中。三

論是通申論。通申大小諸教。故智論卽別申論。則釋大品般若。故智論若具譯之。可得千卷。羅什三藏。滅於九信。取簡翻成百卷。就三論中。中論正破小乘。兼破外道等。顯大乘義。百論正破外道。旁破自餘。顯大乘義。十二門論。並破小乘外道。正顯大乘深義。三論所明。不過二諦。凡此宗大義。破邪顯正。二門爲軌。論雖有三。義唯二轍。破邪則下救沈淪。顯正則上弘大法。挈領提綱。唯此二轍。頗成大宗。

所謂破邪者。總破一切。有所得見。畧而明之。不出四見。一、破外道實我之邪見。二、破毘曇實有之執見。三、折成實徧空之情見。四、摧有所得。大乘見解。內外盡破。大小偏折。暨有所得。通皆遣破。故無不被破。莫不被責。此謂是宗破邪義也。所謂顯正者。破邪之外。無別顯正。破邪已盡。無有所得。所得既無。言慮無寄。然對破邪故。亦有顯正。一源不窮。則戲論不滅。毫理不盡。則至道不顯。故必無源不窮。無理不盡。是則顯正之要也。

然顯正之義如何。至道玄極。言論之所不及。言有則返愚。語無則非智。故非有亦無。非亦有亦無。非非有非無。言語道斷。心行處滅。湛湛無寄。寥寥絕據。不知何以而強名之曰顯正爾矣。問。言語俱絕。有無俱遣。卽是空義。何關顯正。答。旣遣有無。何住於空。佛道大體。實無寄者乎。有無俱絕。故無有所得。顯正之旨。窮於此矣。問。旣遣有無。若爾。緣生諸法。云何得立。答。緣生諸法是假有。假有卽無所得矣。二諦所因而立。四中依之以成。以俗諦故。不動真際。建立諸法。以真諦故。不壞假名。而說實相。故空宛然而有。有宛然而空。色卽是空。空卽是色。所言宗旨在茲矣。二諦唯是教文。不闕事理。以機緣故。有二諦。以理實故。泯二諦。有是空之有。故言有非有。空是有之空。故言空非空。非有談空。非空說有。諸佛說法。常依二諦。卽其義也。此宗所顯。卽此無得。故正觀而已。古德云。入無不妙理之風。拂妄想戲論之塵。玩無得正觀之月。浮一實中道之水。已上以無得故。假名諸法也。

或問既一切無得。此宗云何談成佛果。答一切衆生本來是佛。六道衆生本自寂滅。無迷亦無悟。豈論成不成乎。故此宗迷悟本無。湛然寂滅。然假名門中。論於迷悟成不成耳。由此義故。成佛有遲速。根有利鈍故也。一念成覺是短。三祇成佛卽長。一念不礙三祇。三祇不妨一念。一念卽三祇。三祇卽一念。如一夕眠。夢百年事。百年之事。還故一夕。經三祇故。萬行積成。在一念故。佛果速疾。問三祇積行。經幾位次。答三祇菩薩。經五十一位。然後至佛果。故此宗立五十二位也。此宗以覺本體有迷。故有生死。返本還源。但拂客塵。是本有覺體。宛然而顯。此名爲始覺佛。當知對迷故立悟。對悟有迷。悟發則無迷。無迷故無悟。迷悟本無。本來寂滅。迷悟染淨。是假名施設。無得正觀。卽妙極至道也。問其所謂八不者。何。答不生。不滅。不斷。不常。不一。不異。不來。不去。遣八迷故。已上八種。不卽今宗所顯理也。

此宗釋一切法。有四種釋義。一依名釋義。二因緣釋義。三見道釋義。四無

方釋義。一切法門。以此可釋。別立四重二諦。一有爲俗諦。空爲真諦。二有空爲俗。非空非有爲真。三空有非空。非有爲俗。非非有非非空爲真諦。四以前爲俗。非非不有非非不空爲真。斯乃破外道。毘曇。有所得。大乘等故也。於是立二藏。三轉法輪。攝一代教。二藏者。一聲聞藏。是小乘教。二菩薩藏。是大乘教。大小二教。此中攝盡。此依智論。三轉法輪者。一根本法輪。華嚴是也。二枝末法輪。阿含已後至般若等並是也。三攝末歸本法輪。法華經是一代諸教。一切攝盡。是法華經矣。大小二乘。顯理同一。隨機故異。諸大乘經。顯道無二。對緣故有別。然判諸大乘經。各立等勝劣。三判一切教。庶無偏解矣。

此宗祖師。以大智文殊菩薩爲高祖。馬鳴菩薩。以爲次祖。次龍樹菩薩。妙弘此宗。龍樹授龍智菩薩。及提婆菩薩。此二大論師。並肩施化。龍智授於清辨菩薩。清辨授智光論師。智光授師子光菩薩。彼提婆菩薩。智解甚深。

辨才無礙。大破外道。盛弘佛教。論師以此宗授羅睺羅菩薩。羅睺羅授沙車王子。王子授龜茲羅什三藏。羅什三藏當姚秦之世。姚萇使呂光懇請法師來至震旦。大翻經論。廣傳此宗。四論盡什師所翻。翻譯之美。古今流譽。於是道生。僧肇。道融。僧叡。並肩相承。曇影。慧觀。道恆。曇濟。同志讚美。其後曇濟大師。以授道朗大師。道朗授於僧詮大師。僧詮授於法師。法師授於嘉祥大師。嘉祥大師先世安息人。生於金陵。從法朗學三論。並爲作疏四十萬言。其疏舊傳日本。近始有刊行之者。嘉祥名吉藏。曾住會稽嘉祥寺。故稱嘉祥大師。生平講三論百餘徧。講法華大品智論華嚴維摩等各數十徧。實爲輓近三論宗之大祖云。

義淨三藏云。天竺有二宗。瑜伽與中論。蓋三論顯空以破有。故一名性宗。一名空宗。一名破相宗。故與瑜伽對立也。

第七節 天台宗

天台宗以法華爲所依。本經以判一代諸教。然判教綱綱。諸義咸引。蓋以法華爲宗骨。以智論爲指南。以大經爲扶疏。以大品爲觀法。引諸經以增信。引諸論以助成。觀心爲經。諸法爲緯。織成部帙。卓然成此土一大宗者也。先是北齊朝有慧文大師者。北齊擾亂之際。姓里失考。讀龍樹菩薩中論偈云。因緣所生法。我說卽是空。亦名爲假名。亦名中道義。遂悟三觀旨趣。立一心三觀法門。以授南嶽慧思禪師。慧思授天台智者大師。遂爲天台一教之祖焉。慧文祖龍樹。立空假中三觀。空觀順真諦。假觀順俗諦。中觀順第一義諦。或用次第三觀。從假入空。從空入假。從空假入中道。或用通相三觀。一空一切空。假中皆空。一假一切假。空中皆假。一中一切中。空假皆中。或用一心三觀。一念心中。三觀具足。此三種後復尤勝於前前也。

慧思禪師。武津李氏子。梁時人。依慧文禪師。悟入法華三昧。及旋陀羅尼門。後居南嶽勝境。所著大乘止觀。後人奉爲圭臬。智者大師。名智顓。隋帝

稱爲智者大師。生荊州華容陳氏。年十八。出家。師事慧思禪師。誦法華經。至藥王品。曰。是真精進。是真法。供養如來。卽悟法華三昧。獲一旋陀羅尼。見靈山一會。儼然未散。後住天台山。故又稱天台大師。蓋此宗遠承龍樹。慧文南岳。唯提義綱。至於天台大師。廣立教時。具判一代。而後此宗彌盛。

智者所判教儀。卽五時八教。蓋以藏通別圓。爲教化四教。以頓漸秘密。不定。爲化儀。曰教。已具述於前第二章中。茲不復贅。

智者以下。次有章安大師。承天台教觀。廣傳此宗。天台性散說。章安悉結集。以成一宗之典籍。以作一家之綱目。次智威大師。承章安大師。智威授慧威大師。慧威授玄朗大師。玄朗授妙樂大師。妙樂廣解祖文。並製記章。天台止觀。主義釋籤。六句。如應作輔行疏記。爲諸宗記章所不及。妙符祖意。頗符大宗。義通法師。智禮法師。淨覺法師等。皆承其學。後妙樂授法道。

邃和尚。則法門靈府。行滿智雲。並稟妙樂之緒。

天台主張性具法門。謂自性本具善惡等法。方能造十界因果。若非性具。則不能造。他宗專主性善。天台兼主性惡。以性惡通於十界。是與他宗迥別處。

天台觀法。尤爲廣妙。一心具十法界。一一界中。各具十界。是謂百界。百界之中。各有十如。是謂千如。五陰一千。衆生一千。國土一千。共成三千世間。以此爲能觀。以此爲所觀。則成三千妙境。十界者。四聖六凡也。十如者。出法華經。所謂諸法如是相。如是性。如是體。如是力。如是作。如是因。如是緣。如是果。如是報。如是本末究竟等。蓋天台宗。用法華爲主。以開示悟入佛之知見也。

第八節 賢首宗

賢首宗一名華嚴宗。一名法界宗。蓋以華嚴爲諸經之王。無盡教海。皆從

此經流出。東晉時。梵僧佛陀跋陀羅。在廬山承遠公之意。往天竺求經。得華嚴前分三萬六千偈。返晉。譯於揚州謝司空寺。凡六十卷。此華嚴入中國之始也。自是治華嚴者。乃有五祖。杜順、智儼、法藏、清涼、圭峯。是也。

華嚴初祖杜順和尚。相傳是文殊化身。本姓杜。名法順。字帝心。雍州萬年縣人也。生於陳武帝永定二年。生時有乳母來求哺養。滿三月。騰空而去。年十五。代兄統兵。中途竭薪水。師以桶水束薪供給。十萬軍用之不盡。年十八。出家。地神捧盤承髮。神異衆多。不勝枚舉。年八十四。入宮辭太宗。昇太階殿。化於御座。先時有門人辭往五臺禮文殊。及至山麓。遇老人告曰。大士已往長安教化衆生去也。問爲誰。曰杜順和尚是。遂兼程而返。至則前一日化去矣。自華嚴譯出二百餘年。通其義者。代不乏人。未有若杜順師之圓融也。嘗作法界觀。以二千餘言。總括華嚴奧旨。投巨火中。一字無損。遂感華嚴海會菩薩。現身讚歎。又有五教止觀。十玄等篇。流傳於世。

二祖智儼。別號雲華和尚。住終南至相寺。故稱至相尊者。依杜順和尚學華嚴經。盡得蘊奧。年二十七。遇異僧教尋華嚴十地中六相義。豁爾貫通。作華嚴畧疏五卷。每卷分本末爲十卷。題名於大方廣佛華嚴經中。搜玄分齊。通智方軌。後人稱爲搜玄記。並作十玄門。五十要問答。孔目章。以申其義。

三祖法藏。康居國人。別號國一法師。從儼公研究華嚴。武后建太原寺。命京城大德。爲師剃染。授滿分戒。勅住太原寺。講華嚴經。感天雨寶華。繽紛而下。開顯大義。口出五道光明。卒後諡號賢首菩薩。其著疏約百餘卷。晉譯華嚴探玄記四十卷。承搜玄之後。發揮盡致。爲時所宗。其餘多闡揚一乘妙義。華嚴法門。由此大行。

四祖清涼國師名澄觀。字大休。越州會稽人。武后時。實義難陀。重譯華嚴經四萬五千偈。成八十卷。世人稱爲新經。賢首旣作探玄記。釋晉譯竟。復

疏新經。僅及數品而逝。後二十七年。清涼乃生。及其作疏。全依賢首模範。大疏二十卷。隨疏演義鈔四十卷。今以疏鈔合於經文。作二百二十卷。精深淵博。爲世所珍。

五祖宗密。住圭峯草堂寺。故稱圭峯禪師。得清涼所撰華嚴疏鈔。慶快平生。遂承清涼法脈。爲沙彌時。授經得圓覺讀之心地。開通義天朗耀。後作疏釋經。大疏三卷。大鈔十三卷。畧疏兩卷。小鈔六卷。成一家獨步。

此宗開宗判教。至賢首而大備。故以賢首名宗。分東流佛學。爲小始終頓圓五教。又有四法界。十玄門。具如前第二章所述。茲不贅焉。

第九節 密宗

密宗一名眞言宗。天竺屬灌頂部。如來滅後七百年時。龍猛菩薩。開南天鐵塔。遇金剛薩埵。受職灌頂。然後廣傳此宗。薩埵親承大日如來。大日是教主也。龍猛菩薩。授於龍智菩薩。自爾已來。善無畏三藏。中印度人。事達

摩掬多爲師。通達密教。遵掬多之命。入唐行道。於開元四年。齋梵吏至長安。於是一行禪師。受其真傳。一行姓張。鉅鹿人。久依善無畏三藏。神異顯著。密宗所稱大日如來。卽毘盧遮那佛。善無畏三藏譯大毘盧遮那成佛神變加持經七卷。一行筆受。密宗稱爲大日經。一行作疏二十卷。又作釋十四卷。共六十萬言。皆從三藏口授之義。纂集成文。後之學密教者。以大日經疏釋爲宗。凡稱神變疏鈔者。卽此本也。當時又有金剛智三藏。南印度人。開元七年。泛海達廣州。行道作法。皆著奇驗。翻譯秘密經典多部。又不空三藏。北印度人。依金剛智爲師。盡傳其道。善無畏一行金剛智不空。號爲密教四尊者。皆神異超羣。當時君臣士庶。奉之若佛。凡受灌頂法者。毘盧遮那五智灌頂。頓入佛乘。非具金剛種性。不能傳受。去聖遙遠。人情澆漓。能受此法者。甚爲難得。明時特申禁令。不許傳授密教。恐非其人。反有害於法門也。今惟日本尙傳此宗云。

此宗立十住心。攝大小顯密諸教等。窮盡無遺。一、異生羝羊心。二、愚童持齊心。三、嬰童無畏心。四、唯蘊無我心。五、拔業因種心。六、他緣大乘心。七、覺心不生心。八、一道無爲心。九、極無自性心。十、秘密莊嚴心。是名十住心。初三住心。是世間乘。於中第一是三惡道。第二卽人乘。第三是天乘。後七住心。是出世間乘。於中第四聲聞。第五緣覺乘。總是小乘。後五大乘。他緣覺心。是三乘教。一道極無。卽一乘教。第十是金剛乘教。最尊最極之實教也。九種住心。皆是權乘。並是因位。第十住心。獨是實果。大日如來。心王覺體。塵數諸聖。心數眷屬。五智所成。依正二報。本有金剛界。自在大三摩那。現覺諸法。本初不生。大菩提心。不壞金剛。光明心殿。是依報也。三十七尊。九會曼荼。十三大會。四重曼荼。重重帝網。塵刹聖衆。是正報也。依正無盡。自在圓滿。高起諸宗。廣包衆典。非出世小聖門。所能入室。故四大乘宗。以空寂而謂實理。九界情執。覆心城而未開顯。唯此密教。明見實理。深入心城。

密嚴佛國。華藏世界。塵數諸尊。森羅而住。一切衆生。萬德妙用。歷然而具。可謂盛矣。

此宗建立六大。總名佛體。四種曼荼。此上相貌。三密相應。卽其業用。六大之中。前五大是理。第六識大。卽智。理智圓明。各有相用。四曼三密。所以建立智。卽金剛界。理是胎藏界。是名二界兩部。大日所以而成六大。卽大日如來。一切諸法。不離六大。六大法性。周遍諸法。故一切諸法。無非大日。大日如來。周遍法界。當知兩部者。是大日如來。理智之德也。理德無量。故胎藏有四重聖衆。智德無量。故金剛界有三十七尊。兩部不二。則爲理智冥合也。

此宗佛立四身。自性受用。變化等流。是名四種法身。五方五智。以成四身。卽身成佛。大覺速證。顯教是釋迦。說密教是大日。說二教說主。炳然差別。若得實義。卽二佛無二。離此釋迦。別無大日。故十住階級。捨劣得勝。皆是

遮情之分齊。十心諸法。平等恆然。卽是表德之義門。不二而二。二而不二。一切諸法。皆是大日眞如。若離此教。更無成佛之涂。密宗所持。大概如此。

第十節 淨土宗

淨土宗持念佛法門。實三根普被之要路也。念佛緣因。出於起信論。繼則龍樹、天親、亦間論念佛。而震旦開宗。實起於東晉慧遠。慧遠。姓賈氏。雁門樓煩人。博極羣書。尤善老莊。爲道安法師之高弟。見廬山間曠。可以息心。欲立精舍。感山神闢地輸材。因名其殿曰神運。卽東林寺也。師專倡淨土法門。道俗皈依者日衆。共結蓮社。得一百二十三人。同願往生極樂國土。魏曇鸞。雁門人。家近五臺。歷觀聖跡。發心出家。念世壽短促。欲求仙術。以永其年。渡江而南。訪陶隱居。盡得其傳。還至洛中。逢天竺三藏菩提留支。問以長生之道。留支曰。此方何有不死之法。縱得成仙。終受輪轉。乃以觀無量壽經授之。曰。此眞不死法也。鸞遂焚仙方而修妙觀。作往生論註二

卷。中國蓮宗著述。推爲巨擘。

唐道綽。姓衛。并州汶水人。十四歲出家。講大涅槃經二十四徧。景慕曇鸞淨土之業。繼其後塵。住玄中寺。道俗赴者彌衆。講觀無量壽經。將二百徧。瑞應甚多。不可具述。著有安樂集二卷。現行於世。又有善導者。不知何處人。見禪師九品道場。講誦觀經。大喜曰。此真入佛之津要也。人見其念佛一聲。有一光明從口中出。百聲千聲。亦復如是。著有觀經疏。及各種淨土典籍傳世。綽善二公。提倡專修。其言曰。修餘行業。多劫方成。唯此法門。速超生死。誠爲蓮宗要訣也。

大藏之中。專說彌陀淨土者。有三部經。無量壽經二卷。人稱爲大本。說彌陀因地修行。果滿成佛。國土莊嚴。攝受十方念佛衆生。往生彼國等事。該括無遺。所攝之機。通於聖凡。凡位具攝三輩。唯除五逆誹謗正法。其餘均爲所攝。可謂廣矣。阿彌陀經一千八百餘言。人稱爲小本。略說西方淨土。

依正莊嚴等事。令人執持名號。一心不亂。卽得往生。最爲切要。此經所攝。揀除小善根福德因緣。唯攝一類純篤之機。觀無量壽佛經。攝機最廣。十惡五逆。臨終苦逼。十聲稱名。卽得往生。或類十惡五逆之人。善根全無。佛云何接。徧尋教典。唯華嚴經隨好光明功德品。阿鼻獄中。夙根成熟。蒙光頓超。觀經下品下生。罪大惡極。能於急迫之際。脫離極苦。往生極樂。一切教典所未曾說也。然彌陀願力。非但凡小不能測度。卽多劫修菩薩道者。亦不能知。所以心稱彌陀名號一聲。能滅八十億劫生死重罪。何況淨念相繼。長時無間哉。

淨土宗以彌陀光明。徧照十方念佛衆生。攝取不捨。衆生淨眼未開。不能知見。至臨終時。意根命根齊斷。後念未起。剎那之間。佛現在前。卽脫三界火宅矣。故衆生品類。萬千差別。彌陀願力。平等無二。凡念佛者。千句萬句。卽是一句。前句已滅。後句未生。當念一句。剎那不住。念佛之心。不緣過去。

不緣未來。但緣現前一句。以爲往生正因。此是萬修萬人去之法也。久久純熟。能緣之心。忽然脫落。無念而念。念卽無念。卽名理一心。生品更高。自來修習信心。必經萬劫。如初住位。方得不退。若用念佛法門。具傳凡夫。一生淨土。卽得不退。所以超勝他宗也。近世蓮池、懷感等。皆以淨土宗教人。蓋法運盛衰。古今異致。當今之世。求其協時逗機。無如此法。是淨土宗之大要也。

佛學大綱 卷上

二四四

佛學大綱卷上終